

Matyu

Ölöwak Buᅇa Matyunöᅇ ohoyök.

Jim-asa-asari

Matyu qet mianᅇö könaᅇi mi Kembugören kalem. Qetᅇi alaᅇi Liwai. Rom gawmangö takis meme azia malök. Nup mi memba maliga Jisösnöᅇ kaba oholiga uruᅇi melenᅇa gwarek 12 yeᅇgö sutᅇine malök.

Ölöwak Buᅇa ki Jisösgö könaᅇi nanᅇe Juda könagesö yeᅇgöra jim asarim enᅇimamgöra aka ohoyök. Keu köᅇᅇi bohonᅇi kewö, “Jisös Kraistnöᅇ Amötqeeᅇ Tonini aka Kiᅇnini akza.” Juda ambazip yeᅇgöra keu mi qahö dop köli uruᅇinan bölii qaköget. Mianᅇöra Matyunöᅇ Jisös nupᅇaᅇgö könaᅇi mi aukᅇe jim asariba törörök kusum enᅇiyök. Jöhöjöhö Walᅇe amötqeeᅇgö jöhöjöhö keu (promis) ahözawi, mi pakpak mönö Jisösgöra aka aukᅇe ahum kuwuleiba öᅇᅇambuk ahök. Amötqeeᅇ Toᅇi mi Hibuᅇu keunöᅇ Mesaia aka Grik keunöᅇ Kraist.

Jisösnöᅇ urugö nup bahöᅇi karöbut memba malök: Yaᅇön Ölöwak Buᅇa ambazip kusum enᅇiba uruᅇini mianᅇön kuᅇguba kawöᅇᅇini mem ölöwaka malök. Mewö memba aniga aᅇᅇöletot asuheᅇetka mala maripom ipnöᅇ öᅇᅇöba kömuiga löm köᅇgetka kunbuk wahörök. Mewö mianᅇön Anutu bemto-hoᅇaᅇgö könaᅇi kondel neᅇᅇiyök. Mewö aiga nini letota Anutugö nahönböraturuᅇi akingö könaᅇi

asuhuyök. Jisösgö leson bohonji 5 mi kewö: 1) Boñ 5-7, 2) Boñ 10, 3) Boñ 13, 4) Boñ 18 aka 5) Boñ 24-25

Buk kiangö bahöñi bohonji 7 mi kewö:

Jisösgö amböskonurupñi aka ahuahunji 1.1–2.23

Jon O-melun azinöñ urugö nup meyök 3.1-12

Jisös o melun meiga Satanöñ esapköyök 3.13–4.11

Jisösnöñ Galili urunje qenjarök nup meyök 4.12–18.35

Jisösnöñ Galili mosöta Jerusalem anök 19.1–20.34

Sonda qöndökñi Jerusalem mala kömuyök 21.1–27.66

Kömupnöñhök wahöta mala Suepnöñ öngöyök 28.1-20

Jisös Kraistkö amböskon yengö qet arenj

Luk 3.23-38

¹ Jisös Kraistkö amböskon yengö qet arenjini kewö: Abrahamgö gwölönarökñi kun Deiwid. Deiwidkö gwölönarökñi kun Jisös.

² Abrahamgö nahönñi Aisak. Aisakö nahönñi Jeikob. Jeikobkö nahönurupñi Juda aka yangö darumunurupñi. ³ Judagö nahönyahöñi Perez aka Zera, namñiri Tamar. Perezgö nahönñi Hezron. Hezrongö nahönñi Ram. ⁴ Ramgö nahönñi Aminadab. Aminadabkö nahönñi Nason. Nasongö nahönñi Salmon. ⁵ Salmongö nahönñi Boaz, namñi kantri kungö ambinji Rahab. Boazgö nahönñi Obed, namñi kantri kungö ambinji Rut. Obedkö nahönñi Jesi. ⁶ Jesigö nahönñi kinj Deiwid. Deiwidkö nahönñi Solomon, namñi mutuk Uriagö anömña malök. Juda kinj pakpak mi Deiwidkö gwölönarökurupñi aka malget.

⁷ Solomongö nahönñi Rehoboam. Rehoboamgö nahönñi Abiya. Abiyagö nahönñi Asa. ⁸ Asagö nahönñi Jehosafat. Jehosafatkö nahönñi Jehoram. Jehoramgö nahönñi Usia. ⁹ Usiagö nahönñi Jotam. Jotamgö nahönñi Ahaz. Ahazgö nahönñi Hezekia. ¹⁰ Hezekiagö nahönñi Manase. Manasegö nahönñi Amon. Amongö nahönñi Josia. ¹¹ *Josiagö nahönurupñi Jekonia aka yangö darumunurupñi. Nalö mianğörej Babilon yeñon Israel könagesö enğuanğitketka Babilon anda kösö mire malmal ewö tandök welenqeçenina malget.

¹² Babilon kösö mire malmal ewö tandök mala mianğörej Jekoniagö nahönñi Sealtiel asuhuyök. Sealtielgö nahönñi Jerubabel. ¹³ Jerubabelgö nahönñi Abiud. Abiudkö nahönñi Eliakim. Eliakimgö nahönñi Azor. ¹⁴ Azorgö nahönñi Jadok. Jadokö nahönñi Akim. Akimgö nahönñi Eliud. ¹⁵ Eliudkö nahönñi Eleazar. Eleazargö nahönñi Matan. Matangö nahönñi Jeikob. ¹⁶ Jeikobkö nahönñi Josef, Mariagö apñi. Marianöñ Jisös meiga qetñi Kraist Amötqeçe Tonñi qerakzin.

¹⁷ Nalö Abrahamğörejök könahiba mala kotketka Deiwid asuhuyöhi, isik miengö jañgö areñi mi 14. Kunbuk kiñ Deiwidkörejök könahiba mala kotketka Israel könagesö enğuanğitketka Babilon anda kösö mire malmal ewö tandök malgeri, isik miengö jañgö areñi mi mewöyök 14. Babilon kösö mire malmal ewö tandök malgeri, nalö mianğörejök könahiba mala kotketka Kraist asuhuyöhi, isik miengö jañgö areñi mi mewöyök 14.

* **1:11:** 2 Kiñ 24.14-15; 2 Hist 36.10; Jer 27.20

Jisös Kraist mi kewö asuhuyök:

Luk 2.1-7

¹⁸ *Jisös Kraist asuhuyöhangö kösohotnji kewö: Yangö namnji Maria mi Josefbuk buñabuña mala mindimindiri qahö aka malohotka nalö miangören Uña Töröñan mem letot wanjiiga köröbuk mali könani mewö miwikñaiget. ¹⁹ Mewö miwikñaigetka azi buñani Josef yanjon malmal diñdini malöhangöra Mariagö könani aukne asuhui gamuñambuk akapuköra tököyök. Mewö tököba uruñan i ölöñ mosötmangö mötmöt areni alök.

²⁰ Mewö mötmöriba ahöiga Kembangö garata kunjan gaunöñ asuhum wanjiba kewö jiyök, “Josef Deiwidkö gwölönarökñi, Uña Töröñan mönö Maria letot wanjiiga köröñambuk malja. Miangöra gi mönö i örönöñ mirige kaba anömgï akñapkö keñgötki kude mötman. ²¹ *Marianöñ mönö morö nahön mema. Azi mianjön könagesöñi sinjisöndokñineyök amöt qem enjiiga solanime. Miangöra göñön qetñi Jisös qetman.” Mewö jiyök.

²² Kembangöñ kezapqetok azi kun sölölohöiga keu kun jiyöhi, mianjön öñambuk akñapköra yuai pakpak mi asuhuyök. Kezapqetok keu mi kewö, ²³ * “Ambi seram jömukñi kunöñ gölöñambuk aka morö azia meiga qetñi Imanuel qetme.” Qet miangö könani kewö, “Anutunöñ nembuk malja.”

²⁴ Josefnöñ imbiñi möta wahöta Kembangö garatanöñ jim kutum wanjiyöhi, mönö miangö dop aka Maria anömñi akñapköra wanjita miriñe anök. ²⁵ * Anda malohötmö, nalö sutñe miangören

* **1:18:** Luk 1.27 * **1:21:** Luk 1.31 * **1:23:** Ais 7.14 * **1:25:** Luk 2.21

mohotŋe qahö ahöyohot anda nahönŋi meiga Josefñöŋ qetŋi Jisös qerök. Morö meiga mianğö andöŋe awanöm malohot. Mewö.

2

Mötkutukutu azi wehön kotkotŋeyök kaget.

¹ Jisösnöŋ kiŋ kembu Herodkö nalöŋe Judia prowinsgö taon qetŋi Betlehem asuhuyök. Asuhuyöhi, nalö mianğöreŋ senğelaugö mötmöt azi wehön kotkotŋeyök Jerusalem sitinöŋ kaget.

² Kaba kewö qesiget, “Juda enğöreŋ kiŋ kembu akŋawi, morö mi asuhuba denike ahöza? Nini wehön kotkotŋe mala yaŋğöreŋ undi asuhui eka könaŋi mewö möta waikŋi memba möpöseibingöra kazin.”

³ Mewö qesigetka kiŋ kembu Herod aka Jerusalem könagesö yambuk malgeri, yeŋön körek pakpak keu mi möta auruget. ⁴ Aurugetka kiŋ Herodnöŋ keu ala könagesögö jike nup galöm bohonŋi aka Köna keugö böhi pakpak köl öröm enğii kaget. Kaba tokogetka kewö qesim enğiyök, “Amötqeŋe Tonŋi Kraistnöŋ mönö denike asuhumapköra jigetka ahöza?”

⁵ Qesim enğiiga kewö melen waŋgiget, “Yaŋön mönö Judia prowinsgö taon qetŋi Betlehem mianğöreŋ asuhuma. Mianğö keuŋi mi kezapqetok azi Maikanöŋ kewö ohoi ahöza,

⁶ *O Betlehem könagesö Juda gölmenöŋ maljei, enğö sutŋineyök kembu ketanŋi asuhuba nani Israel könagesö mindiŋgöba köyan köl neŋgima. Mianğöra inŋi Juda gölmegö

* 2:6: Mai 5.2

jitnememe yengö sutjine malgetka qetbuñaninan eretji qahöpmahöp akza.’ ”

⁷ Mewö melen wangigetka mötkutukutu azi mi ölöñ engoholi kagetka kewö qesim engiyök, “Undiñi mönö wani nalönöñ asuhui könahiba eket?” Mianğö könani törörök mötmangö möta mewö qesim engiyök. ⁸ Mianğö keuñi möta melaiba kewö jim kutum engiyök, “Inini mönö Betlehem anda morö mi törörök qesiba miwikñaiba mianğöreñök buzup keu algetka nöngöreñ kama. Nöñön mi möta mewöñanök anda i waikñi memba möpöseim wangimam.”

⁹ Kiñnöñ mewö munen jiba jim kutum engiiga möta könanöñ anget. Anda undi wehön kotkotje mala ekeri, mianjön nöropñine mutukmutuk ani mötötei-get Betlehem anda miri morö nahön ahöyöhi, mönö mianğöreñ kinök. ¹⁰ Undi mi kini eka sösöngai keta bölökñi aket. ¹¹ Sösöngai aka miri uruñe öngöba morö aka namñi Maria etkeket. I etkeka simin köla sipköba waikñi memba möpöseim wangiget. Möpöseim wangiba bayangösöñini qeañda mianğöreñök goul, jiniñ paura aka sanda qetñi mör mi uzeta kalem wangiget.

¹² Sunğem kun ahöget-ka Anutunöñ gaun kon-dela kiñ Herodköreñ kunbuk anbepukö qetal engiyök. Mianğöra köna kungenök nanñini miri gölmeñine lilingöba anget. Mewö.

Herodköra asamböta Josef anöm-moröñi Ijpt anget.

¹³ Mötkutukutu azi mienjön angetka Josefnöñ gaun ehiga Kembugöreñ garata kunñan asuhum

wanğiba kewö jii mörök, “Herodnön morö qei kömumapkö jarum wanğima. Mianğöra mönö wahöta morö aka namñi etkuangita ölöñ köla Ijpt kantrinön anme. Mianğoreñ anda malgetka bian nanak kamegö nalö jimami, mianğoreñ mönö lilingöba kame.”

¹⁴ Mewö jii möta wahöta sunğem mianğoreñök morö nahön aka namñi etkuangita Ijpt anget.

¹⁵*Ijpt anda malgetka kiñ Herodnön kömuiga nalö mianğoreñök lilingöba kaget. Mutuk Kembunön kezapqetok azi Hosea sölölohöiga keu kewö jii ahöza, “Nönön nahöni oholbiga Ijpt gölme mosöta kayök.” Kezapqetok keu mianjön mönö mewö asuhuiga öljambuk ahök. Mewö.

Morö azi Betlehem gölmenön enğuget kömuget.

¹⁶ Mötikutukutu azi mienjön Juda gölme ölöñ mosöta angetka Herodnön mianğö könani eka “Tilipköm ningiget,” jiba irimñi gwötpuk seheliiga jimkutukutu kewö alök, “Yarö azi, injini Betlehem aka gölme pakpak mi liliköba ahözawi, mönö mianğoreñ anda azi morö (yara) yambuñini yahöt aka mianğö bapne akzei, mi körek enğuget kömume.” Mötikutukutu azi undi asuhuyöhañgö nalögöra törörök qesim enğuiga jiget mörohi, mianğö dop morö azi yambuñinağöra jimkutukutu mi alök.

¹⁷ Kezapqetok azi Jeremaianön keu kun jii ahözawi, mianjön mönö mewö asuhuiga öljambuk ahök. Keu mi kewö,

¹⁸*“Silat mi Betlehem kösutneyök miri qetñi Rama mianğoreñök mötketka sahöt gilahöze.

* **2:15:** Hos 11.1 * **2:18:** Jer 31.15

Reizöl ambigö gwölönarökurup yeñön moröurupñini qahöwaketka ururen meze. Mianğöra sahötketka urukölalep mem enğibingö aketka urukondumök mörakze.” Mewö.

Ijpt mosöta Josef anöm-moröñi Nazaret lilingöget.

¹⁹ Josefnöñ Ijpt maliga kiñ Herodnöñ kömuiga mianğöreñök Kembugöreñ garata kunñan gaunöñ asuhum wañgiba ²⁰ kewö jiyök, “Morö qeget kömumapkö mönögeri, yeñön lök kömuget. Mianğöra mönö wahöta morö aka namñi etkuangita lilingöba Israel gölmenöñ anme.” ²¹ Mewö jiiga Josefnöñ wahöta morö aka namñi etkuangita lilingöba Israel gölmenöñ anget.

²² Könanöñ anda keu kewö mörök, “Herodkö nahönñi Arkelausnöñ iwiñangö salupñe Judia prowins galöm köla malja.” Mewö möta mianğöreñ anmamgö keñgötñi mörök. Möta mali Anutunöñ gaunöñ Galili prowinsnöñ anmegö jim kutum wañgiiga wahöta mianğöreñ anget.

²³ *Galili prowinsnöñ aņgota taon qetñi Nazaret mianğöreñ malget. Mewö malgetka kezapqetok azi yeñön Amötqeqe Tonğöra keu jigeri, mianñön öljambuk ahök. Keu mi kewö, “Yañgö qetñi mi Nazaret azi qeta malme.” Mewö.

3

Jon O-melun azinöñ Jisösgö köna mesarök.

Mak 1.1-8; Luk 3.1-18; Jon 1.19-28

¹ Yambu tosatñi teköiga Jon O-melun azinöñ kaba Judia prowinsgö gölme qararañkölkölñe

* 2:23: Mak 1.24; Luk 2.39; Jon 1.45

liliköba ambazip uruñini Buña keunöñ kuñguba kewö jiba malök, ² **“Suep Toñan bemtohoñi almawañgö nalöñan lök kam kuñguza. Miangöra mönö uruñini melenða miangöreñ añgotket.”* ³ **Jongöra kezapqetok azi Aisaianöñ keu kun kewö jiba ohoyök, “Kolek garata kunöñ gölme qararañkölkölñe qeta maliga anda jölñi kewö mötme, ‘Kembunöñ kamawo! Miangöra mönö jöjöröba könañi mesatket. Mönö uruñini mindiñgöba könañi köl diñgiba qölöleiget.’ ”*

⁴ **Jongöreñ maluku mi kamel jupñan memeni aiga kemañe örigit sömbup silenñan memeni mi jöhöba malök. Nenañamñi mi gawöt jinam aka arökñañgö moroñ onji. Mi pakpak kezapqetok azi Elaija (Elia) yañgö dowä. ⁵ Jonöñ nupñi meiga ambazip kambuleleme yeñön Jerusalem siti aka Judia prowinsgö miri tosatñi pakpak miengöreñök yañgöreñ öröba kaget. Mewöñanök Jordan o likep-likep miri pakpak tat angeri, miengöreñök kaget. ⁶ Kaba kañgota siñgisöndokñini jim miwikñaigetka Jonöñ i Jordan o töwatñe o melun mem enñiyök.*

⁷ **Mem enñiyökmö, Farisi (Köna keugö kapañkölköl) aka Sadyusi (Jike nupkö kapañkölköl) ambazip gwötpukñan o melun mem enñimapköra kagetka enñeka yeñgöra kewö jiyök, “O qatö moröñi, iñini uruñini qahö melengetka Anutugö irimñan seholiiga likepñi melen enñimamgö akza. Mi ölöñ kölbingö goro keuñi mi mönö dañön jii mötä sömbuñini mötä ki kaze? ⁸ Miangöra mönö öññanök uruñini melenme.*

* **3:2:** Mat 4.17; Mak 1.15 * **3:3:** Ais 40.3 * **3:4:** 2 Kiñ 1.8

* **3:7:** Mat 12.34; 23.33

Bölönamñineyök lilingögetka ölni asuhui mi mönö ahakmemenjanan aukñe kondela malme.

9 **“Uruñine möndömöndö keu kewö jibingö kude mötmörime, ‘Neñön mönö Abrahamgö gwölönarökña malinga Anutunöñ qahö ayuhum neñgima.’ Mewö jiba töptöpñine qemakzemö, ölni mi qahö ahakze. Nöñön mianğöra kewö jibi mötket, Anutunöñ köt ki ölop jim kutum enğiiga letota Abrahamgö gwölönarökurupñi aka Anutu möpöseimakñemö, inñini denöwö?*

10 **“Uruñini qahö melenme ewö, Anutunöñ mönö inñini ip ewö tenğori etpingö akze. Ip pakpak kötni ölopñi qahö kuñgumakzei, mi mönö köli etket könöpnöñ gili geme. Ip mewöñi kölmamgö kesinji lök jitñi sañe ala ip könaje ali jöjöröba ahöza. Anutunöñ mönö bölönamñinağö likepñi melen enğima.*

11 *“Nöñön inñini uruñini melenmeağöra o töhönöñ melun mem enğizalmö, nöngö andöne azi kukösumñi köhöikñi kun kama. Yağö kukösumñi öngöngöñan mönö nöngöreñ onğitma. Yañön azi öngöngöñi akñawağöra nöñön yağö köna esuñi bauköba gösönöñ löngöta tenğömamgö qötötanğömam. Yañön mönö Uña Töröñi uruñine ali könöp bölamñan köl könjörat enğiiga mewö mianñön melun mem enğima.*

12 *“Yañön ölni aka kamböñi menden etkimamgö sapakñi memba kağgota uba qörörengöba kewötma. Kewöta wit kötni tokoba köweñe almapmö, kamböñi aka gwaugulapñi mi mönö usuñniga könöpnöñ geba teteköñi qahö jema.” Mewö.*

* **3:9:** Jon 8.33 * **3:10:** Mat 7.19

Jonöŋ Jisös o melun mem waŋgiyök.

Mak 1.9-11; Luk 3.21-22

¹³ Nalö mianğöreŋ Jisösnöŋ Galili prowins mosöta Jordan o töwatŋe Jongöreŋ kaba o melun mem waŋgimapköra qesiyök. ¹⁴ Qesiyökmö, Jonöŋ qetal waŋgiba kewö jiyök, “Göŋön ölop ni o melun mem niŋgibanakmö, göŋön siŋgisöndok qahö aka mönö denöwögöra nöŋgöreŋ kazan?”

¹⁵ Mewö jiiga Jisösnöŋ kewö melenök, “Nalö kewöŋe mi ölop akŋan. Mewö akziga mianön Anutunöŋ ahakmeme diŋdiŋi wuatangöbingö keu jiyöhi, mianğö ölni asuhuiga dop kölma.” Mewö jiiga Jonöŋ möri dop kölga urumohot ahök.

¹⁶ Urumohot aka o melun mem waŋgii teköiga mianğöreŋök onöhök koriga kewö asuhuyök: Suepnöŋ aŋaŋiiga Jisösnöŋ uba ehiga Anutugö Uŋa Töröŋan melenđa kembö nei ewö aka Jisösgö qakŋe eta meyök. ¹⁷* Eta meiga Suepnöhök qet kun kewö asuhuyök, “Yaŋön mönö nani wölböt nahöna aiga köröni ölöwahiga eknahöm ak waŋgizal.” Mewö.

4

Satanöŋ Jisös esapköba malök.

Mak 1.12-13; Luk 4.1-13

¹ *Mianğö andöŋe Uŋa Töröŋan Jisös kuŋgum waŋgiiga gölme qararaŋkölkölŋe Bölöŋaŋgö Tonjan esapköm waŋgimapköra aka anök. ² Mianğöreŋ anda suŋgem asak 40 Anutugöra nene siŋgi mala nenegö kömuyök. ³ Nenegö kömuiga öme bohonŋini qetŋi esapesap Tonji yaŋön asuhaba kewö jiyök,

* **3:17:** Jen 22.2; Sum 2.7; Ais 42.1; Mat 12.18; 17.5; Mak 1.11; Luk 9.35

* **4:1:** Hib 2.18; 4.15

“Gi Anutu Nahönña akzan ewö, mi mönö kondela köt ki jim kutunönnga letota beret aketka neman.”

⁴*Mewö jiyökmö, Jisösnönj keu kewö melennök, “Qahö! Buña Kimbinönj keu kun kewö ohoget ahöza, ‘Nenenöhök ambazip malmal qahö nenjimakzapmö, Anutugö jitneyök keu kamakzawi, mi pakpak tem kölinga mianön mönö gumohom nenjiiga köhöiba maljin’.”

⁵ Mewö jiiga Bölönangö Toñan Jisös wanğita Jerusalem siti töröñe anda jöwöwöl jikegö boñe euyangöreñ öngöba ali kinök. ⁶*Mewö kiniga kewö jii mörök, “Gi Anutugö Nahönña akzan ewö, mönö kianğöreñök luhuba emu geman. Buña Kimbinönj keu kun kewö ohoget ahöza, ‘Anutunönj göhöra aka garataurupñi jim kutum enjiiga ölop kököbihigetka geba kötnönj könage qahö guhum qizit akña.’ Mianğöra geba kude ayuhuman.”

⁷*Mewö jiiga kewö melennök, “Qahö! Buña Kimbinönj keu kun mewöyök kewö ahöza, ‘Gi mönö Kembugi Anutu kude esapköm wanğiman.’ ”

⁸ Mewö jiiga Bölönangö Toñan kunbuk wanğita kundunji köröp tiñtiñi kunönj öngöba gölme pakpak yenğö kantri tohoñi tohoñi aka miengö inap yuainjini aködamunñinambuk pakpak kondel wanğiyök. ⁹ Kondel wanğiba kewö jiyök, “Gönön simin köl niñgiba waikni memba möpöseim niñgiman ewö, nöñön öroyuai pakpak ki mönö tököm gihibi buña qem anğuba galöm köl enğiman.”

¹⁰*Mewö jiiga Jisösnönj kewö jii mörök, “Qahö! Satan gi mönö kesalnönj. Buña Kimbinönj keu

* **4:4:** Dut 8.3 * **4:6:** Sum 91.11-12 * **4:7:** Dut 6.16 * **4:10:** Dut 6.13

kun kewö ohoget ahöza, ‘Gi mönö Kembugi Anutu, ia mohot simin köl waŋgiba waikŋi memba möpöseiman’.”

¹¹ Mewö jiiga Bölöŋaŋgö Toŋan mianğöreŋök Jisös mosöta kesalök. Mewö aiga garata yeŋön kaba Jisös bauköm waŋgiget. Mewö.

*Jisösnöŋ könahiba Galili uruŋe urugö nup meyök.
Mak 1.14-15; Luk 4.14-15*

¹² *Mianğö andöŋe Jon O-melun azi kösö mire * alget tari Jisösnöŋ mi möta Judia prowins mosöta Galili anök. ¹³ *Anda prowins mianğöreŋ miriŋi Nazaret mosöta Kaperneam anda malök. Kaperneam siti mi Zebulun aka Naftali gölmenöŋ Galili o aŋgö qöhöröŋe ahöza. ¹⁴ Mianğöreŋ mala nupŋi meiga Anutunöŋ keu kun kezapqetok azi Aisaia sölölohöiga jiyöhi, mianjön öljambuk ahök. Keu mi kewö,

¹⁵ *“Ambazip Zebulun gölmenöŋ aka Naftali gölmenöŋ Jordan likepŋe malgetka sutŋine köna namŋi köwetnöŋ göröken anda kinjawi aka Juda qahöpmö, kambu tosatŋan Galili prowinsnöŋ maljei,

¹⁶ könagesö mienön söŋaupnöŋ mala asakŋi ketanŋi ekŋe. Kömupnöŋ ambazip aum köl eŋgiiga pandaman gölmenöŋ maljei, yeŋgöra mönö miri waŋgaran suruma.”

* **4:12:** Mat 14.3; Mak 6.17; Luk 3.19-20 * **4:12:** Kiŋ Herodnöŋ ambi kun ölöŋ meiga Jon O-melun azinöŋ i mianğöra jim waŋgiiga irimŋi sehölii jiiga opotöröp yeŋön Jon jöhöba kösö mire alget tarök.

* **4:13:** Jon 2.12 * **4:15:** Ais 9.1-2

17 *Jisösnöŋ Kaperneam mala nalö miangöreŋök könahiba Buŋa keuŋi jim asariba ambazip uruŋini kuŋguba kewö jiba malök, “Suep Toŋan bem-tohoŋi almawaŋgö nalöŋan mönö kam kuŋguza. Miangöra mönö siŋgisöndok malmalŋini mosöta uruŋini melenget.” Mewö.

Jisösnöŋ gwarekurupŋi mutukŋi eŋgoholök.

Mak 1.16-20; Luk 5.1-11

18 Mewö jiba liliköba mala Galili o aŋgögö göraŋe mötöteiba anda darumun yahöt Saimon qetŋi alaŋi Pitö aka munŋi Andru etkehök. Yetköŋ söra örörö azia mala mösakŋiri o aŋgönöŋ söra öröbitköra gila malohot. 19 Jisösnöŋ etkeka kewö jiyök, “Aziyahöt, iŋiri mönö ni nuatangöba kayohotka kusum etkibi ambazip söra ewö öröm eŋgimakŋahot.” 20 Mewö jiiga miangöreŋök mösakŋiri mosöta könahiba Jisös wuatangöba anohot.

21 Jisösnöŋ yetpuk borom kun toroqeba anda kunbuk darumun yahöt Zebedigö nahönyahötŋi Jeims aka Jon etkehök. Yetköŋ iwiŋiri Zebedibuk waŋgenöŋ tata mösakŋini möhamgöba jöhöba malgetka eŋgeka etkoholök. 22 Mewö eŋgeka etkoholiga miangöreŋök wahöta waŋge aka iwiŋiri mosöta könahiba Jisös wuatangöba andöŋe anohot. Mewö.

Jisösnöŋ ambazip kusum eŋgiba mem ölöwak eŋgiyök.

Luk 6.17-19

23 *Jisösnöŋ anda Galili prowins uruŋe lökŋanök liliköba köuluk miriŋine öŋgöba bemtohoŋgö

* 4:17: Mat 3.2 * 4:23: Mat 9.35; Mak 1.39

Ölöwak Buñani jim asariba uruñini kuñguba kusum engiba malök. Mewö aka sutñine ambazip kawöl aka jepajerepe könañi könañi engöhöi malgeri, mi mem ölöwak engiba malök.

²⁴ Mewö memba maliga Jisösgö qetbuñan sehiba Siria kantri dop köl teköba anök. Mewö ani mi möta kawöl ambazip pakpak enğuangita yangören kaget. Tosatñan uzi kawöl aka jepajerepe könañi könañi engöhöi malget. Tosatñan ömewörömenöñ uruñine geiga töñöt me kölköljinjinbuk malget. Tosatñan tala eta enğuiga bözok mitiba semben auba malget. Tosatñan sileninañgö likepñi kömukömuñi malget. Mewö mewöñi mienön Jisösgören kagetka mem ölöwak engiyök.

²⁵ Mewö ak enğiiga ekerangöra ambazip könagesö ketani yeñön Jisösgö andöñe wuatangöba kaget. Kambu ketani ketani mi Galili prowins aka Ten Taon distriknöhök kaget. Kambu tosatñan Jerusalem siti aka Judia prowinsgö miri tosatñeyök kaget. Kambu tosatñan Jordan o likepñeyök kaget. Mewö.

5

Jisösnöñ kundunje kindä kusum engiyök.

¹ Jisösnöñ ambazip kambu ketani engeka kundunje öngöba tariga gwarekurupñan kañgota liliköm wañgiget. ² Liliköm wañgigetka könahiba ambazip kambuñi kambuñi kusum engiba kewö jiyök.

Denike yeñön simbawon akze?

³ “Denike yeñon Anutugö jeñe etqeçenji tandök mötzei, yeñon Suepkö bemtohoñi buña qem aņgumeañgöra mönö simbawoñ akze.

⁴ *Denike yeñon jingey köla sahötzei, Anutunöñ i urukölalep eņgimapköra mönö simbawoñ akze.

⁵ *Denike yeñon guñböñjönjön malakzei, Anutunöñ gölme ki mi yeñgöra eņgii buñañina akñapköra yeñon mönö simbawoñ akze.

⁶ *Denike yeñon Anutugö jeñe solanibingöra kapañ köla mi nene aka ogö ewö kömumba qemjen qeba maljei, Anutunöñ mönö sihimñini mi gumohom eņgima. Mianğöra yeñon mönö simbawoñ akze.

⁷ Denike yeñon tosatñi ak kömum eņgimakzei, Anutunöñ i ak kömum eņgimapköra yeñon mönö simbawoñ akze.

⁸ *Denike yeñgö uruñinan sarakñi akzawi, yeñon ölop Anutu ekñe. Mianğöra yeñon mönö simbawoñ akze.

⁹ Denike yeñon luai qemakzei, yeñgö qetñini mi Anutugö nahönböraturupñi qetme. Mianğöra yeñon mönö simbawoñ akze.

¹⁰ *Anutunöñ keuñini jim teköi solanizeañgöra sesewerowo ak eņgimakzei, yeñon Suepkö bemtohoñi buña qem aņgume. Mianğöra yeñon mönö simbawoñ akze.

¹¹ *Ambazipnöñ iñini nöñgöra aka uruqeçe keu töhöreñ jim eņgiba sesewerowo aka keu bölöñi könañi könañi silenjine ala muneñmuneñ jimakzei, eñon mönö simbawoñ akze.

* 5:4: Ais 61.2 * 5:5: Sum 37.11 * 5:6: Ais 55.1-2 * 5:8:

Sum 24.3-4 * 5:10: 1 Pitö 3.14 * 5:11: 1 Pitö 4.14

12 *Mötket, Anutunöŋ töwaŋini öŋgöŋgöŋi Suep mire ali ahözawaŋgöra mönö gönköiraŋ ala sösöŋgai aka malme. Mi kewögöra: Kezapqetok ambazip mutuk malgeri, mi sesewerowero tandökŋi mewöŋanök ak enġigetka eŋön yeŋgö andöŋjine asuhuba yembuk öröröŋ malje.” Mewö.

Inġini gölmegö sihi aka kiwa ewö akze.

Mak 9.50; Luk 14.34-35

13 Jisösnöŋ jiyök, “Inġini gölme ambazip yeŋgö howe tandök akzemö, howe nahömŋan piahima ewö, mi mönö denöwö möhamgöinga kunbuk nahömŋambuk akawak? Mianġö könaŋi kun qahö. Toroqeba yuai kungöra qahö dop kölmapmö, mi nesak ewö gilget geiga ambazipnöŋ mi könaŋinan tiahöme.

14 *“Inġini gölmeŋi gölmeŋi yeŋgö kiwa tandök ewö aka malje. Siti kun kunduje öŋgöba meget tatzawi, mianġön tölapŋe tatmamgö osimakza.

15 *Kunŋan kiwa ohotiriba kumbut bapŋe qahö almapmö, kiwagö dum tatatŋe ali tatma. Mewö tata asariġa ambazip miri uruŋe maljei, mönö körek yeŋgö jeŋjini kuŋguiga asakŋi ehakŋe.

16 *“Mewöŋanök mönö enġö asakŋini kondelgetka ambazip sutŋine asariġa ehakŋe. Ambazipnöŋ ahakmemeŋini ölöpŋi eka mianġöra lwiŋjini Suep mire maljawi, mönö i möpöseiba malme.” Mewö.

Jisösnöŋ Köna keuġ könaŋi kusum enġiyök.

* 5:12: 2 Hist 36.16; Apo 7.52 * 5:14: Jon 8.12; 9.5 * 5:15: Mak 4.21; Luk 8.16; 11.33 * 5:16: 1 Pitö 2.12

17 “Nöñön Mosesgöreñ Köna Keu aka kezapqetok ambazip yeñgö Buzup Kimbiñini mi qeapkömamgöra aka qahö kaba maljal. Mewö lañ kude mötmörime. Nöñön qeapkömamgöra qahöpmö, keu mi tem köl teköbi mienjö ölninan pöndañ asuhumapköra aka kaba maljal. 18* Nöñön keu ölni kun kewö jibi mötket, Mosesgö Köna keunöhök kulem moröñi morö közömñi kun me kirifi ohohogö jönbölanñi mohok-kun mi qahö kötökñi ayapkömapmö, keu pakpak mi mutuk ölninambuk asuhugetka Suep gölme yetkön göröñ qemahot.

19 “Miañgöra kunñan Köna keugö jimkutukutu morörökñi mienjöreñök keu kun koyonaniba ambazip mewö kusum enjimakzawi, yañön Suepkö bemtohoñe angoriga qetñi morörökñi bezup qetme. Mewö qetmemö, kunñan mi tem köla wuatangöba ambazip mewö kusum enjimakzawi, yañön Suepkö bemtohoñ uruñe angoriga qetñi ketañamnini qetme.

20 “Nöñön miañgö dop kewö jibi mötket: Enjö ahakmemenini solanñi miañön mönö Köna keugö böhi aka Farisi (Köna keugö kapankölköl) yeñgö silikñini tandök ewö öröröñ akapuk. Silikñinan yeñgö silikñini gwötpuk qahö ongitma ewö, enñön mönö Suepkö bemtohoñ uruñe qahö angotme.” Mewö.

Yom kazik aka enjuget kömukömuğö könañi.

21* Jisösnöñ toroqeba jiyök, “Enñön möpneyök keu kun kewö jiget mötzema, ‘Ambazip kun kude qeget

* 5:18: Luk 16.17 * 5:21: Eks 20.13; Dut 5.17

kömuma aka kunñan kazikñi qei kömumawi, i mönö distrikö keu jakeñe algetka keuñi jim teköme.’

22 “Mewö jiget mötketmö, nöñön keu mi kewö jim tuaribi mötme: Kunñan alañambuk anğururuk aka irimñan sehooli yom kazik akzawi, i mönö mewöyök distrikö keu jakeñe al wañgiget keuñi jim tekömeañgö dop akza. Mewöñanök kunñan alañi jijiwilit keunöñ jim böliba ‘Gi uruqahö akzan,’ jizawi, i mönö kantrigö jike kaunsöl yengö jeñine al wañgiget keuñi jim tekömeañgö dop akza. Kunñan alañi lösö keunöñ jim böliba ‘Gi anğöjörakabuk akzan,’ jizawi, yañön mönö könöp sianöñ gemawañgö dop akawak.

23 “Miañgöra göñön kalem naluki memba kaba altanöñ almamgö aknöñga miañgöreñ keu kewöñan mötmötke kañgotpawak: Alagahö uruñe keu ahöi yañön kazik ak gihimamgö mötza. Keu mewöñi mötmöriman ewö, 24 kalemgi mi mönö alta wösöñe ala mutuk alagahöreñ anda yambuk keuñiri jim solaniba urumohot aka miañgö andöñe kunbuk kaba kalem naluki Anutugöra alman.

25 “Kerökan silege ala keu jakeñe öröm gihimamgö aiga komitigöreñ anda köna namñe miañgöreñ mönö kapan köla imbi mohot aka keuñiri jim solanimahot. Mewö qahö akñahot ewö, kerökan ölop örörahöm gihiiga (jas, majistreit) jimtekötekö tonañgö jeñe anğotnöñga möta jii opotöröpkö böröñe genöñga kösö mire al gihibapuk. 26 Nöñön keu ölni kewö jibi mötnöñ, Gi miañgöreñ töwagi pakpak almanañgö dop qaköba tatman. Toiyagi kondikñi mewöyök al teköbagun mönö töwagi memba etman.” Mewö.

Sero yoŋgorögö könaŋi

27 **“Keu kun kewö jiget mötzema, ‘Sero yoŋgorö kude akŋan.’* 28 *Mewö jiget mötketmö, nöŋön keu mi kewö jim tuaribi mötme: Kunŋan serogö sihim kömbönaŋi qakŋe ambi uba ekzawi, yaŋön lök uruŋan yambuk sero yoŋgorö akza.*

29 **“Jegi ölnan siŋgisöndok akŋangö kölgorom ak gihima ewö, mi mönö qözöla gilnöŋ anma. Sile kitipki kunŋan ayuhui mewö Suepnöŋ öŋgönöŋga dop kölmäpmö, silegi jömukŋi malnöŋga gil gihigetka könöp sianöŋ geba ayuhubanbuk.*

30 **“Börögi ölnan siŋgisöndok akŋangö kölgorom ak gihima ewö, mi mönö yandiba gilnöŋ anma. Sile kitipki kunŋan ayuhui Suepnöŋ öŋgönöŋga dop kölmäpmö, silegi jömukŋi mala könöp sianöŋ geba ayuhubanbuk.”* Mewö.

Awanöm aŋgömosötmosötkö könaŋi

31 **“Keu kun kewö jiget ahöza, ‘Kunŋan anömŋi mosötmawi, yaŋön mönö aŋgömosötmosöt papia ohoba anömŋi waŋgima.’* 32 **Mewö jiget ahözäpmö, nöŋön kewö jibi mötme: Kunŋan anömŋi qesabulum aiga mosötpawakmö, könaŋi kungöra anömŋi mosöt-mawi, mewö miaŋön mönö anömŋan qesabulum akŋapkö kondota siŋgisöndökö keuŋambuk akŋa. Mewö aiga azi kunbuk meiga azi döläkŋi miaŋön mönö mewöyök qesabulum akŋa.”* Mewö.

Keuŋini jöjöpaŋ keunöŋ kude jim köhöime.

* 5:27: Eks 20.14; Dut 5.18 * 5:29: Mat 18.9; Mak 9.47 * 5:30: Mat 18.8; Mak 9.43 * 5:31: Dut 24.1-4; Mat 19.7; Mak 10.4
* 5:32: Mat 19.9; Mak 10.11-12; Luk 16.18; 1 Kor 7.10-11

33 **“Keu kun mi mewöyök möpneyök kewö jiget mötzema, ‘Keuñini jöjöpañ keunöñ jim köhöigeri, mi mönö kude ongitme. Kembangöra yuai akingö keuñini jöjöpañ keunöñ jim jöhögeri, mi mönö wu-atanğögetka ölnambuk akña.’*

34 **“Mewö jiget mötketmö, nöñön keu mi kewö jim tuaribi mötme: Keuñini mönö jöjöpañ keunöñ qahöpmañ jim köhöime. Suet mi Anutugö jakömbuak dumñi akzawangöra aka keu kewö kude jime, ‘Keu ölni qahö jimam ewö, Suet Tonjan ölop likepñi meleni qakne öngöma.’*

35 **“Gölme mi Anutugö könañangö döpnü akzawangöra aka keu kewö kude jime, ‘Keu ölni qahö jimam ewö, gölmenöñ ölop tingita turum niñgima.’ Jerusalem mi Kiñ Tök-kutukutuñangö sitiñi akzawangöra aka keu kewöñi mi mewöyök kude jime, ‘Keu ölni qahö jimam ewö, Kiñ Ketani yañön ölop qemasolokepñangö likepñi meleni qakne öngöma.’* 36 *Gi nörop jupki injañi menöñ tuatñi akñapkö osiman aka nörop jupki tuatñi menöñ injañi akñapkö osiman. Mianğöra keu kewö kude jiman, ‘Keu ölni qahö jimam ewö, Anutunöñ ölop nöropni qeiga jupñangö mundañan uteköma.’* 37 *Jöjöpañ keu kude jimemö, on-keugöra mönö ‘On!’ jime aka qahö-keugöra ‘Qahö!’ jime. Keu diñdiñi mianğoreñ keu yuai toroqemei, mi mönö Bölöñangö Tonjan sölölohöm engii asuhuma.” Mewö.*

Jinöñ jibi aknöñ aki mi kude akña.

Luk 6.29-30

* 5:33: Lew 19.12; Jan 30.2; Dut 23.21 * 5:34: Jei 5.12; Ais 66.1;

Mat 23.22 * 5:35: Ais 66.1; Sum 48.2

38 **“Keu kun kewö jiget mötzema, ‘Kunñan jegi qösökömawi, gi mönö kitipñi melenđa yanğö jeñi qösököman. Kunñan jitki kumburatimawi, gi mönö kitipñi melenđa yanğö jitñi kumburatiman.’*

39 *“Mewö jiget mötketmö, nöñön keu mi kewö jim tuaribi mötme: Kunñan bölöñi ak engimawi, i mönö kude qetala tuarenjon ak wañgime. Mewö qahöpmö, nuñgulungi öñi qekötahöma ewö, mönö nuñgulungi likepñi mewöyök qekötahömapköra melenđman. 40 Kunñan ‘Sileötanđi memam,’ jiba keunöñ al gihimangö mötza ewö, mönö mosöta malukugi qakñi mewöyök wañginöñga buña qem añguma.*

41 *“Mewöyök kunñan gösöñi kilomita (mail) mohotkö dop siriba anmangö kuñgum gihima ewö, mönö ölop tem köla kilomita (mail) yahötkö dop siriba yambuk anman. 42 Kunñan göhöreñ yuai kungöra qesim gihimawi, mi mönö wañgiman. Kunñan ‘Yuai niñginöñga kitipñi bian melenđmam,’ jiba qesim gihimawi, i mönö andö kude qeman.” Mewö.*

Kazikurupki mönö urugan jöpaköm engiman.

Luk 6.27-28, 32-36

43 **“Keu kun kewö jiget mötzema, ‘Ambazip kösutñine mala alaurupñini akzei, mi jöpaköm engimakñemö, kazikurupñini mönö melenđa kazik ak engiba malme.’*

44 *“Mewö jiget mötketmö, nöñön keu mi kewö jim tuaribi mötme: Inini mönö kazikurupñini jöpaköm engiba kinda sesewerowero ak engimakzei, yeñgöra mönö köuluköba malme. 45 Mewö ahakñe*

* 5:38: Eks 21.24; Lew 24.20; Dut 19.21 * 5:43: Lew 19.18

ewö, mewö mianjon Iwiñinan Suep mire maljawi, mönö yangö könañi kondela nahönböراتورupñi aka malme. Yangö könañi kewö: Yanjon wehönñi qahö angön köliga kota ambazip ölopñi aka bölöñi mewöyök mem asarim engiba kie aliga ambazip diñdiñi aka gonjonñi yengö nupñini mewöyök mem kelörakza.

⁴⁶ “Enjon mönö niñginöñ gihibigö tandökñi ongita Anutugö könañi kondela ahakñe. Takis tilipqilipñinambuk megetka sisitñini memakzei, yenon alaurupñinan jöpaköm engigetka i melenđa jöpaköm engimakze. Mi urumelenğö silikñi qahö. Inini yengö silik miyök wuatangöba ahakñe ewö, Anutugöreñ tosa kun qahö ahuiga yanjon mönö silikñinanğö likepñi qahö engiiga töwa kun qahö buña gem angume. Mianğöra mönö ambazip körek pakpak jöpaköm engiba malme.

⁴⁷ “Urumelenğö kopa ambazipnön mewöyök sutñine jölönini jim anguba maljemö, mi urumelenğö aiwesökñi qahö. Inini yengö dop alaurupñini engö sutñineyök jölönini jim angumakñe ewö, mewö mönö kopa ambazip ewö akze. Kopa ambazip yengö silikñini mönö ongita qetpuk sorokñi aka malme? ⁴⁸ *Engö Suep Iwiñinan aködamun sorokñi akzawi, enon mönö mianğö dop aködamun sorokñinambuk aka malme.” Mewö.

6

Mözöqözörön ambazip mi kalem engimakñe.

* **5:48:** Lew 19.2; Dut 18.13

1 *Jisösnöŋ kewö kusum enġiyök, “Mönö kewögöra galöm mem anġuba malme: Ahakmemeŋini solanŋi diŋdiŋi mi ambazipnöŋ eka enġöra mötket öngömapkörä aka kude ahakŋe. Mewö ahakŋe ewö, enġö Iwiŋini Suepnöŋ maljawanön mönö silikŋinanġö likepŋi qahö enġiiga töwa qahö buŋa qem anġume.

2 “Mianġöra ‘Mözöqözöröŋ ambazip kalem enġimam,’ jiba mi qenjaröknoŋ kömam tömunbuk uba kolek almegöra kude akŋan. Urumelenġö silesile ambazip yeŋön ambazipnöŋ miwidimġöm (mem biwim) enġimegöra möta köuluk mire aka köna namŋe anda ambazip enġeka mewö ahakze. Nöŋön keu öl töhöŋŋi kun kewö jibi mötme, Yeŋön mönö silikŋinanġö töwanŋi pakpak lök buŋa qem anġugetka Suep Toŋan mi qahö toroqema.

3 “Göŋön mewö kude akŋanmö, ‘Mözöqözöröŋ ambazip kalem enġimam,’ jiba börögi ölnan denöwö akzawi, börögi qaniŋan mi kude mötma.

* 4 Kalemgi mianön tölapŋe ahöiga Iwigan ahakmeme tölapŋi ehakzawi, yanön mönö töwa gihima.” Mewö.

Köuluk nupkö könaŋi kewö:

Luk 11.2-4

5 * “Mianġöra Anutugö köulukömei, mi mönö urumelenġö silesile ambazip yeŋö dop kude akŋe. Yeŋön ambazipnöŋ enġekŋegöra möta sihimŋinan köuluk mire aka köna soŋanöŋ kindä

* **6:1:** Mat 23.5 * **6:3:** Börögi qaniŋan mi kude mötma, keu mianġö könaŋi kewö: Mi mönö tölapŋe aknöŋga wölböt alagan mewöyök mi kude mötma. Anutunöŋ sölölohöm gihiiga nup ölöpŋi anġeba memakzani, mi mönö nangak ölum guhumakza. * **6:5:** Luk 18.10-14

köulukömakze. Nöñön keu öl töhöññi kun kewö jibi mötme, Yeñön mönö silikñinañgö töwañi pakpak lök buña qem angugetka Suep Toñan mi qahö toro-qema.

⁶ “Göñön mewö kude akñanmö, ‘Anutugö köulukömam,’ jiba mönö nangi miri uruñi moröñe öñgöba nañgu köla Iwigi tölapñe maljawi, i köuluköm wañgiman. Mewö akñöñga Iwigan ahakmeme tölapñi ehakzawi, yañön mönö töwa gihima.

⁷ “Köulukömei, miangörej mönö urumelenğö kopa ambazip yeñgö tandök ewö † keu oyoñdewetdewet mi kude jiba malme. Yeñön keu jiti sehisehiñi jigetka Anutunöñ miangöra aka kezap ala möt eñgimapkö mötmörimakze. ⁸ Mönö kewögöra yeñgö dop kude aka malme: Inini wani yuaigöra osiba mözöqözöröñ akzei, Iwiñinan mi qahö köulukögetka qeljiñe lök mötza. ⁹ Mönö kewö köulukömakñe:

“Neñgö Iwinini, gi Suepnöñ maljan. Göhö qetki mönö töröñi ahöma.

¹⁰ Mönö galöm köl neñginöñga bemtohoñgahö ölni asuhuma.

Göhö jitsihitki Suepnöñ tem kölakzei, mewöñanök mönö gölmenöñ asuhuma.

¹¹ Merakö neneñi mönö dopnine neñgiman.

¹² Tosatñi yeñgörej tosa neñgörej ahözawi, nini mi mosöt eñgizin ewö, gi mönö miangö dop neñgö tosanini sañgoñman.

† **6:7:** Kian kantri yeñön Anutu qahö möt wañgiba bemñini murutñi murutñi köuluköba keu omanji oyoñdewetdewet mi lañ jiba malje.

13 Esapesapnöh et neŋgubapuköra mönö aŋgön köl neŋgiba Bölöŋi Toŋaŋgö böröneyök † meköm neŋgiman. (Gi nangak bemtohoŋ Toŋi, kukösum Toŋi aka asakmararaŋ Toŋi mi nalöŋi nalöŋi mala kota malnöŋ aka teteköŋi qahö mal öŋgöman. Mi ölja.)

14* Inini ambazip yeŋgö siŋgisöndokŋini mosötme ewö, eŋgö Suep Iwiŋinan mönö mewöyök eŋgö siŋgisöndokŋini mosötma. 15 Mosötmapmö, ambazip yeŋgö siŋgisöndokŋini qahö mosötme ewö, eŋgö Iwiŋinan mönö mewöyök eŋgö siŋgisöndokŋini qahö mosötma.” Mewö.

Nenegö siŋgi malmal mi kewö ahakŋe:

16 “Nenegö siŋgi malmei, miangöreŋ mönö urumelenö silesile ambazip ewö kukbosole kude aka malme. Yeŋön Anutugöra nene siŋgi malakzei, ambazipnöh mi ekŋegöra aka zoloŋ örögetka jemesoholŋinan mölmölimakza. Nöhön keu öl töhöŋŋi kun kewö jibi mötme, Yeŋön mönö silikŋinaŋgö töwaŋi pakpak lök buŋa qem aŋgugetka Suep Toŋan mi qahö toroqema.

17 “Göhön mewö kude akŋanmö, Anutugöra nenegö siŋgi mala miangöreŋ mönö sinim jupuknöŋ me saipenöh jemesoholgi saŋgoŋda nörop jupki qeba malman. 18 Mewö aka nenegö siŋgi malnöŋga ambazipnöh qahöpmö, Iwigi tölapŋe maljawaŋön mi ekŋa. Mewö aknöŋga Iwigan ahakmeme tölapŋi ehakzawi, yaŋön mönö töwa gihima.” Mewö.

† **6:13:** “Bölöŋi Toŋaŋgö böröneyök meköm neŋgiman,” tosatŋan keu mi kewö melenje: bölöneyök meköm neŋgiman. * **6:14:** Mak 11.25-26

Söngöröni ketani yuai mi mönö Suepnöy tokome.

Luk 12.33-34

¹⁹ * “Moneñ inap yuai mi mönö gölmenöy ahöm enjimapkörä kude tokome. Mewö tokogetka mianğoreñ jijilukut kezaplonlonnöy mi yöhötigetka kahawet töromnöy (ros, ufeñ) mem böliiga kegwek-kahasiliñ yeñön miri qesiñda öngöba yonğorö memakze.

²⁰ “Gölmenöy qahöpmö, Anutugö jitsihitji tem kölgetka qetbuñaninan qarimapkörä mönö kapan kölme. Mewö aketka guli dötnamñini qainñi kun mi Sup mire ahöiga gurem jijilukutnöy mi qahö yöhötigetka kahawet töromnöy (ros, ufeñ) mi qahö mem bölime. Kegwek-kahasiliñ yeñön eu qahö öngöba miri qesiñda qahö yonğorö meme. ²¹ Yuaigöra aködamunñi memba mötnöy öngözawi, mianñön miri kungen ahöiga göñön mönö urugi mewöyök mianğoreñ qekötahöba malman.” Mewö.

Silegö asakñi mi kewö:

Luk 11.34-36

²² “Göhö jegi mi uru silegahö kiwanñi akza. Mianğöra kawöl kunöy jegi qahö mem böliza ewö, mianñön mönö unöy asarim teköi Anutugö asakñan ölop uruge mem asariiga malmalgi pakpak asakñe malman.

²³ “Asakñe malmanmö, sihim kömbönanñi bölöñan me yuai kunñan jegi mem böliba asakñi közambötza ewö, mianñön silegö malmalgi pakpak mewöyök mem söñauiga pandaman uruñe jipjap malman. Mewö aiga söñaupnöy urugahö asakñi

* **6:19:** Jei 5.2-3

közamböri söñauza ewö, nangi pandamanöñ mönö Yei! keta bölöknji wewelipñambuk akza.” Mewö.

Anutu me moneñ möt nariman?

Luk 16.13; 12.22-31

²⁴ “Kunñan kembu yahöt welen qem etkimamgö osimakza. Kunñan mewö akñamgö mötzawi, yañön mönö kun kazik ak wañgiba kun uruñan jöpaköma. Kungöreñ qekötahöba kun jijiwilit ak wañgima. Miangöra eñön Anutu aka moneñ inap mi mindiriba welen qem etkibingö osime.” Mewö.

Anutu möt nariba waimanjat kude akñe.

²⁵ “Mewö aiga nöñön kewö jibi mötket: Inini gölmenöñ malmeañgö waimanjatñi mi kewö jiba kude akñe, ‘Mönö wani yuainöñ gumohom añgubinak aka wanatnöñ sileninañgö löngötpinak?’ Jeñinambuk maljei, mianñon bohonñi aiga nenenöñ mönö miangö nemböñe akza. Silenñinambuk maljei, mianñon bohonñi aiga opo söronöñ mönö miangö nemböñe ahöza. Mönö mi mötmörime.

²⁶ “Könakemba neiñi neiñi mönö engekñe. Mienñon nene kötnji qahö qesin gilakze. Padi ölnji qahö yandiba köwe miriñine qahö tokomakze. Mi qahöpmahöp aiga engö Suep Iwiñinan mönö töndup i gumohom engimakza. Inini nei yengö dop qahöpmö, engö söngöröñinan mönö nei söngöröñini enğonğita öngöngöñi akza me qahö? Mönö mi mötmöriget anök.

²⁷ “Engöreñök kunñan waimanjat aka mewö mianñon gölmenöñ malmawañgö nalöñi mi sömañi mohotkö dop mem toroqema me qahö? Mi

qahöpmahöp! § 28 Opo söröñinañgöra mönö denöwögöra waimanjat akze? Mi qahö dop kölja. Sombemgö jariñ jurañi qarimakzei, mönö mi uba engekñe. Mienön opo söröñinañgöra möt qahö loñgalakze aka nup tosatñi qahö memakze.

29 *²⁹“Mi töndup nöñön kewö jibi mötme, Kiñ Solomonöñ goul silwöñi qeraköba asonjbilikñambuk malökmö, yañgö malukuñi mi kiteñ soranjiñ me jura kungö dop eksihimñambuk qahö ahöyök.

³⁰ Sombemgö jariñ jurañi töhön merak kösutnine ahöi uran kölgetka eri qezaköba gila ohoget jemapmö, mi töndup Anutunöñ mi ölopñanök meñölömakza. Miangöra yañön iñini mewöyök ölop esuhum engima. Iñini jariñ jurañangö dop qahö. Anutunöñ köyan köl engimangö möta miangöra sihimñi öngöngöñi mörakza. O ambazip, mötnaripñinan mönö wuanöñgöra öne töhön morörökñi akza?

31 “Mewö aiga iñini mönö malmalñinañgö waimanjat aka mötkurumkurum kude ahakñe. Mi aka lömböriba kewö jibepuk, ‘Nini mönö wani nene aka wani oya nembinak?’ aka ‘Wani yuainöñ silenini esuhubinak?’

32 “Mi kewögöra: Urumelengö kopa yeñön yuai pakpak mi buña qem angubingö kapan köla urukönöp ahakze. Iñini yuai pakpaköra mözöröngöba osimakzei, engö Suep Iwiñinan mönö mi möt teköza. ³³ Miangö urukönöp kude akñemö, mutuk mönö Anutugö bemtohoñnöñ añaota yañgö

§ 6:27: Tosatñan jabö 27 mi kewö melenja jize: Engörenök kunñan waimanjat aka mewö mianön silenji wan fitgö dop toroqeba mem körimangö osima. * 6:29: 1 Kiñ 10.4-7; 2 Hist 9.3-6

jeje solanibingö kapanj kölme. Uruñini mianğöreñ alget ahöiga yañön mönö galöm köl engiba yuai mewöñi pakpak mi mewöñanök engima.

³⁴ “Mewö aiga inini mönö uran malmeañgö waimanjatñi kude ahakñe. Urangö waimanjatñi mi urangöra. Silim mohot mohotkö waimanjatñini mönö nanñök nanñök bisiinga dopñine akña.” Mewö.

7

Jimtekötekö tonji ewö kude akñe.

Luk 6.37-38, 41-42

¹ Jisösnöñ toroqeba kewö jiyök, “Anutunöñ keuñini kewöta jim teköi etpepuköra mönö tosatñi yeñgö keuñini kude kewöta jim teköme. ²*Mianğö könañi kewö: Inini tosatñi yeñgö keuñini kewöta jim tekömei, Anutunöñ mönö dop mohot mianñönök nanñini keuñini kewöta jim teköma. Inini tosatñi yeñgöra jimkutukutu ala memba öñgöba eta kewöt engimakzei, Anutunöñ mönö mianğö dop nanñini ak engii öñgöba erakñe.

³ “Gi alagahö jeje gödöwöröt morörökñi ekzanmö, nangi jege ip sahötñi ketañi ahözawi, mia mönö wuanöñgöra kude ek kutuzan? ⁴ Me denöwögöra aka amqeba alagahöra kewö jizan, ‘Alani mötnöñ, ni ölop jegeyök gödöwöröt itaköbi etma?’ Mewö amqeba jizanzmö, ip sahötñi ketañi mi nange jege ahöza.

⁵ “O gi urumelenğö silesile azia, gi mönö mutuk nange jegeyök ip sahötñi (tametñi) ketañi

* **7:2:** Mak 4.24

memba gilman. Mi mem gilagun törörök ek kutuba alagahö jeneyök gödöwöröt morörökñi mi ölop itakönöŋga etma. ⁶ Yuaigöra mötketka tökutukutuñi qainñi kun akzawi, mi mönö kiam kude enjime. Guli damandan qeçenji mi mönö bau wösöŋine kude gilget anma. Mewö akçe ewö, yeñön mönö mi könañinan tiahöm enjiba dumçe melenða nanñini engehöba yöhöqöhötüm enjibepuk.” Mewö.

Mönö qesiba jaruba Anutugö nanjuçe qeba malme.

Luk 11.9-13

⁷ “Mönö Anutu köuluköme. Köulukögetka kewöta enjima. Urugö yuaigö Anutugören böröjañ memba jarume. Mi jarugetka kondeliga miwikñaime. Kinda nanjunöŋ qeme. Qegetka nanjuñi örüm enjima. ⁸ Kunñan Anutu köulukömakzawi, yañön mönö likepñi buña qem anjuma. Yuaigö jarumakzawañön mönö mi miwikñaima. Nanjunöŋ qemakzawañgöra mönö nanju örüm wañgima.

⁹ “Mötket, ambazip engehöŋök danön kewö akawak: Nahönñan bisketköra qesiiga köt wañgima? ¹⁰ Me nahönñan söragöra qesiiga qatö wañgima?

¹¹ “Mewö aiga inini ambazip bölöñi aka töndup kalem ölopñi ölopñi nahönböraturupñini enjibingö dop akze ewö, enghö Iwiñini Suep mire maljawañön mönö kalemñi denöwö anghön kölbawak? Yañgö uruñangö ahakmemenji mi neñgongita tandökñi kun akza. Miangöra inini yuai ölopñangöra köuluköba qesim wañgime ewö, yañön mönö sihimñan mi enjima.

12 **“Mianğöra ambazipnəŋ yuai pakpak nanŋinanğö ak enğimegö mörakzei, mianğö dop mönö nanŋini mewöyök i ak enğimakŋe. Mewö aketka Mosesgö Kōna Keu aka kezapqetok ambazip Buzup Kimbi keuŋini mianğön mönö ölŋinambuk aketka mindimindiri kōnanan aukŋe asuhuma.”* Mewö.

Mönö kiripo nanğu giwikŋi kutuba anme.

Luk 13.24

13 *“Könöp sianəŋ gebingö kōnaŋi mi amqeqeŋi aka numbuŋanğö nanğuŋi mi ketanŋi. Ambazip sehisehiŋan nanğu mi kutuba kōna mi mötöteiba anme. Mianğöra inŋini mönö kiripo nanğu giwikŋi kutuba mianğö uruŋe anme.*

14 *“Malmal köhöikŋe anğotpingö kōnaŋi mi pökpökŋi (pipitŋi) osukosubuk aiga numbuŋanğö nanğuŋi mi giwikŋi. Ambazip awamdökŋan nanğu mi miwikŋaime.”* Mewö.

Ipkö kōnaŋi mi ölŋi eka möt kutume.

Luk 6.43-44

15 *“Kezapqetok ambazip takapulakanŋi yeŋön lamagö sile ewö esuŋini löngöta enğöreŋ kamakzemö, uruŋinan ubibi kiam kalŋi ewö akze. Mianğöra inŋini mönö yeŋğöra aka tihitŋini möta galöm mem anğuba malme. 16 Nupŋinanğö ölŋi eketka kōnaŋini kondeli ölöp möt kutume. Nejoŋ kötŋi mi jömnəŋ asuhumakza me qahö? Warun kötŋi mi koururuknəŋ (köwörörök) asuhui tokomakzin me qahö? Qahö.*

17 *“Mianğö dop ip ölöpŋi pakpak mienğön ölŋi ölöpŋi kuŋgumakzemö, ip bölöŋan mönö kötŋi*

* 7:12: Luk 6.31

bölöŋi kuŋgumakza. ¹⁸ Ip ölöpnan ölni bölöŋi kuŋgumangö osiza aiga ip bölöŋan kötni ölöpnä kuŋgumangö osiza.

¹⁹ **“Ip pakpak ölni ölöpnä qahö kuŋgumakzei, mi mönö galömnän kutuba memba könöpnön gilige geme. ²⁰ *Miangö dop ambazip miengö nupnänängö ölni eketka könanini kondeli ölop möt kutume.”* Mewö.

Gwarek ölnängö könanä

Luk 13.25-27

²¹ “Nöngö Suep Iwinängö jitsihitni tem kölakzawanön mönö yangö bemtohoŋnön angotma. Gwötpuk yeŋön nöngöra ‘Kembuni, Kembuni!’ qeta jimakzemö, körek yeŋön Suepkö bemtohoŋnön qahö angotme.

²² “Jimtekötekögö nalö ketanä miangören gwötpuk yeŋön kaba nöngöra kewö jime, ‘O Kembu Kembu, neŋön mönö göhö qetke yuai asuhumapkö kezapqetok keu qeljine jiba malin. Neŋön mönö göhö qetkahö ösumnön ömewöröme enguatanögöba malin. Göhö qetkan mönö nam köl neŋgiiga anögöletot ösum-mumuŋinambuk gwötpuk memba malin. Mi ölum guhuza me?’ ²³ *Mewö jigetka nalö miangören könanini aukne kewö jibi mötme, ‘Nöŋön inäni nalö kunön qahö möt enġial. Iwilele ahak ambazip, inäni mönö nömosöta kesalget.’ ” Mewö.

Miri memegö mötkutukutu ölöpnä aka piromni

Luk 6.47-49

* **7:19:** Mat 3.10; Luk 3.9 * **7:20:** Mat 12.33 * **7:23:** Sum 6.8

24 “Mewö aiga denike yeñön keu jitni jizali, mi möta miangö dop tem köla memakzei, nöñön körek yeñgö könañamñini kondela mötkutukutu azigö dop ala kewö jimam, Yañön miriñi jamönjinj köt qakñe meyök. 25 Mewö meiga kie uru nalöñe kie römbum yöhöba eriga göulu luhuiga luhut ketani qeiga o göulu köhöikñi gila miri selñe kuñguyökmö, miri mi jamönjinj köt qakñe mei kinöhañgöra aka qahö kusuyök.

26 “Denike yeñön keu jitni jizali, mi möta miangö dop qahö tem köla memakzei, nöñön körek yeñgö könañamñini kondela azi mötkutukutuñi piromñangö dop ala kewö jimam, Yañön miriñi sak kösahet qakñe meyök. 27 Mewö meiga kie uru nalöñe kie römbum yöhöba eriga o luhuiga luhut ketani qeiga o göulu köhöikñi gila miri selñe kuñgui kusuiga goromororöñgöba erök.” Mewö.

Ambazipnöh Jisösgö kukösumñangöra welipköget.

28 *Jisösnöh keu mi jim teköiga ambazip kambuñi kambuñi yeñön mötketka kusum enñiyöhi, tandök miangöra auruba welipköget. 29 Yañön yeñgö Köna keugö böhiurupñinangö tandök qahö kusum enñiyökmö, kukösum Toñi akzawañgö dop ambazip kusum enñiiga möta tandök miangöra welipkögetka nemböñini teköyök. Mewö.

8

Jisösnöh uzikuku azi kun mem solaniyök.

Mak 1.40-45; Luk 5.12-16

1 Jisösnöh kundunji mi mosöta eri könagesö kambuleleme ketanjan andöñe wuatangöget. 2 Mewö

* 7:28: Mak 1.22; Luk 4.32

kagetka mianğoreŋ uzikuku azi kunöŋ kaba simin köla Jisösgö wösöŋe geba kewö jiyök, “O Kembu, göŋön sihimgan mem ölöwak niŋgimangö mötzan ewö, mönö ni ölöp mem solanim niŋgiman.”

³ Mewö jiiga böröŋi boraŋda silenŋi misiriba jiyök, “Nöŋön mi akŋamgö mötzal. Gi mönö solaniman.” Mewö jiiga uzikukuŋi mi mianğoreŋök solanii ölöwahök. ⁴ *Solaniiga kewö jim kutum waŋgiyök, “Mötnöŋ, kiangö buzup keuŋi mi kun kude jinöŋ mötme. Qahöpmö, mönö jike nup galömgöreŋ anda silegi kondel waŋgiman aka Mosesgöreŋ jimkutukutuŋi wuatangöba solanizanaŋgö saiwap nalukuŋi ala jöwöwöl ohoman. Mi ohonöŋ ehiga ambazipnöŋ könaŋamgi möt kutume.” Mewö.

Jisösnöŋ suahö galöm kungö nup aziŋi mem ölöwahök.

Luk 7.1-10

⁵ Jisösnöŋ Kaperneam taonöŋ kaŋoriga Rom suahö galöm kunŋan yaŋgöreŋ kaba köuluköba kewö jiyök, ⁶ “O Kembu, nöŋgö nup azinaŋgö silenŋi likepŋan kömukömuŋi aiga sihimbölä kaŋaŋambuk möta mire ahöza.”

⁷ Mewö jiiga kewö jii mörök, “Nöŋön mönö anda i mem ölöwakŋam.” ⁸ Mi möta kewö melenŋa jiyök, “O Kembu, ni mewöröpŋan malbiga nöŋgö miri boŋan goalöŋmapkö gamuni mötzal. Mianğöra keu jitkanök jinöŋga welen azinan ölöwakŋa.

⁹ “Mi kewögöra: Ni nanak mewöyök galömnangö kukösum bapŋe al niŋgigetka maljal. Nöŋgö bapne yarö azi malgetka mi jim kutum eŋgimakzal.

* **8:4:** Lew 14.1-32

Yengöreñök kungöra ‘Anman,’ jim kutubi yañön anma. Kungöra ‘Kanöñ,’ jim kutubi yañön kama aka welen azini kungöra ‘Nup ki meman,’ jibiga yañön mi mema.”

¹⁰ Jisösnöñ keu mi möta welipköba ambazip wuatangöba kageri, yengöreñ lilingöba kewö jiyök, “Nöñön keu ölni kun kewö jibi mötme: Israel könagesö sutñine mewöyök mötnarip ketanji mewöñi mi kungö uruñe qahö miwikñaijal.

¹¹ * “Nöñön keu kewö jibi mötme: Ambazip kambulelemenöñ mönö wehön kotkotñeyök aka wehön gegeñeyök kaba Suepkö bemtohoñ uruñe kañgota Abraham, Aisak aka Jeikob yembuk nene sösoñgai aka malme. ¹² *Yenön mewö malmemö, bemtohoñgö nahönböraturop mi mönö engömosöta aköm engigetka pandamanöñ yaigep geme. Mianğöreñ malmei, yenön mönö sahöt gigilahöba irimñini yöhözömgögetka qetñi qeri malme.”

¹³ Mewö jiba suahö galömgöra kewö jiyök, “Gi mönö mirige anman. Mötnaripkahö dop mönö asuhum gihima.” Mewö jiiga welen aziñan mönö aua mianğöreñök ölöwahök. Mewö.

*Jisösnöñ kawöl ambazip gwötpuk meiga ölöwaket.
Mak 1.29-34; Luk 4.38-41*

¹⁴ Jisösnöñ Pitögö mire anda Pitögö suhunñan silekönöp kawöl yöhöi ahöiga ehök. ¹⁵ I eka böröñe misiriiga silekönöpñan mosöri wahöta könahiba Jisös nene ohoba gumohom wañgiyök.

* **8:11:** Luk 13.29 * **8:12:** Mat 22.13; 25.30; Luk 13.28

16 Mewö malgetka miri söñauiga mianğörej ambazipnöñ alaurupñini ömeñnambuk mi gwötpuk enğuanğita yanğörej kaget. Kagetka ömewöröme mi keuñan jiba közöl enğiiga kota anget aka kawöl ambazip pakpak mi mem ölöwak enğiyök. 17* Mewö mianñon Anutunöñ keuñi kezapçetok azi Aisaiagö uruñe ali jii ahözawi, mianñon öñambuk ahök. Keu mi kewö, “Yanñon mönö neñgö uzi kawölnini meiga çakñe öñgöiga bisiyök.” Mewö.

*Jisös wuatangöbingö möndömöndö keuñi
Luk 9.57-62*

18 Jisösnöñ ambazip kambu ketanji liliköm wanğiget enğeka nalö mianğörej gwarekurupñi yembuk o anğö kutuba likep anğotpingö jim kutuyök. 19 Köna keugö böhi kunñan Jisösgörej kaba kewö jii mörök, “Böhi, gi denike denike anmani, nöñon mönö mianğörej gi guatangöba kamam.”

20 Mi möta Jisösnöñ kewö jii mörök, “Arökñanğö kiam yeñon köteñine ahögetka könakemba nei yeñon öñgot jajöñini memba malakzemö, Suep gölmegö azi öñan mönö denike anda nöropñi wani qömböñnöñ nariba luhut membawak?”

21 Mewö jii gwarek yeñgöreñök kunöñ kewö jii mörök, “Mi ölöpmö, iwinan kömumamgö aiga mutuk jinöñga anda galöm kölbü kömui löm kölbügun.” 22 Mewö jiyökmö, Jisösnöñ melenđa jiyök, “Mosötnöñ, köhömuñi yeñon çamötni köhömuñi mi ölop löm kölmemö, göñon mönö kaba ni nuatangöman.” Mewö.

* 8:17: Ais 53.4

Jisösnöŋ jüiga raidimbom göröŋ qeyök.

Mak 4.35-41; Luk 8.22-25

²³ Jisösnöŋ anda waŋge uruŋe öngöiga gwarekurupŋan wuatangöba yambuk mohotŋe anget. ²⁴ Angetka raidimbom ketanjan ömtöröp (töröpŋanök) o aŋgönöŋ asuhiba gilök. Giliga sirinöŋ waŋge uruŋe geiga numbunje qemamgö ahökmö, Jisösnöŋ gaun ahöyök. ²⁵ Gaun ahöiga gwarekurupŋan anda möndöba jiget, “Hei Kambu, mönö bauköm neŋginöŋ. Nini aŋgönöŋ ayuhubingö akzin.”

²⁶ Mewö jigetka melenđa kewö jim enġiyök, “O inġini mötnaripŋini morörökŋi, mönö wuanöŋgöra keŋgöt mötmöt azia akze?” Mewö jiba wahöta luhut aka siri jim qetal etkiiga sirinöŋ nöŋ qeba ahöyök. ²⁷ Mewö aiga awöwöliba qesiba jiget, “Yei! Azi kia mönö denöwöŋan malja. Yaŋön mönö luhut aka köwet jim kutum etkiiga jitŋi tem köl waŋgizahot.” Mewö.

Ömenöŋ bau uruŋine gegetka azinöŋ ölöwahot.

Mak 5.1-20; Luk 8.26-39

²⁸ Mewö asuhuiga o aŋgö kutuba likepŋe Gadara yeŋgö gölmenöŋ aŋgorök. Miangören aŋgota azi ömeŋirambuk yahöt yetkön qaksirinöhök kaba Jisös miwikŋaiyohot. Yetkön irimsesewöl azi urukönöpŋirambuk ahotka kunŋan köna miangören anmamgö osiyök. ²⁹ Yetkön Jisös miwikŋaiba silata kewö qet gigilahöyohot, “Aek! Gi Anutugö Nahönŋi akzan. Gi mönö denöwö ak neŋgimamgöra kazan? Sihimbölö mötmöt nalöŋan qahö kam kuŋguiga qeljŋe mi könöpŋambuk ak neŋgimamgö ki kazan me?”

³⁰ Mianğöreñök köröwen qahöpmö, kösutñine mianğöreñ bau kambu ketañi kun gwözözak uruñe kulunđa malget. ³¹ Mianğöra ömenöñ kewö jiba Jisös ulet wañgiget, “Göñön nini közöl neñgiman ewö, mönö melaim neñginöñga ölop bau kambu mienğö uruñine gebin.”

³² Ulet wañgigetka Jisösnöñ “Mönö anda geget,” jiba jim kutuyök. Mewö jim kutuiga mianğöreñök azi uruñireyök kota anda bau uruñine geget. Gegetka bau kambu körek yeñön mönö luhuba nembönembönöñ anda jororonğöba o añğönöñ geba nemulahöba kömuget.

³³ Kömugetka bau galöm yeñön ölöñ unjurata taonöñ anda keu buzupñini pakpak jiget. Azi ömeñjirambuk yetköreñ yuai asuhuyöhi, mianğö buzupñi mewöyök jiget mötket. ³⁴ Jiget möta taon ambazip pakpak yeñön mosöta Jisös miwikñaiba ekingö kaget. Kaba eka Jisösnöñ yeñgö mindi-mindiri sel gölme mosöta anmapkö ulet wañgiget. Mewö.

9

*Jisösnöñ azi sile likepñi kömukömuñi möhamğöyök.
Mak 2.1-12; Luk 5.17-26*

¹ Jisösnöñ wañge uruñe öngöba kunbuk o añgö kutuba likepñe añgota nanñe taonöñ kayök. ² Nalö mianğöreñ azi tosatñan alanini sile likepñi kömukömuñi tumbulahöpnöñ ahöyöhi, mi kululunöñ ala añguba kaget. Mewö kaba Anutu möt narim wañgigeri, Jisösnöñ yeñgö tandökñini mi ehi dop kölīga kawöl azigöra kewö jiyök, “Nahöni, nöñön siñgisöndoki mosötzal. Mönö köhöiba ewebibigabuk saitiñgit malman.”

³ Mewö jiiga Köna keugö böhi tosatjan kinda uruñinan kewö mötmöriget, “Azi kianjon mönö Anutu ilita mepaqepaik akza.”

⁴ Mewö mötmörigetmö, Jisösnöñ mötmötñini mi möt kutuba kewö jiyök, “Inini mönö wuanöñgöra keu bölöñi uruñinan mötmörize? ⁵ Nöñön ‘Singisöndoki mosötzal,’ jizali, keu mianjon mönö awamñanök jijinja. Kunñan mewö jiiga tosatjan keu miangö öñi qahö ekñe. Miangöra mi keu awamñangö dop. Nöñön keu kun kewö jimamgö mötzal, ‘Mönö wahöta anöñ.’ Keu mi mönö lömbötñambuk jijinja akza. Mewö jibiga öñi ahuma me qahöwi, mianjon mönö aukñe asuhui ekñe.

⁶ “Mötket, gölmenöñ singisöndok mosötmosötkö kukösumñi mi Suep gölmegö azi öñangören ahözawi, inini miangö könañangöra janjun malbepuk. Miangöra keu lömbötñi mi azi kiangöra jibi öñi eket.” Mewö jiba azi sile likepñi kömükömuñangö jeñe eka jiyök, “Gi mönö wahöta tumbulahöpki memba mirige anöñ. Keu lömbötñi mi öñambuk akña ewö, keu awamñi mi mönö mewöyök denöwögöra omañi akawak?”

⁷ Mewö jiiga miangörenök wahöta miriñe anök.

⁸ Mewö asuhuiga ambazip kambu yeñön mi eka welipköba Anutu möpöseim wañgiget. Gölme azigöra kukösum mewöñi wañgiyöhanögöra Anutu möpöseiget. Mewö.

Jisösnöñ Matyu (Liwai) oholök.

Mak 2.13-17; Luk 5.27-32

⁹ Jisösnöñ miangörenök anda takis ofis ongitmamgö aiga miangören azi qetñi Matyu tariga eka jii mörök, “Gi mönö nöñgö andöne kanöñ.”

Mewö jii möta wahöta takis nup mosöta Jisösgö andöje anök.

¹⁰ *Anda Matyugö mire anda nene namba tatkeri, nalö miangörej takis meme azi tilipqilipñinambuk aka siŋgisöndok azi gwötpukñan kaba Jisös aka yangö gwarekurupñi yembuk tata nene mohotje neget. ¹¹ Mewö negetka Farisi (Köna keugö kapañkölköl) yeñön mi eka Jisösgö gwarekurupñi kewö jim engiget, “Aek! Engö böhiñinan mönö wuanöñgöra takis meme tilipqilipñinambuk aka siŋgisöndok ambazip yembuk tata nene neza? Mi qahö dop kölja.”

¹² Mewö jim engigetka Jisösnöñ likepñi kewö jii mötket, “Sile unditundit ambazipnöñ doktagöra qahö ak engimakzapmö, kawöl ambazipnöñ mönö doktagörej anakze. ¹³ *Nöñön siŋgisöndok ambazip engoholmamgöra kaba maljalmö, ambazip nanñinañgö mötketka solanñi akzei, i qahö. Miangöra keu kiangö könañi mönö anda kusum aŋguba mötme, ‘Nöñön jöwöwöl ohobingö qahöpmö, ak kömum aŋgubingö sihimñi mötzal.’” Mewö.

Nene siŋgi malmalgö keuñi

Mak 2.18-22; Luk 5.33-39

¹⁴ Nalö miangörej Jon O-melun azigö gwarekurupñi yeñön Jisösgörej kaba kewö qesiget, “Neñön aka Farisi (Köna keugö kapañkölköl) yeñön Anutugöra nene siŋgi gwötpuk malahakzin. Nangi gwarekurupkan mönö wuanöñgöra nene siŋgi qahö malje?”

* **9:10:** Luk 15.1-2 * **9:13:** Mat 12.7; Hos 6.6

15 Mewö qesigetka kewö melenök, “Ölña, nini wani nalönöñ nene sinji malakzin? Ambi meme nalöñe azigö andöurupñan könöpñi algetka ambigö sepkitipurupñan yuai mi tökömakze me qahö? Nönön nani gwarekurupni yengö azi buñaya aka yengö sutñine köisirik tatzal. Tatpiga yenön mianğöra aijölön söñgaiba tata sinji malbingö osimakze. Osimakzemö, Anutunön noañgiri kömumbiga yenön mönö nalö mianğoreñ ölop sinji malakñe.

16 (“Inini malmal walñi aka sösoñgai Buña dölökñi mi mindirim etkibingö osime. Mianğö keu pasetñi mi kewö jibi mötket:) Löñgölöñgöt walñi jurariga kunön opo dölökñi qahö sanğonsanğonñi mitiba mianön opo su jöhanñi qahö ala umğoreñğomakza. Opo su jöhanñi dölökñi mewöñan mönö waziba löñgölöñgöt walñi öröiga kunbuk tinğiriga kinimñan qariba böliqölibapuk.

17 “Mewöñanök kunön wain o dölökñi mi jobö me toru walñi lama silenñan memenñi mianğoreñ qahö kusuiga gemakza. Mewö akawak ewö, wain o dölökñan mönö qariba toru qesiñniga jula mokoiga gölmenön eta sohoiga toruñan böliqölibepuk. Mianğöra wain o dölökñi mi toru dölökñeyök mokoin geiga dop kölma. Möwö ahinga mietkön ölöwakñahot. (Mewöñanök o ölopñi mi gina gisagisahöñe qahö umakzin. Mewö ubinak ewö, mianön mönö jula kisipisirik eriga nemba kawöl neñgöhöbapuk. Mewö akapüköra o ölopñi mi gina ölopñe umakzin. Inini mewöyök malmal walñi aka Ölöwak Buña dölökñi mi mindirim etkibingö osime.) Mewö.”

*Jairusnōŋ bōratŋaŋgōra Jisōs kōulukōyōk.
Mak 5.21-43; Luk 8.40-56*

¹⁸ Jisōsnōŋ keu mi jii mōtketka keu galōm kunŋan kaŋgota Jisōsgō wōsōŋe geba simin kōla kewō kōulukōm waŋgiyōk, “Nōŋgō bōratnan mōnō dōlki kōmuzapmō, mōnō kaba bōrōgan silēŋe misirinōŋga guliba toroqeba malma.” ¹⁹ Kōulukōm waŋgiiga wahōta gwarekurupŋi yembuk i wu-atāŋgōba anget.

Kawōl ambi kunōŋ Jisōsgō malukuŋi misiriyōk.

²⁰ Angetka miāŋgōreŋ sutŋine ambi kun malōk. Yaŋōn (yara) yambu 12 miāŋgō dop kōiŋnōŋ ehiga nalō dop kawōl yōhōiga malōk. Ambi miāŋōn Jisōsgō andōŋe kaba malukuŋaŋgō ki-tip suŋi misiriyōk. ²¹ Mi misiriba nanŋaŋgōra kewō jiyōk, “Nōŋōn i oseimāŋgō mōt lōmbōriba malukuŋeyōk borom kun misiribilenak ewō, mōnō ōlōp ōlōwakŋam.”

²² Mewō jiba misiriiga Jisōsnōŋ miāŋgōreŋōk liliŋgōba i eka kewō jii mōrōk, “Bōratni, mōtnariŋkan mōnō mem ōlōwak gihiza. Mōnō kōhōiba ewebibigabuk saitiŋgit malman.” Mewō jii mōta aua miāŋgōreŋōk ōlōwahōk.

Jisōsnōŋ Jairusgō bōratŋi mem guliyōk.

²³ Toroqeba angetka Jisōsnōŋ keu galōmŋaŋgō mire ōŋgōba ambazip jīŋgeŋ kōla awōlop ugeri aka ambazip kambu gōju gilgeri, mi eŋgeka kewō jim kutum eŋgiyōk, ²⁴ “Mōnō yaigep anget. Ambi morōŋan qahō kōmuzapmō, gaunōk ahōza.” Mewō jim kutum eŋgiiga mōtketka gōnahit ewō aiga gōn kōl waŋgiget.

²⁵ Gön köl waŋgigetmö, ambazip kambu ketani mi jiiga yaigep angetka ambi moröŋaŋgö ahöahö miri uruŋe öŋgöba böröŋe meiga wahörök. ²⁶ Wahöriga miangö buzup keuŋan sehiba mindimindiri sel mi körek dop köla anök. Mewö.

Jisösnöŋ jegömöl azi yahöt mem ölöwak etkiyök.

²⁷ Jisösnöŋ miri gölme mi mosöta anmamgö ani jegömöl azi yahötŋan wuatangöba andöŋe kaba kewö qerohot, “Deiwidkö gwölönarökŋi, gi mönö ak kömum netkiman.”

²⁸ Mewö qerohotka miri kungö uruŋe öŋgöiga jegömöl azi yetkön Jisösgöreŋ kayohotka kewö qesim etkiyök, “Jeniri mem tohomamgö kukösumŋi nöŋgöreŋ ahözawi, mi möt narizahot me qahö?” Qesim etkiiga kewö melenŋ waŋgiyohot, “Kembuniri, mi ölop möt narizit.” ²⁹ Mewö melenŋ waŋgiyohotka je dapötŋire misiriba jiyök, “Mötnaripŋiranŋö dop mönö asuhuma.”

³⁰ Mewö jiiga jeŋiran tohoyök. Mewö asuhuiga galöm meme keu köhöikŋi al etkiba kewö jiyök, “Mörohot, kiangö buzupŋi mi kun kude jiyohot mötme.” ³¹ Mewö jiyökmö, yetkön mosöta anda miangö buzupŋi jim sehiyohotka mindimindiri sel mi körek dop kölök. Mewö.

Jisösnöŋ mötök azi kungö keuŋi möhamgöyök.

³² Jeniri tohoi anohotka töŋöt azi keu jijiŋi qahö mi waŋgita Jisösgöreŋ kaget. ³³ Kagetka Jisösnöŋ ömeŋi közöli mötök azinöŋ keu jiiga ambazip kambu yeŋön mi eka welipköba jiget, “Tandök kewöŋi mi Israel uruŋe mönöwök nalö kungen qahö ehin. Qahö. Dölki je murutŋa ekzin.”

34 *Mewö jigetmö, Farisi (Köna keugö kapankölköl) yeñön jiget, “Yañön mönö öme yeñgö kembuñinañgö ösumnönj ömewöröme enğuatañgömakza.” Mewö.

Jisösnönj könagesö yeñgö wösönji mörök.

35 *Jisösnönj anda miri aka taon dop liliköba ambazip köuluk mirinje kusum enğiba bemtohonjgö Ölöwak Buña jim asariba mianön uruñini kuñguba uzi kawöl aka jepajerepe könañi könañi mem ölöwak enğiba malök. 36 *Mewö mala ambazip kambuñi kambuñi engehiga lama galömñini qahö tandök simbisembel aka ilingösönj qeñgalañga malgetka yeñgöra wösönji mörök.

37 *Mewö engeka gwarekurupñi kewö jii mötket, “Anutugö nupnönj nene ölnji gwötpuk öliba ahözapmö, mi tokobingö nup meme ambazipnönj mönö awamdökñi malje. 38 Mianğöra nene öliöliñangö Kembuñan nup meme ambazip melaim enğimapköra mönö köuluköba malme. Köuluköm wañgigetka nup ambazip asuhuba ölnji mi mem tokome.” Mewö.

10

Aposol 12 yeñgö qetñini

Mak 3.13-19; Luk 6.12-16

1 Jisösnönj gwarekurupñi 12 enğoholi yañgören kagetka ömewöröme közöl enğimegö kukösumñi al enğiyök. Mewöyök uzi kawöl qemjem-mamjen

* 9:34: Mat 10.25; 12.24; Mak 3.22; Luk 11.15 * 9:35: Mat 4.23; Mak 1.39; Luk 4.44 * 9:36: Jan 27.17; 1 Kin 22.17; 2 Hist 18.16; Eze 34.5; Mak 6.34 * 9:37: Luk 10.2

könañi könañi mem ölöwakñegö kukösumñi al engiyök. ² Melaimelai azi aposol 12 mienğö qetñini kewö: mutukñi yañön Saimon, qetñi kun Pitö qetket aka yañgö munñi Andru. Mianğö andöñe Jeims aka munñi Jon, iwiñiri qetñi Zebedi.

³ Filip aka Bartolomyu, Tomas aka Matyu takis meme azi, Jeims Alfiusgö nahönñi aka Lebeus qetñi kun Tadius, ⁴ Saimon Zelot-politik azia * aka Judas Iskariot. Kariot azi mianğön könañgen Jisös mamalolo mem wañgiyök.

Jisösnöñ gwarekurupñi 12 melaim engiyök.

Mak 6.7-13; Luk 9.1-6

⁵ Jisösnöñ azi 12 mi melaim engiba kewö jim kutum engiba jiyök, “Injini kian kantrigö ambazip yengöreñ kude anme. Mewöyök Samaria prowins yengö taonñini kunöñ kude anme. ⁶ Mianğöreñ kude anmemö, Israel könagesögö lama sohogeri, mönö yengöreñ anme. Mi nup mutukñi. ⁷ *Denike denike anmei, mianğöreñ mönö Buña keu kewö jiba jim asarime, ‘Suepkö bemptohonan mönö dowe kazawa mianğö uruñe angotme.’

⁸ “Ambazip kawölñinambuk mönö mem ölöwak engiba kömukömuñi mi mem gulim engiba malme. Uzikuku ambazip mönö mem solanim engigetka öme wöröme közöl engiba malme. Anutunöñ yuai kalema engiyöhi, mi mönö toroqeba kalema engiba malme.

⁹ “Köna anmeañgöra soujeñi goul me silwö me ain kopönöñ memenñi mi mönö irimuñganine kude

* **10:4:** Nesönöl pati Zelot yeñön Rom gawman tuarenjoñ aka nanñine kinkin memingöra tuaköpek memba malget. * **10:7:** Luk 10.4-12

jöhöme. ¹⁰ *Ambazipnöh nup meme ambazip mal-malñini nanğömeanğö dop akze. Mianğöra köna anmeanğö yuaini ki mi kude memba anme: gösö qahö, maluku semönñi qahöpmö, mohot meme, köna esu qahö, öröp qahö.

¹¹ “Anda taon me miri denike denike anğotmei, mianğoreñ mönö danön azi ipñi qetbuñañambuk akzawi, mianğöra qesigetka miri engime, mönö mianğoreñök mala nup memba taon mi mosöta köna anme. ¹² Miri kunöh öngöba luainöh yembuk ahömapkö jime. ¹³ Mi jigetka luainini anğön kölmeanğö dop akze ewö, luaininan mönö yeñgö qakñine öngömawmö, mi anğön kölmeanğö dop qahö akze ewö, luaininan mönö lilingöba nanñine kama.

¹⁴ *“Anda mala miri kunöh anğotketka qahö köl öröm engiba keuñini qahö mötketka nesampurekñini mönö kewö jiba kondel engime, ‘Nini engö gölmenöh kainga sölbuham köna tambönine mekötahözawi, mi mönö tim tönjöraringa nanñine lilingöba gema.’ Mewö jiba ölop miri me taon mi mosöta toroqeba anme. ¹⁵ *Nöhön keu ölni kun kewö jibi mötme: Anutunöh nalö ketañe qemasolokepñinanğö likepñi melenñi taon mianğö qakñe öngömawi, dop mianön mönö Sodom aka Gomora gölme yeñgö dop onğita toroqem engima.” (Sodom Gomora yeñön bölöñi kanjamñambuk memba uruñini qahö melenğetka Anutunöh könöpnöh könderñ engiyök.) Mewö.

* **10:10:** 1 Kor 9.14; 1 Tim 5.18 * **10:14:** Apo 13.51 * **10:15:** Mat 11.24; Jen 19.24-28

*Anda nup megetka sesewerowero asuhuma.
Mak 13.9-13; Luk 21.12-17*

¹⁶ **“Mötket, lama yeñön arökñangö kiam kalñi yeñgö sutñine gegetka luhuba engöhöbepuk, nõñön inñini miangö tandök ewö melaim engibi anme. Miangöra mönö mokoleñ † ewö mötkutukutu qakñe galöm mem anguba mala kembö ewö ambazip böñjöñi köpösihitkö keuñini qahö malme.*

¹⁷ **Ambazipnöñ inñini öröba keu jakeñine al engiba köuluk miriñine keu nupñini memba ihilek wahiñambuknöñ tauköm engime. Miangöra ambazip mewöñi yeñgöra mönö galöm mem anguba malme.*

¹⁸ *“Tosatñan nõngöra aka enguangitketka kantriñi kantriñi yeñgö kiñ kembu aka premiö yeñgö jemesoholñine kinme. Mewö kinda nõngö kõnañamni nañgöba jigetka azi ipñi mi aka kian kantri kõnagesö yeñön mi mötme. ¹⁹ Mi mötmemö, keu jakeñe al engigetka kinmei, nalö miangöreñ wani keuya denöwö jibinak, miangö waimañjatñi kude mötme. Keu jime, mi Uña Töröñan aua miangöreñök engima. ²⁰ Nannine uruñineyök keu kude jimemö, Iwiñinañgö Uña Töröñan mönö uruñini sölölohöiga keu jime.*

²¹ **“Urumeleñgö kopa kunöñ darumunñan uruñi melenö-hañgöra aka i mamalolo meiga*

* **10:16:** Luk 10.3 † **10:16:** Mokoleñ aka raskol yeñön aukñe bim qegetka zilañ miwikñaiba jöhöm engibeak. Miangö dop lömböribapuköra gwarek neñön maslim, komyunist aka tosatñi yeñgö sutñine qetnini misinari mi aukñe qahö jimakzin. Mötkutukutu mi ölöpñi. * **10:17:** Mak 13.9-11; Luk 12.11-12;

21.12-15 * **10:21:** Mak 13.12; Luk 21.16

keu jakene algetka qeget kömuma. Mewöyök iwi kunöŋ nahönböratŋi mamalolo meiga kömuma aka nahönbörat yeŋön iwinamurupŋini qetal enŋiba jigetka enŋuget kömume. ²² *Nöŋgö qetnaŋgöra aka kantriŋi kantriŋi yeŋön körek kazik al enŋigetka malmemö, kunŋan kapan köla nalö tekömawaŋgö dop köhöiba böŋ qeba kinmawi, yaŋön mönö oyaenŋoyaen buŋa qem aŋguma.

²³ “Taon kunöŋ sesewerowero ak enŋimeŋi, mi mönö kök ala taon kunŋan anme. Nöŋön keu ölni kun kewö jibi mötme: Inŋini Israel taonŋi taonŋi qahö liliköm tekögetka Suep gölmegö azi ölnan mönö lilingöba kama. ²⁴ *Gwarek kunŋan böhiŋi oŋgita mötmötŋambuk qahö akza aka welenŋeŋe kunŋan ketaŋamŋi oŋgita nupkö mötmöt qahö memba malja.

²⁵ *“Gwareknöŋ böhiŋi ewö mötmötŋambuk aiga dop kölma aka welenŋeŋenöŋ ketaŋamŋi ewö nupkö mötmöt memba maliga dop kölma. Miri uruŋi kungö saiwa galömŋi jim böliba qetŋi Katakömulat † qetket ewö, yaŋgö saiwaurupŋi yeŋgö qetŋini mönö anŋeba awamŋanök mewö qerakŋe.” Mewö.

Dagöra kenŋötŋini mötketka dop kölma?

Luk 12.2-7

²⁶ *“Ambazipnöŋ yuai önun meget ahözawi,

* **10:22:** Mat 24.9, 13; Mak 13.13; Luk 21.17 * **10:24:** Luk

6.40; Jon 13.16; 15.20 * **10:25:** Mat 9.34; 12.24; Mak 3.22; Luk

11.15 † **10:25:** Juda yeŋgöreŋ Katakömulat qetŋi Belzebul. Mi

ömewöröme yeŋgö ketaŋamŋini. Matyu 9.34 miangöreŋ Jisösgöra qet

bölöŋi mi qetket. Miangö dop Jisösgö alaurupŋi neŋgöra qet bölöŋi

könaŋi könaŋi qerakŋe. * **10:26:** Mak 4.22; Luk 8.17

mi pakpak mönö lulungetka aukne ahuma. Mewöjanök keu asambötket ahözawi, mi pakpak mönö indelgetka möt kutume. Miangöra ambazip yengöra kengetni kude möta malme. ²⁷ Nöjön keu söjauptnön ölön jimami, mi mönö asakne jime. Keu sanep algetka kezapnine gei mötmei, mi mönö sombemnön aukne jime. Miangöra mönö keunjanngö galöm memba malme.”

Dagöra kengetnini möringa dop kölma.

²⁸ “Tosatjan silenini gem kömumbeakmö, ujanini gem kömumbingö osime, yengöra kengetni kude möta malme. Mi qahöpmö, yuai mutukni ki: Kunjan kukösum memba uja aka sile mohot ayuhum etkiiga könöp sianön gemahori, yangöra mönö kengetni möta malme. ²⁹ Tosatjan bekösöm (jöröm, ulisit) yahöt monej kötji mohot-töpnön söngöröni memegöra alakzemö, etkerigetka Iwininan on qahö jüiga yetkörenök mohotnön gölmenön qahö etma.

³⁰ “Anutunön köyan köl engiba nörop jupni pakpak mewöyök oyon teköba jangöni mötza. ³¹ Ambazip engö söngöröni mi bekösöm ulisit gwötpuk engongita öngöngöni akza. Miangöra kengetni mönö kude möta malme.” Mewö.

Kraist jim miwiknaim me qan kölme?

Luk 12.8-9

³² “Mewö aiga kunjan ni ambazip jenine jim miwiknaim ningimawi, nöjön mönö mewöjanök i Iwini Sup mire maljanngö jene jim miwiknaimam. ³³ *Mewömö, kunjan ni ambazip jenine qan köl ningimawi, nöjön mönö mewöjanök

* **10:33:** 2 Tim 2.12

Iwini Suep mire maljawangö jene qan kölmam.”
Mewö.

Jisösgöra luai qahöpmö, kazik asuhuma.

Luk 12.51-53; Luk 14.26-27

³⁴ Jisösnöŋ toroqeba kewö jiyök, “Kewö kude mötmörime: Jisösnöŋ luai qemangöra aka gölmenöŋ erök. Nöŋön luai qemangöra qahöpmö, nöŋgöra aka jula dengetka bimgö sou ketanjan aume.

³⁵ **“Mi kewögöra jizal: Nöŋgö Buŋa keunan ambazip uruŋini kuŋgui melengerangöra kewö asuhuma, ‘Iwi morö yetköŋ jula kerök-kerök ahotka nam morö yetköŋ tötal anguyohotka iranŋan iranŋi qetala julmahot.* ³⁶ *Ambazip nanŋini saiwaurupŋinan mönö kerökurupŋini akje.’*

³⁷ *“Kunŋan ni göragöra al niŋgiba iwiŋi me namŋi jegep ala jöpakömawi, yaŋön mönö nöŋgöreŋ qahö dop köлма. Kunŋan ni göragöra al niŋgiba nahönŋi me böratŋi jegepŋe ala jöpakömawi, yaŋön mönö nöŋgöreŋ qahö dop köлма.* ³⁸ **Sisitŋini megetka kunŋan ni nuatangöba sihimbölö möta maripomnöŋ kömumangö qahö jöjörömawi, yaŋön mönö nöŋgöreŋ qahö dop köлма.*

³⁹ **“Kunŋan nanŋi malmal siyoŋsayoŋi qahö mi miwikŋaimawi, yaŋgö malmalŋan mönö sohoma. Kunŋan nöŋgöra aka malmalŋi köleŋniga sohomawi, yaŋön mönö oyaenköyaen malmal miwikŋaima.” Mewö.*

* **10:35:** Mai 7.6 * **10:38:** Mat 16.24; Mak 8.34; Luk 9.23

* **10:39:** Mat 16.25; Mak 8.35; Luk 9.24; 17.33; Jon 12.25

Anutunöŋ nupŋinaŋgö töwaŋi eŋgima.

Mak 9.41

⁴⁰ *Jisösnöŋ jiyök, “Kunŋan inŋini miriŋe köl öröba köyan köl eŋgimawi, yaŋön mönö ni köl öröm niŋgima. Kunŋan ni köl öröm niŋgimawi, yaŋön melaim niŋgiyöhi, mönö i miriŋe köl öröm waŋgima. ⁴¹ Kunŋan kezapqetok ambazip kun kezapqetok nupŋaŋgöra aka miriŋe köl öröba köyan kölmawi, yaŋön mönö kezapqetok ambazipkö töwaŋi buŋa qem aŋguma. Kunŋan ambazip solanŋi kun solanŋi akzawaŋgöra aka miriŋe köl öröba köyan kölmawi, yaŋön mönö ambazip solanŋaŋgö töwaŋi buŋa qem aŋguma.

⁴² “Kunŋan morö kiengörenök kungöra nöŋgö gwarekni akzawaŋgöra aka o amötŋi qambiŋambuk nemapköra waŋgimawi, Anutunöŋ mönö miangö töwaŋi melenŋa waŋgima. Nöŋön keu ölni kun kewö jibi mötme: Naŋgöm eŋgimei, mienŋön mönö töwa meme.” Mewö.

11

Jongö gwarekyahötŋi Jisösgören kayohot.

Luk 7.18-35

¹ Jisösnöŋ gwarekurupŋi 12 keu mewö kusum eŋgii teköiga miri mi mosöta toroqeba Galili prowinsgö taon tosatŋe anda Buŋa keu kusum eŋgiba miangön uruŋini kuŋguba malök.

² Nalö miangören Jon O-melun azinöŋ kösö mire tata Kraistnöŋ nup mewö meyöhi, mi möta gwarekyahötŋi melaim etkii Jisösgören anohot. ³ Kewö qesim waŋgimahotköra melaim

* **10:40:** Mak 9.37; Luk 9.48; 10.16; Jon 13.20

etkii anda jiyohot, “Mem ölöwak azi kamapköra mambörakzini, göñön mia akzan me azi kun bian kamapköra mambötpin?”

⁴ Mewö qesim wangiyohotka kewö melenök, “Yuai eka mötzahori, miangö kösohotji mönö anda Jon kewö jiyohot mötma: ⁵ *Jegömöl yeñön jeñini uba eketka lokon yeñön köna anda kagetka uzikuku yeñön solanigetka kezapduhup yeñön keu mötketka kömuget yeñön guliba wahötketka etqeçeni yeñgöra Ölöwak Buña jim asaribiga mörakze. ⁶ Mewö asuhui eketka kungö uruñan qahö bölü andö nuñgumawi, yañön mönö simbawoñ akza.”

⁷ Mewö jiiga Jongö gwarek yetkön anohotka Jisösnöñ könahiba Jongö könañi ambazip kambu yeñgöra kewö jim asariyök, “Inini gölme qararañkölkölne miangöreñ wania ekingöra anget? Luhutnöñ jehot uwutapköba metali anjanbanjan ahakzawi, inini azi mewöñi ekingöra anget me? ⁸ Me wanat yuaia ekingöra anget? Azi malukuñi aködamunñambuk löngöta malöhi, mi ekingöra me? Mötket, ambazip malukuñini eksihimñinambuk löngörakzei, miñön mönö kiñ yeñgö jakömbuak miriñine malje. Mi gölme qararañkölkölne qahö.

⁹ “Me wanat yuaia ekingöra anget? Kezapqetok azi kun ekingöra me? Ölna, nöñön kewö jibi mötket: Azi ekeri, yañön mönö kezapqetok ambazip pakpak engoñgita tandökni kun akza. ¹⁰ *Yañgö könañi mi mönöwök kewö ohoget ahöza, Mötnöñ, nöñön kolekni garata kun melaibiga

* **11:5:** Ais 35.5-6; 61.1 * **11:10:** Mal 3.1

qeljiŋe anda ambazip uruŋini mindiŋgöba göhö könagi mesariga göŋön mönö yaŋgö andöŋe gölmenöŋ emu geman.’

¹¹ “Keu mewö ahözapmö, nöŋön keu ölni kun kewö jibi mötket: Ambinöhök morö pakpak asuhugeri, yeŋgö sutŋine Jonöŋ mönö körek enŋoŋgita qetbuŋaŋambuk kinja. Kinjapmö, Suepkö bemtohoŋ uruŋe aŋgota Anutugö qetbuŋaŋi miwikŋaimakzei, yeŋgö sutŋine eretŋi kondikŋi yaŋön mönö Jon oŋgitza.

¹² *“Jon O-melun azinöŋ Buŋa keu jiiga nalö miangörenök könahiba Suepkö bemtohoŋi könöpŋambuk tuarenjoŋ aka yarö gilakzemö, töndup ösumŋan anda qarimakza. Könöpŋinambuk yarö gilakzeäŋön mönö bemtohoŋ mi nanŋinaŋgöra öröba buŋa qem aŋgumakze.

¹³ Bemtohoŋgö könäŋi mi Mosesgören Köna keunöŋ aka kezapqetok ambazip körek yeŋgö Buzup Kimbiŋine ohogetka oyoŋda mala koringa Jonöŋ asuhuba ölni aukŋe indelök. ¹⁴ *Keu ki möt aŋgön kölböngö mötze ewö, Elaija (Elia) asuhumawaŋgö dop ahöhi, Jonöŋ mönö mia akza.

¹⁵ Kunŋan urukezapŋambuk maljawwi, yaŋön mönö keu mi kezap ala möt kutuma.

¹⁶ “Ambazip merak gölmenöŋ maljei, mi mönö wanatpuk dop al enŋibileŋak? Yeŋön namande ewö akze. Mienöŋ maket sombemnöŋ tata keu gön gila laŋ qeta kewö jimakze,

¹⁷ ‘Nini awölop uinga iŋini liŋet gwawet qahö unduget. Nini jüngeŋ kölinga iŋini qahö toroqeba sahötket.’

* **11:12:** Luk 16.16 * **11:14:** Mal 4.5; Mat 17.10-13; Mak 9.11-13

18 “Miangö könaŋi kewö: Jon O-melun azinöŋ kaba nene ŋiŋi mala wain o qahö neiga yaŋgöra jimakze, ‘Öme kunöŋ uruŋe geiga malja.’

19 “Suep gölmegö azi ölnan kaba nene nem söŋgaip aiga yaŋgöra kewö jimakze, ‘Mötket, yaŋön bau numbu tandök közöjeriba wain o gwötpuk namba takis tilipqilipŋinambuk aka bölöŋi meme yeŋgö alaŋina malja!’ Anutugö mötkutukutu köl gulimakzei, yeŋgö ahakmemeŋinaŋgö ölnan mönö mötkutukutu-ŋinan dop köljawi, mi kondelakza.” Mewö.

Jisösnöŋ taon 3 yeŋgöra Yei wösöbirik! jiyök.

Luk 10.12-15

20 Miangö andöŋe jisösnöŋ könaŋiba taon tosatŋi tembul eŋgiyök. Taon tosatŋi miengören aŋgöletotŋi kukösumŋinambuk sehisehiŋi meiga asuhugetmö, töndup uruŋini qahö melenget. Miangöra i tembula kewö jim eŋgiyök, 21 **“O Korazin toŋi, nöŋön eŋgöra Yei! jiba sahötzal aka Betsaida toŋi, eŋgöra mewöyök Yei! jiba sahötzal. Nöŋön yeŋgören anbiga keuni jibi sösonihii aŋgöletotni kukösumŋinambuk asuhugetmö, uruŋini töndup qahö melenget. Aŋgöletot mi kian gölmenöŋ Taiö aka Saidon sitinöŋ asuhubeak ewö, yeŋön mönö nalö köröpŋi uruŋini melenbingö kaisöpsöpŋi kondela dodohonöŋ aŋgömiriba kau ariba sahötpeak.*

22 *“Sahötpeakmö, nöŋön kewö jibi mötme: Anutunöŋ könaŋep Korazin aka Betsaida yeŋgö keuŋini jim teköba likepŋi meleni sihimbölo*

* **11:21:** Ais 23.1-18; Eze 26.1-28.26; Joel 3.4-8; Amos 1.9-10; Zek 9.2-4

mötmei, nalö ketanji mianğörej mi mönö Taiö aka Saidon yengö sihimbölo dopnji onğita mötme.

23 **“Aka Kaperneam tonji, Anutunöñ injini ölop mem wahöt enğii Suep mire öngöbeak me qahöpto? Qahöpmahöp! Injini mönö kömupkö senjom mire kölölohoba geme. Nöñön yengörej anbiga keuni jibi sösonii anğöletotni kukösumñinambuk asuhugetmö, urunini töndup qahö melenget. Anğöletot mi Sodom taonöñ asuhubeak ewö, taon mianğön mönö nalö kewöñe mewöyök toroqeba kinbawak.*

24 **“Kinbawakmö, nöñön kewö jibi mötme: Anutunöñ könañgep Kaperneam enğö keunini jim teköba likeñji melenñi sihimbölo mötmei, nalö ketanji mianğörej mi mönö Sodom gölme yengö sihimbölo dopnji onğita mötme.” Mewö.*

Lömbötñinambuk enğön mönö nöñğörej kaba luhut meget.

Luk 10.21-22

25 Nalö mianğörej Jisösnöñ keu kewö jiyök, “O Iwini, göñön Buña keugi mötkutukutu ambazip mötmöt ketanji megeri, yengörej asambötñöñmö, ambazip nahönbörat ewö nanñinağöra mötketka gukmaulem akzei, mi mönö yengörej indelnöñga möt asarize. Mianğöra nöñön Suep gölmeğö Kembuñi gi möpöseim gihizal. 26 O Iwini, gi nangak mewö asuhumapköra mötnöñ dop köli ölöwahök.

27 **“Iwinan mönö yuai pakpak jim kutuiga nöñğö buñaya ahök. Iwinan Nahönñangö könañi nanjök möt yaköiga kunöñ mi qahö mötza.*

* **11:23:** Ais 14.13-15; Jen 19.24-28 * **11:24:** Mat 10.15; Luk 10.12 * **11:27:** Jon 3.35; 1.18; 10.15

Mewöyök Nahönñan Iwinanğö könañi möt yaköiga kunñan mi qahö mötza. Mewöyök kunñan Iwinanğö könañi qahö möt yaköiga Nahönñanök mi mötza aka ambazip möwölöhöm engiba yeñğöra mi indelmawi, yeñön mönö Iwi möt wanğime.

²⁸ “Nup memba urulömbötñinambuk maljei, inini mönö körek nöñğöreñ kagetka uruawam engibi luhut meme. ²⁹ *Nöñğö temni mönö awötñine ala anğuetka Buñani kusum engibi mi möt soroköba malme. Nöñön uruni memba et ala guñböñjönjön azia akzalanğöra ölöp uruawam engibi luhut mi-wikñaime. ³⁰ Nöñğö temni meget anğuinga dopñine akza aiga lömböt engibi bisimei, mianñön mönö awamñi akza.” Mewö.

12

Jisösnöñ Sabat kendongö Kembuñi akza.

Mak 2.23-28; Luk 6.1-5

¹ *Mianğö andöñe Sabat kendon kunöñ Jisösnöñ wit padi nup köröñi ketañi kutuba anök. Aniga gwarekrupñan wösöñini enğuiğa wit ölni mohot mohot könahiba böröñinan misiba neget. ² Negetmö, Farisi (Köna keugö kapanğölköl) tosatñan mi eka Jisös kewö jiget mörök, “Mötnöñ, göhö gwarekurupkan mönö Sabat kendongö nup meme soñgoñi oñgitze?”

³ *Mewö jigetka kewö melenñök, “Kiñ Dei-widnöñ yarö aziurupñi yembuk liliköba wösöñini enğuiğa yuai akeri, mi lök oyonget me qahö?”

⁴ *Yañön mönö Anutugö opo seri jikenöñ öñğöba

* **11:29:** Jer 6.16 * **12:1:** Dut 23.25 * **12:3:** 1 Sml 21.1-6

* **12:4:** Lew 24.9

beret kömbukñi Anutugö jemesoholñe altanöñ alget tariga ösumñan walöñniga qekögeri, mi mönö meiga neget. Beret kömbukñi mosötmosötñi mi jike nup galöm yeñönök nezema. Yañön aka yañgö sunğurumurupñan mi nembepuköra sonğo ahöyökmö, mi töndup neget. ⁵ *Mewöñanök jike nup galöm yeñön Sabat kendonöñ jöwöwöl jikenöñ kinda nup memba nup memegö sonğonñ onğita töndup keuninambuk qahö ahakze. Keu mi Köna keunöñ oyonget me qahö?

⁶ “Mi oyonget, mewö mötzalmö, nöñön kewö jibi mötme: Ki kinjawi, yañön mönö jöwöwöl jike onğita öngöngöñi akza. ⁷ *Buña Kimbigö keu kun kewö ahöza, ‘Nöñön jöwöwöl ohomegöra qahöpmö, sutñine ak kömum anğumegöra mötzal.’ İñini keu miangö könanñ mötpeak ewö, ambazip pinjtkö keunini qahö neñgö keunini mönö lañ qahö jim teköbeak.

⁸ “Mi kewögöra jizal: Suep gölmegö azi ölnan mönö Sabat kendongö Kembunñi akza.” Mewö.

Jisösnöñ azi böröñi söşöröngöñi mem ölöwahök.

Mak 3.1-6; Luk 6.6-11

⁹ Jisösnöñ miri mi mosöta köuluk mirinñine öngöyök. ¹⁰ Mianğoreñ azi böröñi sosoholinñi kun tarök. Ambazipnöñ Jisös keu jakene al wañgibingöra kewö qesim wañgiget, “Azi Sabat kendonöñ möhamgöba Köna keu onğitpin me qahö?”

¹¹ *Qesim wañgigetka kewö melenñök, “Enğoreñök dañön kewö akza: Azi kungö lamanñi

* **12:5:** Jan 28.9-10 * **12:7:** Mat 9.13; Hos 6.6 * **12:11:** Luk 14.5

mohok-kunŋan Sabat kendonöŋ lömnöŋ gema ewö, yaŋön mi qahö memba öröiga kotma? ¹² Azigö bohonŋan mönö lamagö bohonŋi gwötpuk oŋgitzawi, mönö mi mötmörime. Mianğöra Sabat kendonöŋ nup ölopŋi memba mewö Köna keu qahö oŋgitpin.”

¹³ Mewö melenđa azi mianğö jiyök, “Gi mönö börögi qötöteinöŋ.” Mewö jiuga qötöteiiga mutuk ahöhi, mianğö dop ölöwaka böröŋi alañğö dop ahök. ¹⁴ Mewö asuhuiga Farisi (Köna keugö kapanğölköl) yeŋön yaigep anda totoko ala Jisös denöwö aka qein kömumapkö keu jim jaruget. Mewö.

Anutugö nup meme azi tök-kutukutuŋi kewö:

¹⁵ Jisösnöŋ keuŋini mi ek kutuba mianğöreŋök miri mi mosöta kungen anök. Aniga gwötpukŋan yaŋö andöŋe wuatangöba angetka yeŋö sutŋine kawöl ambazip pakpak mem ölöwak eŋgiyök. ¹⁶ Mi mem ölöwak eŋgiba könaŋi aukŋe jibepuköra köhöikŋanök qetal eŋgiyök. ¹⁷ Mewö aiga Anutunöŋ kezapqetok azi Aisaia sölölohöiga keu kun jiyöhi, mianğön mönö mewö ölnambuk ahök. Keu mi kewö jii ahöza,

¹⁸ **“Eket, ki mönö nöŋgö nup azini aiga i möwölöhöm waŋgial. Nöŋön wölböt alani yaŋöra mötpi ölöwahiga urunan yaŋöra söŋgaimakzal. Nöŋön Uŋani Töröŋi yaŋö uruŋi dop kölmapköra melaibi geiga yaŋön keu diŋdiŋanök jim tekömakzalaŋö Buŋaŋi indela jim sehiiga kantriŋi kantriŋi yeŋgöreŋ anma.*

* **12:18:** Ais 42.1-4

- 19 Yanjön anğururuk qahö aka keu töhöreñ qahö qer-akña. Ambazip kunñan yanğö qet kourukñi mi rowoñqeçe könanöñ qahö mötma.
- 20 Jehot qölökögeri, yanjön mi qahö qesiñma.
* Lambegö wikñan jem kutuba sanjöp aiga bölamñan jem bökbök ahakzawi, yanjön mönö mi qahö qömbököma. Mewö nupñi memba ambazipnöñ keu diñdiñi wuatangömegöra bim qeba maliga keu mianjön luhut aliga köirañ alme.
- 21 Kantriñi kantriñi yeñön mönö yanjön bauköm eñgimapköra mamböta jörömqörömqini yanğö qetne ala malme.” Mewö.

Jisösnöñ öme yeñgö ösumñini oñgita qei etza.

Mak 3.20-30; Luk 11.14-23

22 Ömenöñ azi kun töñöt aka numbuñi jöhöiga jeñan gömölii mötök malöhi, mi wañgita Jisösgöreñ kaget. Jisösnöñ i mem ölöwahiga ömeñan kota mosöri nesilamñan lolohoiga kunbuk keu jiba uba ehök. 23 Uba ehiga ambazip kambu pakpak yeñön mi eka auruba Jisösgöra jiget, “Azi kianjön mönö Deiwidkö gwölönarökñi akza me?”

24 *Mewö jigetmö, Farisi (Köna keugö kapañkölköl) yeñön mi möta kewö jiget, “Azi kianjön kungö ösumnöñ qahöpmö, öme yeñgö Kembuñini Katakömulat yanğö ösumnöñ ömewöröme eñgutañgömakza.”

* **12:20:** Jehot aka lambegö wikñi mi ambazipköra jiza. Ambazipnöñ kun qeba jañgauranga ak wañgigetka mötnariñan pömsöm qemapkö akzawi, Jisösnöñ i mem ölöwakña. * **12:24:** Mat 9.34; 10.25

²⁵ Mewö jigetmö, Jisösnöŋ urumötmöŋjini möt teköba kewö jii mötket, “Kantri denike yeŋgö galömurupŋinan sutŋine aŋgururuk aka julmei, yeŋön mönö ayuhum aŋgugetka kantriŋinan böliba sahopŋanök aka qeqelanlaŋ ahöma. Mewöyök siti me miri kungö könagesö yeŋön sutŋine aŋgururuk aka julmei, yeŋön mönö galömkölköl nupŋini memba kinbingö osime.

²⁶ “Mötket, Satanöŋ mönö alaŋi Satan kun wu-ataŋgöbawak ewö, yeŋön mönö sutŋine aŋgururuk aka julbeak. Mewö aiga gawman nupŋini membingö osigetka ömetohoŋinan mönö denöwö kinbawak?

²⁷ “Mötket, nöŋön Katakömulatkö ösumnöŋ ömewöröme közöl eŋgibileŋak ewö, eŋgö alaurupŋinan mönö dagö ösumnöŋ mi közöl eŋgibeak? Miangöra yeŋön mönö keuŋjini öljji me qahö, mi kewöta jim teköme. † ²⁸ Mi jim tekömemö, Anutugö ösumŋan nöŋgö börö kesötni sölölohöi öme eŋguataŋgömakzal ewö, Anutugö bem-tohoŋan mönö eŋgöreŋ kam kuŋguza. ²⁹ Kunŋan azi köhöikŋaŋgö köna böröŋi mutuk qahö jöhöma ewö, yaŋön mönö denöwö miriŋe öŋgöba qezaŋda sukinapŋi membawak? Mutuk i jöhöi tarigun mönö ölop miriŋeyök öryuainji pakpak waŋgita memba anma. (Miangö dop nöŋön mewöyök Satan jöhöba andöŋe ömeŋi eŋguataŋgömakzal.)

³⁰ *“Kunŋan nömbuk qahö maljawi, yaŋön

† **12:27:** Nanŋjini silegalömurupŋinan Anutugö qetŋi öme mi Katakömulatkö kukösumnöŋ közöl eŋgigetka nöŋön mi Anutugö ösumnöŋ közöl eŋgimakzal. Öroröŋ qahö kinjinaŋgöra daŋön keu muneŋi wuataŋgömakza? Yeŋön me nöŋön? * **12:30:** Mak 9.40

mönö qetal niŋgimakza. Kunŋan ambazip nönğö qetne tokomeğöra qahö öröm enğimakzawi, yaŋön mönö menden enğimakza. ³¹ Mianğöra nönön keu kun kewö jibi mötme: Ambazip siŋgisöndok aka mepaqepaik pakpak ahakzei, mi Anutunöŋ ölop mosörakzadmö, kunŋan Uŋa Töröŋi ilita mepaikömawi, mianğö siŋgisöndokŋi Anutunöŋ mönö nalö kunöŋ qahö mosötma. Saumbaŋ!

³² *“Kunŋan Suep gölmegö azi ölni qetala keu jima ewö, Anutunöŋ mi ölop mosötmapmö, kunŋan Uŋa Töröŋi qetala keu yuai jimawi, yaŋğö siŋgisöndokŋi mi Anutunöŋ gölmenöŋ malmawaŋğö dop me kömup andöŋe mianğören qahö mosötma.”

Ipkö könaŋi mi ölni eka kewöta möt kutume.

Luk 6.43-45

³³ *“Ipkö könaŋi mi ölni eka kewöta mötzin. Mianğöra mönö ip galöm kölgetka ölöwaka ölni ölopŋi kuŋgumakŋa me ip mem böligetka ölni bölöŋi kuŋgumakŋa. ³⁴ *Azi uruŋan yuai kokolak qei ahözawi, mia mönö numbuŋan aukŋe jimakza. Mianğöra qatögö moröŋi injini, nanninak bölöŋi aka mönö denöwö keu ölopŋi jibeak? ³⁵ Azi ölopŋaŋğö uru köweŋe ölopŋaŋğö möriamŋi ahözawi, yaŋön mönö ölopŋi mi aukŋeyök jimakza. Azi bölöŋaŋğö uru köweŋe bölöŋaŋğö möriamŋi ahözawi, yaŋön mönö bölöŋi mi aukŋe jimakza.

³⁶ “Mewö jimakzadmö, nönön keu ölni kun kewö jibi mötme: Ambazipnöŋ soŋgo walöŋda keu jit omaŋi omaŋi jimei, yeŋön mönö keu pakpak

* **12:32:** Luk 12.10 * **12:33:** Mat 7.20; Luk 6.44 * **12:34:** Mat 3.7; 23.33; 15.18; Luk 3.7; 6.45

miaᅅgö könaᅅi mi jimtekötekögö nalö ketane Anutugöra jim asarigetka kewötma. ³⁷ Miaᅅgö könaᅅi kewö: Anutunöᅅ mönö keu jitki kewöta miaᅅgö dopkeugi jim teköi solaniman me keugabuk aka lömböt miwikᅅaiman.” Mewö.

*Böhi tosatᅅan aᅅgöletoköra kapaᅅ köla uletket.
Mak 8.11-12; Luk 11.29-32*

³⁸ *Nalö miaᅅgöreᅅ Farisi (Köna keugö kapaᅅkölköl) aka Köna keugö böhi tosatᅅan Jisösgöra kewö jiget, “Böhi, gi ölop aᅅgöletot kun menöᅅga mi ekingö mötzin.”

³⁹ *Mewö jigetka kewö melenᅅ eᅅgiyök, “Ambazip merak gölmenöᅅ maljei, mi kambu bölöᅅi aka serowilin ahakze. Yeᅅön Anutugö aiwesökᅅaᅅgöra kapaᅅ kölakzemö, aiwesök kun kezapqetok azi Jonagöra lök asuhuyök. Anutunöᅅ aiwesök murutᅅi kun qahö al eᅅgima. ⁴⁰ *Jonanöᅅ suᅅgem silimᅅi karöbut köwet sömbupkö (gajugaju) gölömᅅe malöhi, miaᅅgö dop Suep gölmegö azi öᅅᅅan mewöyök suᅅgem asak karöbutkö dop gölme uruᅅe ahöma.

⁴¹ *“Jonanöᅅ Niniwe ambazip sutᅅine anda Anutugö keunöᅅ uruᅅini kuᅅgui möta miaᅅgöreᅅök uruᅅini melenᅅetmö, mötket, nöᅅön sutᅅine asuᅅuba kinda Jonagö ahakmemeni oᅅgita ahakzal. Mewö ahakzalmö, iᅅini töndup nesampurek ak niᅅgimakze. Miaᅅgöra Niniwe ambazipnöᅅ jimtekötekögö nalö ketane ambazip kambu ki kinjei, embuk öröröᅅ kömupnöhök

* **12:38:** Mat 16.1; Mak 8.11; Luk 11.16 * **12:39:** Mat 16.4; Mak 8.12 * **12:40:** Jon 1.17 * **12:41:** Jon 3.5

wahöta engö qöhöröjine mohotje kinme. Mohotje kinda Niniwe yejön keu kewö engö silenine alme, 'Inini Suep gölmegö azi ölni nesampurek ak waŋgetka Anutunöŋ likepni melenj engii sihimbölö öngöngöŋi mötme.' Niniwe yejön mewö jigetka ahakmemeninan nanjini könaŋamjini indelgetka gamuŋjini mötme.

42 *“Könaŋamjinaŋgö kaisöpsöpni kun kewö: Anutunöŋ mönöwök mötkutukutu öngöngöŋi ketanji mi kinj Solomon waŋgiiga Saut görökenök kantri kungö qin ambinöŋ Solomongö mötkutukutuŋi mötmamgö sihimni mörök. Sihimni möta gölme göraŋeyök wahöta köna köröp tiŋtiŋi kaba mala Solomongö mötmötŋi mörök.

“Mi mörökmö, mötket, nalö kewöje nöjön sutjine asuhuba kinda Anutugöreŋ mötkutukutu öngöngöŋi memba kazali, mi Solomongö mötkutukutuŋi oŋgitza. Oŋgitzapmö, injini töndup nesampurek ak niŋgiba tönpin kingetka qahö dop kölja. Miaŋgöra Anutunöŋ könaŋep ambazip körek pakpak öröm engii keuŋjini jim tekömapköra jeŋe aŋgotmei, nalö miaŋgöreŋ Saut kantrigö qin ambi miaŋön mönö mewöyök aŋgotma. Yaŋön ambazip kambu ki kinjei, embuk öröröŋ kömupnöhök wahöta engö qöhöröjine mohotje kinma. Mohotje kinda keu kewö engö silenine alme, 'Inini Jisös nesampurek ak waŋgetka Anutunöŋ likepni melenj engii sihimbölö öngöngöŋi mötme.' Yaŋön mewö juiga silikni kewöta nanjinaŋgöra gamuŋjini mötme.” Mewö.

* **12:42:** 1 Kinj 10.1-10; 2 Hist 9.1-12

Öme yeñön azi uruñe lilingöbingö kapan kölje.

Luk 11.24-26

⁴³ “Ömenöñ azi uruñeyök kota gölme qararañkölkölñe anda lañ liliköba mala luhut memangö miri jaruba kun qahö miwikñaima.

⁴⁴ Mi qahö miwikñaima osiba kewö jima, ‘Mirini mosöta kazali, miangöreñ mönö kunbuk lilingömam.’ Mewö jiba lilingöba miriñi usuñda meñölöi ahöyöhi, mi gwamönñi ahöi miwikñaima.

⁴⁵ “Mewö miwikñaima anda öme tosatñi 7 enğuañgitma. Öme 7 mi nannñi oñgita bölöñi kötökñi akze. Yañön mi enğuañgiriga kaba miri mi öngöba miangö uruñe malme. Mewö aiga azi miangö könajñi mutuk kileñkileñ ahökmö, könajgep bölöqölim teköma. Ambazip kambu bölöñi ki merak gölmenöñ maljei, enğöreñ mewöyök mewö asuhuma.” Mewö.

Jisösgö nam-munurupñi

Mak 3.31-35; Luk 8.19-21

⁴⁶ Jisösnöñ toroqeba ambazip kambu yeñgöra keu jiba maliga nam-munñan kaba yaigep kinda yambuk keu jibingö mötket. ⁴⁷ Mötketka kunñan kewö jii mörök, “Mötnöñ, göhö nam-mungan mönö yaigep kinda göbuk keu jibingö mötze.”

⁴⁸ Keu mi jii mörökmö, yañgöra melenđa kewö jiyök, “Nöngö namni dañön? Nöngö munurupni mi dañön?” ⁴⁹ Mewö jiba böröñi gwarekurupñi yeñgöreñ göröken börañda jiyök, “Eket, nöngö namni aka munurupni öññi mönö ki.” ⁵⁰ Denike yeñön nöngö Suep Iwinangö jitsihitñi tem kölakzei, körek mienöñ mönö nöngö namni aka nenmunurupni akze.” Mewö.

13

Qesinqesin azigö dopkeu.

Mak 4.1-9; Luk 8.4-8

¹ Nalö miangöreñök Jisösnöñ miri mi mosöta o anğö jitne geba tarök. ² *Tariga ambazip kambulembenöñ yangöreñ anda tokogetka wanğenöñ öngöba tarök. Tariga ambazip kambu pakpak yeñön anğö görañe saknöñ tokoget.

³ Mewö tokogetka dopkeu gwötpuk jii mötketka kewö jiyök, “Mötket! Azi kunñan nene köñji qesin gilmangöra nupnöñ anök. ⁴ Anda qesin giliga köñji tosatñan köna jitne geba kölget. Geba kölgetka (warawen) neiñi neiñi kañgota mi nem teköget.

⁵ “Köñji tosatñan köt jamönjiñnöñ geba kölget. Geba köla miangöreñ gölme gwötpuk qahö mi-wikñaiget. Gölme dutñi qahö ahöyöhangöra korapñi zilañ kotket. ⁶ Kotketmö, wehönöñ kota eñguba jem kutum eñgiiga jalöñini qahöpköra soholiba gororöñgöget.

⁷ “Köñji tosatñan siriuret wahinambuknöñ geba kölget. Geba kölgetka mienöñ kota qem turuba böbölohot mem eñgiget. ⁸ Mewö pömsöm qeyökmö, köñji tosatñan gölme ölopñe geba kölget. Geba köla tosatñi mienğö köñjini 100 asuhuget. Tosatñan köñjini 60, tosatñan 30 miangö dop ahum sehiğet. ⁹ Kunñan urukezapñambuk malja ewö, yañön mönö dopkeu ki kezap ala möt kutuma.” Mewö.

Jisösnöñ wanigöra dopkeu jiyök.

Mak 4.10-12; Luk 8.9-10

* 13:2: Luk 5.1-3

10 Mewö jiiga gwarekurupņan kaba Jisös kewö qesim wanġiget, “Gi mönö wuanöngöra ambazip yeņgö ‘Keu jimam,’ jiba dopkeunöŋ ala jimakzan?” 11 Qesim wanġigetka kewö melenġa jiyök, “Mi kewögöra: Suepkö bemtohone anġota malbingö keu tölapņi mi enġöra aukņe jibi möt kutuzemö, yeņgöra mi mewö qahö.

12 * “Mianġö könäŋi kewö: Kunņan mötkutukutuņambuk maljawi, Anutunöŋ mönö mi toroqem wanġiiga köl guliba möriamņambuk malmapmö, kunņan mötkutukutuņi qahö maljawi, Anutunöŋ mönö mötmötņi moröŋi ahözawi, mi mewöyök qeköba wanġitma.

13 “Ambazip yeņgö keu jimam jiba kewögöra dopkeunöŋ ala jimakzal: Yeņön nanņini jeņinan yuai ekagun könäŋi töndup qahö ek kutume. Nanņini kezapņinan keu törörök mötagun könäŋi töndup qahö möt asarime. 14 *Kezapqetok azi Aisaianöŋ qeljņe keu kun jiba ohoyöhi, mianġön ambazip mewöŋi yeņgöreŋ ölnambuk ahakza. Keu mi kewö, ‘Keu möt bibihibagun könäŋi töndup kude möt asarime. Yuai ek bibihibagun könäŋi töndup kude ek kutume.

15 Ambazip kambu kiengö uruņinan mönö köhöikņi gwözöŋda ahöza. Kezapņinan keu möt bibihiba jeņini kömaziliköba (kömazilihiwa) malje. Mewö qahö akeak ewö, mönö jeņinan yuai ek kutuba kezapņinan keu möta uruņinan könäŋi möt asariba uruņini melenġetka nöŋön i ölop mem ölöwak enġibileņak.’

* 13:12: Mat 25.29; Mak 4.25; Luk 8.18; 19.26
6.9-10

* 13:14: Ais

16 **“Keu mewö ahözapmö, engö jeñinan yuai ek kutuzawañgöra mönö simbawoñ akze. Kezapñinan keu möt kutuzawañgöra mönö simbawoñ akze. 17 Nöñön keu öl töhöññi kun kewö jibi mötket: Kezapqetok ambazip aka Anutugöreñ ambazip solañni gwötpukñan inini yuai ki ekzei, mi ekingö awöweñgöba malgetmö, qahö eket. Inini keu ki mötzei, yeñön mi mötpingö awöweñgöba malgetmö, qahö mötket.”* Mewö.

Jisösnöñ dopkeugö könañi jiyök.

Mak 4.13-20; Luk 8.11-15

18 *“Qesiñ gilgil azigö dopkeu jizali, miangö könañi mi kezap ala mötme. 19 Nene kötni qesiñ giliga köna jitñe geba kölöhi, mi kewö: Kunñan bemtohongö Buña keuñi möta könañi qahö möt asariiga Bölöñangö Toñan kaba uruñe kötni kömötkeri, mi qeköma. 20 Nene kötni qesiñniga köt jamönjiñnöñ geba kölöhi, mi ambazip söpsöpñi kun. Yeñön Buña keu möta mi miangöreñök sösongai qakñe möt angön kölakze.*

21 *“Mewö ahakzemö, uruñine jalöñi qahö ahöm engimapmö, nalö töröptökñi miyök kin köhöiba malme. Buña keugöra aka kahasililiñ me sesewerowero asuhuiga nalö miangöreñök mönö tala enguma. 22 Nene kötni qesiñniga siriuret wahinambuknöñ geba kölgeri, mi kewö: Yeñön Buña keu mötketka uruñine gezapmö, gölmenöñ malmalgö waimañjatñi aka moneñ inap memegö urukönöpñi ahuba lömbörim engimakza. Qetbuñañinambuk akingöra köpösöngögetka sihim kömbönañi bölöñi tosatñan mewöyök uruñine*

* **13:16:** Luk 10.23-24

dumgöba Buja keu böbölöhöt mem wanğize. Mewö aiga ölnjini qahö gilipitnji (ambetaknji) aknje.

²³ “Nene kötnji gölme ölöpnje qesijniga geba kölgeri, mi ambazip kewöni: Yenön Buja keu kezap ala möta möt asariba pöndanj kinda ölnjini miwiknjaimakze. Tosatnan keu jit mohotnöhök kötnji 30 miwiknjaimakze. Tosatnan ölnjini 60, tosatnan keu köt mohot mohot mienğö ölnjini 100 mem sehiba miwiknjaimakze.” Mewö.

Dorowetkö söpsöp keu

²⁴ Jisösnöñ söpsöp keu kun kewö jii mötket, “Suepkö bemtohoñangö könañi mi azi kewöñangö dop ala jimam. Yanön nupnje anda nene kötnji ölöpnji qesinj gilök. ²⁵ Qesinj gilökmö, sunğem ahögetka mianğöreñ kerök azinan kaba wit padi sutnjine mianğöreñ dorowetkö kötnji qesinj gila mosöta anök. ²⁶ Wit padi kötnjan jula wahöta öngöba ölnji asuhuyöhi, nalö mianğöreñ dorowetnöñ mewöyök auknje asuhuyök.

²⁷ “Mianön auknje asuhuiga welenqeçeurupnan mi eka nup toñangöreñ kaba kewö jigetka mörök, ‘Ketanamnini, nupke nene köt ölöpnji qesinj gilnön me qahö? Dorowetkö kötnji mi mönö denikeyök mianğöreñ geba asuhuza?’

²⁸ “Mewö jigetka möta kewö jii mötket, ‘Kerök azinön mi qesinj gilök.’ Mewö jii möta welenqeçe yenön kewö jiget, ‘Nini ölop anda dorowet mi qözöla tokobingö mötzan me qahö?’ ²⁹ Mewö jigetmö, kewö jii mötket, ‘Qahö! Inini dorowet qözöla tokoba mianğöreñ padi tosatnji mi mewöyök qözölbepuk.

30 “Mönö mosötketka mohotje qariba wahörohokun ölni meme nalöñan kam kuñguiga nalö miangören nöhön padi misimisi ambazip yengöra kewö jibi mötme: Mönö mutuk dorowet memba tokoba ohomegöra börangöba kösönöh jöhöme. Mi jöhöbagun mönö wit padi ölni mi tokoba memba kaba nöhgö köwe mire alme.’” Mewö.

Nejoñ kötñangö dopkeu

Mak 4.30-32; Luk 13.18-19

³¹Jisösnöh dopkeu kun kewö toroqeba jii mötket, “Suepkö bemtohoñi mi kewö: Azi kunñan nejoñ (nemuya) kötñi memba nanje nup gölmeje anda alök. ³²Kötñi mi morö közözömñi. Mi nene köt pakpak miengö eretñini akzapmö, jula wahöta yöha pakpak engongita qariba ip akña. Mewö aka kiniga könakemba neiñi neiñi kangota aipñini ip miangö böröñe alakze.” Mewö.

Yistkö dopkeu

Luk 13.20-21

³³Jisösnöh dumje kunbuk söpsöpkeu kun kewö jii mötket: “Suepkö bemtohoñi mi yist me flaua mem qariqarigö dop kewö akza: Ambi kunöh ‘Beret ohomam,’ jiba yist memba flaua amae (dis) karöbut miangören mindiriba melenqelen aka anda anda tari körekñanök qariyök.” Mewö.

Jisösnöh denöwögöra söpsöpkeuñi keuñi jiyök?

Mak 4.33-34

³⁴Jisösnöh keu pakpak mi könagesö yengöra söpsöp keunöh jiyök. Söpsöpkeu qahö mewö keu kun qahö jii mötket. ³⁵*Mewö aiga Anutunöh

* 13:35: Sum 78.2

kezapqetok azi kun sölölöhöiga keu kun jiyöhi, mianjön öljambuk ahök. Yanjön keu mi kewö jii ahöza, “Nöngö numbunan mönö amqeiga söpsöp keunji keunji jimam. Anutunöŋ gölme miwikŋaiiga asuhuyöhi, nalö miangöreŋök keu tölapŋe ahöi mala korini, nöjön mönö keu mi aukŋe jim indel-mam.” Mewö.

Dorowetkö söpsöpkeugö könaŋi

³⁶ Jisösnöŋ söpsöp keu mi jim teköba ambazip kambu ketani enjömosöta miri uruŋe öngöyök. Öngöiga gwarekurupŋan yanjöreŋ kaba kewö qe-siba jiget, “Dorowet nene nupnöŋ asuhuyöhi, gi mönö söpsöp keu miangö könaŋi jim asarim nenjiman.”

³⁷ Mewö jigetka kewö melenäda jiyök, “Suep gölmegö azi öljän mönö nene kötŋi ölöŋŋi ölöŋŋi qesiŋ gilakza. ³⁸ Nene nup mi gölmegö kantri pakpak. Nene kötŋi ölöŋŋi mi bemtohongö nahönbörat enjöra jizal aka dorowet mi azi bölöŋangö nahönbörat yenjöra jizal. ³⁹ Keröknöŋ mi qesiŋ gilöhi, mi Bölöŋangö Tonjöra jizal. Padi misimisi nalöŋi mi gölmegö nalöŋan tekömawanjö nalö ketani mi. Padi misimisi ambazip mi Suep garata yenjöra jizal.

⁴⁰ “Dorowet tokoba könöpnöŋ ohoget jemawi, miangö dop mönö gölmegö nalöŋan tekömawanjö nalö ketane asuhuma. ⁴¹ Suep gölmegö azi öljän mönö garataurupŋi melaim enjiiga kaba keu areŋ bölöŋi pakpak Kraistkö bemtohoŋ uruŋe siŋgisöndok akingö kondorakzawi, mi qeapköba

mindinğöme aka bölöñji meme ambazip pakpak mi qözöla qezaköm engime. *

⁴² “Mewö mindinğindinğ aka ambazip mi gil engigetka owen imarurubuk jeba ahözawi, mianğöreñ geme. Mianğöreñ gemeañön mönö sahöt gigilahöba irimñini yöhözömgögetka qetñi qeri malme. ⁴³ Nalö mianğöreñ ambazip solanñi mienñön mönö wehön tandök aka Iwiñinanğö bemtohoñ uruñe asariba mal öngöme. Kunñan urukezapñambuk maljawi, yañön mönö keu mi kezap ala möt kutuma.” Mewö.

Guli dötnam mesamesambötñanğö söpsöpkeu

⁴⁴ “Suepkö bemtohoñji mi guli damandanğ söñgörüñi öngöngörüñi mianğö dop kewö akza: Mi nupnöñ mesambötket ahöiga azi kunñan mi miwikñaiba anğön köla kunbuk gölmenöñ mesambörök. Mesamböta mianğöra söñgaiba anda sukinapñji pakpak bohonñji memegöra ali monenğ kaiga mianñön nup gölme mi bohonñji meyök.” Mewö.

Sorom kötñanğö dopkeu

⁴⁵ “Suepkö bemtohoñji mi stua azigö dop ala söpsöp keu kun kewö jimam: Yañön sorom kötñi ekjeritñambuk jaruba malök. ⁴⁶ Jaruba mala sorom kötñi mohot söñgörüñi ketanñi miwikñaiba anda sukinapñji pakpak bohonñji memegöra ali monenğ kaiga mianñön sorom kötñi mi bohonñji meyök.” Mewö.

* **13:41:** Keu areñ (ideology) bölöñji yauenğ mötmöt, komyunist, maslim aka mötmöt areñ tosatñi mi ambazip jöhöm engiget qakögetka malmalñinan böliba sohomakzawi, garata yañön mönö mi pakpak qeapköba mindinğöme.

Mösak örörögö söpsöpkeu

⁴⁷ “Suepkö bemtohoŋi mi mösakö dop ala söpsöpkeu kun kewö jimam: Mi o aŋgönöŋ gilget geiga söra tandökŋini könaŋi könaŋi gegetka eŋgömeme tokoyök. ⁴⁸ Tokoi kokolak qeiga ambazipnöŋ mi örögetka körökŋe koriga eta tata söra ölopŋi kewöta sakapnöŋ tokogetmö, bölöŋi mi gilgetka anök. ⁴⁹ Keu miangö dop mönö gölmegö nalöŋan tekömawangö nalö ketane asuhuma. Suep garata yeŋön kaba ambazip bölöŋi mi solanŋi miengöreŋök kewöt eŋgime. ⁵⁰ Kewöt eŋgiba ambazip bölöŋi mi gil eŋgigetka owen imarurubuk jeba ahözawi, miangöreŋ geme. Miangöreŋ gemeaŋön mönö sahot gigilahöba irimŋini yöhözömgögetka qetŋi qeri malme.” Mewö.

Keu kötŋi walŋi aka dölökŋi

⁵¹ Jisösnöŋ söpsöp keu mi jim teköba kewö qesim eŋgiyök, “Keu pakpak jizali, mi möt asarize me qahö?” Qesim eŋgiiga melenŋa “Oŋ!” jiget. ⁵² “Oŋ!” jigetka kewö jii mötket, “Miri toŋan miriŋangö köweŋeyök inap yuai walŋi aka dölökŋi uzeta alakza. Miangö dop Köna keugö böhi pakpak Suep bemtohoŋgö gwarekurupŋi akeri, yeŋön mönö mewöyök uruŋinaŋgö köweŋineyök keu aködamunŋinambuk dölökŋi aka keu ölop sorokŋi walŋi uzeta jimakze.” Mewö.

Nazaret yeŋön Jisös andö qeget.

Mak 6.1-6; Luk 4.16-30

⁵³ Jisösnöŋ dopkeu mi jim teköba miri gölme mi mosöta anök. ⁵⁴ Anda malqarip taonŋe aŋgota köuluk miriŋine öngöba Buŋa keu kusum eŋgiyök.

Kusum enjiiga auruba welipköba kewö jiget, “Yei! Kezapjupjup! Yanön mötkutukutu ki aka anğöletot kukösumñinambuk mi mönö denikeyök meza? ⁵⁵ Azi ki mönö miri kiangö mitimqege azigö nahönña. Namñangö qetñi Maria aka munurupñi Jeims, Josef, Saimon aka Juda. Mi ölop mötzin. ⁵⁶ Nenurupñan mönö körek sutnine ki malje. Miangöra yuai pakkak ki mönö denikeyök memba kaba akza?”

⁵⁷* Nazaret yenön mewö jigetka uruñinan bölüiga miangören qaköget. Qakögetmö, Jisösnöñ kewö jii mötket, “Kezapqetok azi mi nanñi taonöñ aka nanñi mire jijiwilit ak wañgimakzemö, miri tosatñe mewö qahö.” ⁵⁸ Mewö jiiga mötnaripñinan qahö asuhuiga yangisenñinağöra aka anğöletot kukösumñinambuk mi miangören gwötpuk qahö meyök. Mewö.

14

Jongö jölñi kutugetka kömuyök.

Mak 6.14-29; Luk 9.7-9

¹ Nalö miangören gölme bahönangö (Galili prowinsgö) kiñ Herod yanön Jisösgö qetbuñani mörök. ² Mi möta welen-qequeurupñi yengöra kewö jiyök, “Mi mönö Jon O-melun azia. Yanön mönö kömupnöhök wahöta nupñi meiga anğöletot kukösumñinambuk asuhumakze.” Waimanjat möta mewö jiyök.

³* Mi kewögöra jiyök: Herodnöñ munñi Filipkö anömñi Herodias ölöñ meiga Jon O-melun azinöñ kiñ jim wañgiiga opotöröp melaim enjiiga anda

* 13:57: Jon 4.44 * 14:3: Luk 3.19-20

Jon memba jöhöba kösö mire al wanğiget. ⁴*Jonön Herodköra keu kewö jiyök, “Gi qambötki memba mala Köna keu onğitzan.” ⁵Mewö jiiga Herodnön Jon qeget kömumapkö mörökmö, könagesö yeñön Jongöra mötketka kezapqetok azia malöhi, mianğöra könagesö yeñğöra kenğötñi mörök.

⁶Kenğötñi mörökmö, Herodkö ahياهو nalöñan kaiga ketaurupñan tokoba tatketka Herodiasgö böratñan yeñgö jeñine danis aliga Herodnön mianğö eksihimñi gwötpuk mörök. ⁷Mianğöra ambi seram mianön wani yuaigöra qesibawak, kiñnön mi tököm wanğimangö keu jöhöba keu mi jöjöpañ keunön jim köhöiyök. ⁸Mewö jim köhöiiga namñan ambi seram mi kuñgum wanğiiga kewö jiyök, “Mönö qesinöñga Jon O-melun azigö jölñi yandigetka nöropñi memba ki kaba köndenön niñgima.”

⁹Mewö jiiga kiñgö uruñan kömbuhiiga wösöbirik mörökmö, jöjöpañ keuñan jöhöi ketaurupñan mi mötketka yeñgö jemesoholñine etpapuköra möta nöropñi wanğimegöra jim kutuyök. ¹⁰Mewö jim kutuba opotöröpñi kun melaiba jiyök, “Gi mönö kösö mire anda Jongö jölñi yandiba nöropñi memba kaman.” ¹¹Mewö jiiga Jongö nöropñi köndenön ala memba kaba ambi seram mi wanğiiga memba anda namñi wanğiyök. ¹²Jongö gwarekurupñan mianğö buzupñi möta anda qamötñi memba qak-sirigö köt köteñnön ala löm kölget. Löm köla anda keu mi Jisös jiget mörök. Mewö.

*Jisösnön azi 5000 nene gumohom enğiyök.
Mak 6.30-44; Luk 9.10-17; Jon 6.1-14*

* **14:4:** Lew 18.16; 20.21

¹³ Jisösnöŋ Jongö kösohotŋi möta miri mi mosöta waŋgenöŋ öngöba gölme kötikŋi kunöŋ nanŋinök malbingöra anget. Ambazip kambu yeŋön mianğö buzupŋi möta taon aka miriŋini mosöta Jisösgö andöŋe wuatangöba gölme köna anget. ¹⁴ Angetka Jisösnöŋ waŋgenöhök eta ambazip kambulelemebe engeka yeŋgöra wösöŋi mörök. Wösöŋi möta sutŋine kawöl enğöhöi malgeri, mi mem ölöwak enğiyök.

¹⁵ Mewö aka mali mare aiga gwarekurupŋan Jisösgöreŋ kaba kewö jiget, “Böhi, nini gölme kötikŋi kianğöreŋ malinga wehön jeŋan teköba gemamgö akza. Mianğöra gi ölop ambazip kambu ki melaim enğinöŋga miriŋi miriŋi miengöreŋ anda numbu neneŋini söŋgörüŋi memba neme.”

¹⁶ Mewö jigetmö, Jisösnöŋ kewö jii mötket, “Yeŋön ölop kianğöreŋ tatme. Enön mönö nanŋinak i nene gumohom enğime.” ¹⁷ Mewö jii möta jiget, “Nini beret 5 aka söra yahöt miyök memba maljin.” ¹⁸ Mewö jigetka jiyök, “Mönö mi memba kaba niŋgime.”

¹⁹ Mewö jiba ambazip kambu mi kegwan luplupnöŋ eta tatmegöra jim kutum enğiiga tatket. Tatketka beret 5 aka söra yahöt mi memba Suenöŋ ui öngöiga kötuetköba beret mindipköba gwarekurupŋi enğiiga ambazip kirip dop mendeŋda enğiget. ²⁰ Mendeŋda enğigetka ambazip körekmakörek memba nem timbireŋ aket. Nem timbireŋ aka nene kitipŋi kitipŋi mosötkeri, mi gwarek yeŋön qezakögetka sakap 12 mianğöreŋ geba kokolak qeyök. ²¹ Azi beret negeri, yeŋgö jaŋğöŋini mi 5000. Ambi nahönbörat yeŋgö jaŋğöŋini mi qahö meget. Mewö.

Jisösnöŋ o aŋgö qakŋe tiba tiba anök.

Mak 6.45-52; Jon 6.15-21

²² Neget teköiga Jisösnöŋ miangöreŋök gwarekurupŋi jim kutum eŋgiba kewö jiyök, “Inini mönö waŋgenöŋ öŋgöba qeljiŋe o aŋgö kutuba likepŋe anme. Nöŋön ölop nalö sutŋe ambazip kambu ki melaim eŋgibagun kamam.”

²³ Ambazip melaiba eŋgubula kunduje öŋgöba nanŋök mala köuluköyök. Köuluköba mali mare aiga kunduje nanŋik kötikŋi tarök. ²⁴ Tariga waŋgeŋinan lök o aŋgö bibiŋe köröwen aniga luhutnöŋ angerangöreŋök gila kaiga sirinöŋ waŋgenöŋ giliŋa kekwilik anda kayök.

²⁵ Mewö ahiga miri awöraŋgöiga (3-6 kilok) miangöreŋ Jisösnöŋ o aŋgö qakŋe tiba tiba gwarekurupŋi yeŋgöreŋ kayök. ²⁶ Kaba o aŋgö qakŋe tiba tiba kaiga gwarekurupŋan mi eka keŋgötporiŋ aka “Köwet Soŋgoriŋnöŋ kaza,” jiba sömbuŋini möta qeta silatket.

²⁷ Qeta silatketmö, Jisösnöŋ miangöreŋök keukeu jiba kewö jii mötket, “Alaurupni, mönö ewebibiŋinambuk saitŋgit malme. Nanak kazal. Keŋgötŋini kude mötme.” ²⁸ Mewö jii möta Pitönöŋ melenŋa kewö jii mörök, “Göŋön Kembuya akzan ewö, mönö ölop jinöŋga nöŋön o qakŋe tiba tiba göhöreŋ kamam.”

²⁹ Jisösnöŋ mi möta “Ölop kanöŋ,” jiyök. Mewö jüiga Pitönöŋ waŋge mosöta o aŋgö qakŋe tiba tiba könahiba Jisösgöreŋ anök. ³⁰ Könahiba anökmö, luhutnöŋ gwötpuk gili mi eka keŋgötporiŋ aka könahiba o uruŋe geba kewö qerök, “Kembu, bauköm niŋginöŋ.” ³¹ Qeriga Jisösnöŋ miangöreŋök

böröñi börañda Pitögö böröñe memba kewö jiyök, “Mötnaripki morörökñi. Mönö wuanöñgöra uruyahöt akzan?”

³² Mewö jiba bauköm wañgii wañgenöñ öñgöyohotka luhutnöñ nöñ qeba göröñ alök. ³³ Göröñ aliga azi wañgenöñ tatkeri, yeñön waikñi memba möpöseim wañgiba kewö jiget, “Alakña, gi Anutugö nahönña.” Mewö.

*Jisösnöñ Genesaret mala mem ölöwak nup meyök.
Mak 6.53-56*

³⁴ O añgö kutuba likepñe Genesaret mire añgota wañge mosöta saknöñ geget. ³⁵ Saknöñ gegetka miri miangö ambazipnöñ Jisös möt kutum wañgiget. Möt kutum wañgiba keu algetka miri pakpak kösutñe tatkeri, miangören aniga buzupñi möta kawöl ambazip körek enjuañgita Jisösgören kaget. ³⁶ Kagetka kinda Jisös malukuñangö suñe misiribingö ulet wañgiba malget. Misirigeri, körek yeñön mönö ölöwak teköget. Mewö.

15

Ambösakon yeñön keu kusum sohoget.

Mak 7.1-13

¹ Miangö andöñe Farisi (Köna keugö kapañkölköl) aka Köna keugö böhi tosatñan Jerusalem sitiyoök Jisösgören kaba kewö qesim wañgiget, ² “Göhö gwarekurupkan wuanöñgöra köna walöñda ambösakoninañgö silikñini qeze? Yeñön mönö böröñini sañgonña dom-amöt qahö qeba töndup könahiba nene neze?”

³ Mewö qesim wañgigetka kewö jii mötket, “Nanñinak mönö wuanöñgöra ambösakoninañgö

siliknini wuatangöbingöra köna walönda Anutugöreŋ jöjöpaŋ keu qeze? ⁴ *Miangö keuŋi kun kewö: Anutunöŋ kewö jim kutuyök, ‘Iwinamgi mönö göda qem etkimakŋan,’ aiga ‘Kunŋan iwiŋi me namŋi qesuahömawi, i mönö qegetka kömuma.’

⁵ “Mewö jim kutuyökmö, iŋini keu mi oŋgita kewö jimakze, ‘Kunŋan iwiŋangöra me namŋangöra kewö jima: Wösöni mötzal. Nöŋgö naŋgönaŋgö yuaini buŋa qem aŋgubanak, mi lök Anutugö saiwap naluköra kewöta albi ahöza. Kunŋan mewö jiba iwiŋi me namŋi göda qem waŋgamawaŋgö dop qahö akza.’

⁶ “Mewö jiba siliknini walŋangöra aka Anutugö jöjöpaŋ keuŋi utalgetka omaŋi aka pömsöm qemakza. Mi qahö dop kölja. ⁷ O urumelengö silesile ambazip, kezapqetok azi Aisaianöŋ mönö engö könaŋamŋini törörök qeljiŋe indela kewö jii ahöza, ⁸ *‘Ambazip kambu kianön mönö numbu jitŋinan ölöŋanök göda qem niŋgimakzemö, uruŋinan nönöŋgan ak niŋgiba kungen algetka köröwen ahöza.

⁹ Mewö ahöiga nöŋgö waikni öne töhön memba möpöseim niŋgimakze. Köna keu kusum engibin, jiba salupŋe ambazip yeŋgö jimkutukutuŋini mi numbu o alakze.’ ” Mewö melen engiyök.

Azi uru mi denöwö tölohoba lantiza?

Mak 7.14-23

¹⁰ Jisösnöŋ ambazip kambu kunbuk engoholi kagetka kewö jii mötket, “Iŋini mönö keu

* **15:4:** Eks 20.12; 21.17; Dut 5.16; Lew 20.9 * **15:8:** Ais 29.13

ki kezap ala möt asarime. ¹¹ Yuai azigö numbuñeyök uruñe gemakzawi, mianñon qahö tölohom wañgimazapmö, nannji numbuñeyök keu erakzawi, mianñon mönö tölohom wañgimakza.”

¹² Mewö jii mötketka gwarekurupñan kaba kewö qesiget, “Farisi (Köna keugö kapañkolköl) yeñon keu mi mötket engui uruñinan bölizawi, mi mötzan me qahö?” ¹³ Qesigetka kewö meleñnok, “Nöñon warök pakpak nöngö Suep Iwinan qahö kömöröhi, mi mönö jalöñinambuk qözölmam. ¹⁴ *Muat, i mönö engömosötme. Yeñon ‘Jegömöl ambazip enğuangitpin,’ jimakzemö, nannjini jeñinan mönö gömöliza. Jegömöl kunñan jegömöl alañi kun böröñe memba wañgitma ewö, yetkön mönö mohotñe lömnöñ geba etkuma.”

¹⁵ Mewö meleñniga Pitönöñ jiyök, “Dopkeu mianğö könañi mönö jim asarinöñ mörin.”

¹⁶ Mewö jiiga Jisösnöñ jiyök, “O alaurupni, inñini mewöyök toroqeba mötmötñini ölopñi qahö akze me? ¹⁷ Yuai pakpak azi numbuñeyök uruñe gemakzawi, mi kömgokñe geba yaigep erakza. Mi möt kutuze me qahö?

¹⁸ *“Mi erakzapmö, keu uru könömñeyök kota numbuñeyök erakzawi, mianñon mönö tölohom wañgimakza. ¹⁹ Ambazip uru könömñineyök yuai kewöñi asuha korakza: Keu bölöñi mötmöriba suña jinan memba ambazip enğuget kömumegö mörakze. Qesabulum aka serowilin akingö mörakze. Yonğorö membingö mörakze. Jitnöñ alal keu muneñi jibingö mörakze. Andöqege keu yöhösañ jiba Anutu mepaiköbingö mörakze. ²⁰ Yuai

* **15:14:** Luk 6.39 * **15:18:** Mat 12.34

mewöŋan mönö ambazip tölohöm enġimakzapmö, böröŋini qahö sanġonda nene nemakzei, mianġön azi kun qahö tölohömakza.” Mewö.

Kenan ambi kunġan kapan köla köuluköyök.

Mak 7.24-30

²¹ Jisösnöŋ Genesaret gölme mosöta siti qetŋiri Taiö aka Saidon mietkö distrik qetŋi Fonisia mianġö uruŋe anök. ²² Aniga Kenan ambi, gölme mianġö toŋi kunġan kaba Jisös uleta kewö qeta jiyök, “Kembu, Deiwidkö gwölönarökŋi, mönö ak kömum niŋgiman! Ömenöŋ böratni kölköljinjin ak waŋgiiga sihimbölä ketanji mörakza.”

²³ Qeta jiyökmö, Jisösnöŋ keu kun qahö melenök. Mewö aiga gwarekurupŋan kaba kewö kuŋgum waŋgiba jiget, “Ambi mi sahöta qeta könanine kazawaŋgöra mönö bauköm waŋinöŋga anma.” ²⁴ Mewö jigetka melenök, “Iwinan Israel könagesögö lama sohosohöŋi miyöhök amöt qem enġimangöra aka melaim niŋgiiga kazal.” ²⁵ Mewö melenniga ambi mianġön kösutŋe kaba simin kölä waŋgiba jiyök, “Kembu, mönö bauköm niŋinöŋ!”

²⁶ Mewö jiyökmö, Jisösnöŋ kewö melen waŋgiyök, “Qahö, morö yeŋgö mirinneyök beret memba kiam enġiinga qahö dop kölbapuk. Juda nini kianurup enġö qetŋini kiam qerakzin. Nöŋön mutuk Juda ambazip bauköm enġibiga kantri tosatŋi enġön mönö kiamgö dop mamböta malme.”

²⁷ Melen waŋgiyökmö, ambinöŋ jiyök, “Kembu, mi öläp mötzalmö, kiam moröŋi yeŋön mönö mewöyök toŋinaŋgö tebolnöhök nene boromŋi eriga nemakze.” ²⁸ Mewö jiiga Jisösnöŋ kewö jii mörök, “O ambi, göhö mötnariŋki mi ketanji.

Miangöra ulet ningzananğö ölni mönö asuhuma.” Mewö jii möta bōratņan aua miangōreņök ölöwahök. Mewö.

Jisōsnōņ kawöl ambazip sehisehiņi meiga ölöwaket.

²⁹ Jisōsnōņ gōlme mi mosōta kaba Galili o aņğögō jitņe kaņgota kunduje oņğōba eta tarök.

³⁰ Tariga ambazip kambulelebenōņ yangōreņ kaba ambazip kewōņi eņguanğitket: Simalokon aka jegōmōl ambazip, tosatņi kōna bōrōņini heramheramğōņi, tosatņi keuņini mōtōkņi aka kawöl tosatņi gwōtpuk eņğōhōi malgeri, mi eņguanğita Jisōsgō kōna kōsutņe al eņğigetka mem ölöwak eņgiyök.

³¹ Mem ölöwak eņgiiga ambazip keuņini mōtōkņi yeņōn keu jigetka kōna bōrōņini heramheramğōņi yeņōn ölöwaka diņğigetka simalokon yeņōn kōna tiba anda kagetka jeņini dōndōņğōņi yeņōn je uba eketka ambazip kambu yeņōn mi eka welipkōba Israel neņğō Anutunini mōpōseiget. Mewö.

Jisōsnōņ azi 4000 nene gumohom eņgiyök.

Mak 8.1-10

³² Jisōsnōņ gwarekurupņi eņgoholi yangōreņ kagetka kewō jii mōtket, “Nōņōn ambazip kambu kienğōra wōsōni mōtzal. Yeņōn nōņğōreņ kaba wehōn karōbut lōk mala kotketka nenenini qahōwahiga ekzal. Kōnanōņ anda mala kemaņe jeņini gili tirinbirin akepukōra i öne melaim eņgimamğō tōkōzal. Miangōra i nene gumohom eņgimamğō mōtzal.”

³³ Mewö jii gwarekurupņan melenđa kewō jiget mōrök, “Gōlme qararaņkōlkōlņe kianğōreņ neņōn

mönö denikeyöhök numbu nene gwötpuk mi-wikñaiba ambazip kambulelembe ki gumohom engibinak?” ³⁴ Mi möta Jisösnöñ kewö qesim engiyök, “Engöreñ beret dawik ahöza?” Qesim engiiga “Beret 7 aka söra moröñi tosatñi ahöza,” jiget. ³⁵ Jigetka Jisösnöñ ambazip kambu mi gölmenöñ geba tatmegöra jim kutum engiiga geba tatket.

³⁶ Geba tatketka beret 7 aka söra mi memba Anutugö saiwap jiba mindipköba gwarekurupñi engiiga yeñön mi ambazip kambu dop toto qem engiget. ³⁷ Toto qem engigetka nembra nem timbireñ-göget. Nem timbirengöba nene kitipñi mosötket geyöhi, mi sakap 7 miangöreñ qezakögetka numbuñe qeyök. ³⁸ Azi nene negeri, yeñgö jañgöñini mi 4000. Ambi nahönbörat yeñgö jañgöñini mi qahö meget. ³⁹ Jisösnöñ ambazip kambu melaim engiiga angetka nanñi wañgenöñ öngöba Magadan gölmenöñ anök. Mewö.

16

Böhi tosatñan angöletot ekingöra kapañ kölget.

Mak 8.11-13; Luk 12.54-56

¹ *Farisi (Köna keugö kapañkölköl) aka Sadyusi (Jike nupkö kapañkölköl) tosatñan Jisösgöreñ kaba keugö bötaknöñ örömap-köra esapköm wañgiba kewö qesiget, “Mönö jinöñga Suepnöhök angöletot kun asuhuiga ekin.” ² Mewö jigetka kewö meleñnök, “Wehön gemangö ahiga miangöreñ kewö jimakze, ‘Suepnöñ pisi hizawañgöra uran wehön ölöpñi akña.’

* **16:1:** Mat 12.38; Luk 11.16

³ “Mewöyök söñanök kewö jimakze, ‘Suepnöñ pisihiiga kousunöñ töwizawanğöra mönö kie luhut gilma.’ Mewö mewö jiba suepkö tandökñi eka kie wehöngö könañi ölop kewörakzemö, nalö maljini, mianğö aiwesökñi kewötpingö qahö mötze. Mi qahö dop kölja. ⁴ *Ambazip kambu bölöñi gölmenöñ mala qesabulum ahakzei, yeñön Anutugö aiwesökñi asuhumapköra kapan kölakzemö, Anutunöñ kezapqetok azi Jonagö aiwesökñi lök enğıga aiwesök tosatñi qahö toroqeba kondel enğima.” Mewö jiba enğömosöta kungen anök. Mewö.

Farisi aka Sadyusi yeñön wösökömbuk ewö akze.

Mak 8.14-21

⁵ Jisösnöñ gwarekurupñi yembuk o anğö kutuba likepñe anğota semön memingö ölum enğuyöhi, mi eket. ⁶ *Mi eketka Jisösnöñ kewö jii mötket, “İñini Farisi aka Sadyusi pati yahöt yeñğö wösökömbukñini aka gipñi kakñi mietköra mönö galömñini meme. Mi ölopñanök qahö kewöta andö qegetka mietkön mönö yist ewö qariba mem bölim enğimahot.”

⁷ Jiiga keu pasetñi mi qahö möt asariba sutñine kewö eraum mötket, “Nini beret qahö memba kazin. Mianğöra jiza me denöwö?” ⁸ Mi eraum mötket kezapñe geiga kewö jii mötket, “O inñini mötnaripñini morörökñi, wuanöngöra ‘Beret qahö mezin,’ jiba nanñini eraum mötze? ⁹ *Nöngö könañamni mi wuanöngöra qahö möt kutuze? Nöñön beret 5 mi 5000 yeñğöra mindipköbiga

* **16:4:** Mat 12.39; Luk 11.29 * **16:6:** Luk 12.1 * **16:9:** Mat 14.17-21

mianğö kitipni qezakögetka könde dawiknön geba numbuñe qeyök? Mi ölum enğuza me qahö?

10 **“Mewöyök beret 7 mi 4000 yengöra mindipköbiga mianğö kitipni qezakögetka sakap dawiknön geba kokolak qeyök? Mi ölum enğuza me qahö? 11 Ni beretköra keu qahö jizali, mi denöwö aka qahö möt kutuze? Nönön beretköra qahöpmö, Farisi aka Sadyusi pati yengö wösökömbukñini aka gipni kakni kewöta andö qemegöra jizal.”* 12 *Mewö jiiga mianğöreñök keuñanğö könañi kewö möt asariget, “Aha! Plaua mem qariqari yistkö galöm mem aņgubingöra qahö jiyökmö, Farisi pati aka Sadyusi pati yengöreñ keu lolonqaloñi andö qebingöra jiyök.” Mewö.*

Pitönön Jisösgö könañi jim miwikñaiyök.

Mak 8.27-30; Luk 9.18-21

13 *Jisösnön Sisaria Filipai taongö kösutñe anda mianğöreñ gwarekurupni kewö qesim enğiyök, “Ambazipnön Suep gölmegö azi ölni nöngöra denöwö jimakze? Ni niñia akzal?” 14 *Jiiga melenđa kewö jiget, “Tosatñan ‘Gi Jon O-melun azia akzan,’ jimakzemö, tosatñan ‘Gi Elaija akzan,’ jimakze aka tosatñan toroqeba kewö jimakze, ‘Gi Jeremaia me kezapqetok azi walni yengöreñök kun akzan.’”*

15 *Mewö jigetka kewö qesim enğiyök, “Aka nanñinak nöngöra denöwö jize? Ni niñia akzal?”*

16 **Qesim enğiiga Saimon Pitönön melenđa jii mörök, “Gi Amötqeqe Tonji Kraist aka malmal Tonji Anutugö Nahönñi akzan.”*

* **16:10:** Mat 15.34-38 * **16:14:** Mat 14.1-2; Mak 6.14-15; Luk 9.7-8 * **16:16:** Jon 6.68-69

17 Mewö jiiga Jisösnöŋ melenđa kewö jii mörök, “O Saimon Jonagö nahönŋi, gölme azi sep busuŋambuk kunŋan qahöpmö, nöŋgö Iwini Suep mire maljawi, yaŋön mönö keu mi göhöreŋ indelök. Mianğöra göŋön mönö simbawoŋ akzan. 18 Nöŋön kewö jibi mötman: Gi Pitö (nanine keunöŋ jamönjiŋ) aknöŋga nöŋön jamönjiŋ mianğö qakŋe urumelen könagesönaŋgö tandöŋi albi naŋgöm enğinöŋga uruŋini möhamğöba köhöiba kinme. Göŋön i galöm köl enğinöŋga kömup Toŋan i senjom mirigö kiripo naŋguŋe öröm enğimamğö osima. Ömewöröme tosatŋi yeŋgö kukösumŋinan mewöyök i köndenđa luhut al enğibingö osime.

19*“Nöŋön Suep bemtohoŋaŋgö ki moröŋi yahöt gihimam. Gi gölmenöŋ siŋgisöndok jöhönöŋga mianöŋ mönö Suep mire mewöyök jöhöjöhöŋi ahöma. Gi gölmenöŋ siŋgisöndok mosöta pösatnöŋga mianöŋ mönö Suep mire mewöyök pösatpösatŋi ahöma.” 20 Mewö jiba Amötqeŋe Toŋi Kraist ahöhi, mi aukŋe jiget kunŋan mötpepuköra gwarekurupŋi yeŋgöra soŋgo köhöikŋi al enğiyök. Mewö.

Jisösnöŋ kömumamğö keuŋi jiyök.

Mak 8.31–9.1; Luk 9.22-27

21 Nalö mianğöreŋök Jisösnöŋ könahiba gwarekurupŋi yeŋgöra keu kewö indelök, “Nöŋön Jerusalem anda sihimbölö gwötpuk mötman. Kantrigö jitŋememe, jike nup galöm aka Köna keugö böhi yeŋön nuŋgugetka kömumam. Kömumbiga wehön karöbut aiga kömupnöhök wahötmam.”

* **16:19:** Mat 18.18; Jon 20.23

²² Jisösnöŋ mewö jüiga Pitönöŋ öröm waŋgiba göraŋe anda könahiba qetala kewö jim waŋgiyök, “O Kembu, mi nalö kunöŋ asuhum gihibapüköra Anutunöŋ mönö sel jöhöm gihima.” ²³ Qetal waŋgiiga lilingöba Pitö kewö jim waŋgiyök, “Gi keu mötmörizani, mi Anutugöreŋ keuya qahöpmö, gölme ambazip aka Satangö sihima. Gi nöŋgö köna utumamgö mötnöŋga urunan böliza. Miangöra Satan, gi mönö döлки nöŋgö jemesoholneyök ke-salnöŋ!” Mewö.

Kraist wuatangöbingö söŋgörüŋi

²⁴ *Nalö miangöreŋ Jisösnöŋ gwarekurupŋi keu kewö jii mötket, “Kunŋan nöŋgö andöne kamamgö mötzawi, yaŋön mönö nanŋi urusileŋangö sihim kömbönaŋi bölöŋi andö qeiga sisitŋi megetka sihimbölö mi bisimakŋa. Mi maripomnöŋ kömumawaŋgö dop mökösoŋda ni nuatangöba kama. ²⁵ *Kunŋan malmalŋi nanŋangöra aŋgön köla nanŋi imbi-imbi maljawi, yaŋön mönö malmalŋi ölni jöhöi sohoma. Sohomapmö, kunŋan gölmegö malmalŋi nöŋgöra aka köleŋda tököm niŋgimawi, yaŋön mönö malmal ölnangö könaŋi miwikŋaiba köhöiba malma.

²⁶ “Kunŋan gölmeŋi gölmeŋi miengö öröyuaiŋi pakpak köl öröiga buŋaŋi an teköiga uruŋangö malmalŋi mem sohoba silebile mala kömuiga Anutunöŋ keuŋi jim teköiga uŋaŋan ayuhuiŋa qahö dop kölma. Sukinapŋi mianöŋ mönö urusösöŋgai qahö ak waŋgima. Qahöpmahöp. Körek neŋön mönö bohonini jöhöm aŋgubingö osibin.

* **16:24:** Mat 10.38; Luk 14.27 * **16:25:** Mat 10.39; Luk 17.33; Jon 12.25

27 **“Suep gölmegö azi ölnan könangep Suep garata töröni yembuk ki etketka Iwiñangö asakmararani eka aurume. Nalö miangören mo-hot mohot nengö ahakmemenini kewöta likepni miangö dop nengima. 28 Nöñön keu ölni kun kewö jibi mötme: Kiangören kinjei, engö sutñineyök tosatnan Suep gölmegö azi ölnan kin aka asuhumawi, mi ek kutume. Jebuk mala kömupkö sihimbölöni qahö mötketka asuhum tñiriga mi ekne.” Mewö.*

17

Jisösgö sileje letotqetot ahök.

Mak 9.2-13; Luk 9.28-36

1 **Wehön 6 teköiga Jisösnöñ Pitö, Jeims aka Jeimsgö munni Jon enjuangita nanñinök kundunji köröpni kunöñ öngöba kötikne malget. 2 Malgetka jemesoholjine kiniga Jisösgö sile tandökñan letota murutni ahök. Jemesoholñan wehön jeni ewö kölköl-bilikbilikñambuk asariiga malukuñan tuat lalamni aka asakñambuk ahök.*

3 *Mewö aiga eketka Moses aka Elaija yetkön asuhum engiba Jisösbuk keukeu jiget. 4 Jigetka Pitönöñ könahiba keu jiba Jisösgöra kewö jiyök, “Kembu, neñön kiangören uruölöwak mötzin. Miangöra sihingan mötzan ewö, nöñön ölop koum karöbut qemam. Göhö kun, Mosesgö kun aka Elaijagö kun.”*

* **16:27:** Mat 25.31; Sum 62.12; Rom 2.6 * **17:1:** 2 Pitö 1.17-18

⁵ *Mewö jiba kiniga unuñunuñ tuat lalamñi asakmararañambuk kunöñ eta aumñan esuhum enñiiga miangö uruñeyök qet kun kewö eriga mötket, “Azi ki mi nani wölböt nahöna. Nöngö urusihimni ketañan mönö yangören ahöza. Mönö yangö keuñi möta malme.” ⁶ Gwarek yeñön keu mi möta jönömñini undui sipköba gölmenöñ eta kenğötñini gwötpuk mötket.

⁷ Mewö mötketka Jisösnöñ yengören kaba sileñini oseiba kewö jii mötket, “Mönö wahötket. Kenğötñini kude mötme!” ⁸ Keu mi möta uba wahöta tosatñi qahö enğeketmö, Jisösnöñ nanñök kiniga eket. Mewö.

Jon O-melun-azi mi Elaijagö salupñi akza.

⁹ Kunduñeyök etketka Jisösnöñ sörökñi miangören kewö jim kutum enğiyök, “Inini yuai ekzei, miangö buzupñi mi ambazip kun kude jiget mötme. Suep gölmegö azi ölnan kömupnöhök wahöriga miangö andöñe mi ölop jim asariba malme.”

¹⁰ *Mewö jim kutum enñiiga gwarekurupñi karöbut yeñön Jisös kewö qesim wangiget, “Köna keugö böhi yeñön keu kewö mi wuanöngöra jimakze, ‘Kezapqetok azi Elaijanöñ mönö mutuk Suepnöhök eriga Amötqeqe Toñan miangö andöñe asuhuma?’ ”

¹¹ Qesim wangigetka melenđa kewö jiyök, “Elaijanöñ mutuk eta asuhuba malmal pakpak möhamgöma. Keu mi ölnapmö, ¹² *nöñön kewö jibi mötme: Elaijanöñ lök eta asuhuyökmö, i

* **17:5:** Jen 22.2; Dut 18.15; Sum 2.7; Ais 42.1; Mat 3.17; 12.18; Mak 1.11; Luk 3.22 * **17:10:** Mal 4.5 * **17:12:** Mat 11.14

eka kōnanji qahō mōt kutugetmō, ambazipnōñ i nanñini sihimñini wuatangōba lañ ak wañgiget. Mewōñanōk Suep gölmegō azi ölnji mewöyök lañ ak wañgigetka Juda yengō börōñine geba sihimbölö mōtma.”¹³ Elaijagōra mewö jiba ölnja Jon O-melun azigōra keu jii mōtkeri, gwarek yeñōn mi mewö mōt asariget. Mewö.

Jisōsnōñ öme wuatangōi morōnōñ ölöwahök.

Mak 9.14-29; Luk 9.37-43

¹⁴ Jisōs aka gwarek karōbut yeñōn kunduneyök eta ambazip kambu yengören kagetka azi kunōñ Jisōsgō kösutñe kaba simin köl wañgiba kewö jii mörök,¹⁵ “Kembu, göñōn mōnō nahōni ak kōmum wañgiman. Kawölnōñ yöhōiga tala eta qeiga bözok mitiba semben auba sihimbölö gwōtpuk mōrakza. Nalö gwōtpuk tala kōnōpnōñ me onōñ gemakza.¹⁶ Nōñōn i wañgita gwarekurupki yengören kazalmō, yeñōn i mem ölöwak wañgibingō osize.”

¹⁷ Mewö jiiga melen wañgiba jiyök, “Yei, gölmegō yangiseñ aka misimkaulup ambazip, mōnō nalö dawik embuk mala qatōn engubiga Anutu qahō mōt narigetka sihimbölö mōtmam? I mōnō wañgita nōngören ki kaget.”¹⁸ Wañgita kagetka Jisōsnōñ öme mi jim wañgii mosōta ani morōnōñ nalö miangörenjök ölöwahök.

¹⁹ Ölöwahiga gwarekurupñan mi eka nanñinōk Jisōsgören kaba tata kewö qesim wañgiget, “Neñōn mōnō wuanōngōra mi naninōk wuatangōbingō osizin?”

²⁰ *Qesim wañgigetka kewö jii mōtket, “Mōtnaripñinan morörökñi akzawangōra mi

* **17:20:** Mat 21.21; Mak 11.23; 1 Kor 13.2

wuatangöbingö osize. Nöjön keu ölni kun kewö jibi mötme: Mötnaripñinañgö ölni mi nejon kötnangö dop ahöbawak ewö, enön ölop kundunji kiangö Tonangöra kewö jim kutubeak, ‘Gi mönö kundunji mi meköba wahöta anda likepñe endu alman.’ Mewö jiba möt narigetka miangö dop aiga endu anma. Anutu möt narigetka inahöm enjiiga yuai kungöra qahö qaköbeak.” ²¹ (Öme tandökñi mewöñi mi mönö köuluköba nene sinji mala wuatangöbin. Yuai murutñi kun ahinga qahö kota anma. Mewö.)

Jisösnöñ kömumangö Buñani jiiga yahöt ahök.

Mak 9.30-32; Luk 9.43b-45

²² Jisösnöñ gwarekurupñi yembuk mohotñe Galili prowins uruñe liliköba könanöñ angetka Jisösnöñ keu kötni kewö jii mötket, “Anutunöñ Suep gölmegö azi ölni mi gölme ambazip yengö böröñine al wanji gema. ²³ Geiga i qegetka kömuma. Kömuiga wehön karöbut aiga mönö kömupnöhök wahötma.” Gwarekurupñan mi möta uruñinan lömböriiga wösöbirik mötket. Mewö.

Jisösnöñ jöwöwöl jikegö takisñi alök.

²⁴ *Jisösnöñ gwarekurupñi yembuk Kaperneam taonöñ kañgotketka jöwöwöl jikegö takis meme azi yeñon Pitögoren kaba kewö qesim wanji get, “Engö böhiñinan jöwöwöl jikegö takisñi alma me qahö?”

²⁵ Qesim wanji getka “On!” jiyök. Miangö andöñe Pitönöñ miri uruñe öngöiga Jisösnöñ keu mutukñi kewö qesim wanji yök, “Saimon, gi denöwö mötmörizan? Denike yeñon kölköl-örörögö töwanji

* **17:24:** Eks 30.13; 38.26

aka takis tosatŋi mi gölmegö kiŋ azi kembu yeŋgöra alakze? Kantri toŋi neŋön me kian yeŋön mi algetka tokomakze?”

²⁶ Mewö qesim wangiiga melenđa “Kian yeŋön,” jiyök. Mewö jiiga Jisösnöŋ kewö jii mörök, “Mewö aiga kantri toŋi neŋön mi albinanğö dop qahö akzin. ²⁷ Mewö akzinmö, takis qahö alinga azi miengö uruŋinan bölipapuköra mönö anda kösö kawiki o anğönöŋ gilman. Gila söra mutukŋi öröba memani, mönö miangö numbuŋi mesaköba monen kötŋi miangören miwikŋaiman. Monen kötŋi mi azi yahöt netkö takisniranğö dop. Mönö mi memba enğiba miangön nöngö aka nangi takisniri alman.” Mewö.

18

Gwarek sutŋine danğon mutukŋi akza?

Mak 9.33-37; Luk 9.46-48

¹ *Nalö miangören gwarek yeŋön Jisösgören kaba kewö jiget, “Suepkö bemtohoŋ uruŋe danğon öngöŋgöŋi akza?” ² Mewö jigetka namande moröŋi kun qeri kaiga sutŋine ali kinök. ³ *Kiniga kewö jiyök, “Nöŋön keu ölni kun kewö jibi mötme: Uruŋini qahö melenđa nahönbörat ewö qahö akŋe ewö, inini mönö nalö kunöŋ Suepkö bemtohoŋnöŋ qahö anğotme.

⁴ Miangöra kunŋan nanŋi memba et ala morö kianğö dop akŋawi, yaŋön mönö Suepkö bemtohoŋ uruŋe öngöŋgöŋi akza. ⁵ Kunŋan namande kewöŋi kun nöngö qetne köl öröba köyan kölmawi, yaŋön mönö ni köl öröm niŋgima.” Mewö.

* **18:1:** Luk 22.24 * **18:3:** Mak 10.15; Luk 18.17

Singisöndokö kölgorom mönö qetal engime.

Mak 9.42-48; Luk 17.1-2

⁶ Jisösnöñ toroqeba kewö jiyök, “Morö kewöñi möt narim niñgizei, kunñan yengöreñök kun kölgorom ak wañgiiga siñgisöndok akñawi, azi mianjön mönö lömböt öngöñgöñi miwikñaima. Anutunöñ lömböt mianjö likepñi denöwö wañgiiga dopñe akawak? Kemuñ jamönñiñ jölñe jöhöba köwet röndumnöñ gilget mulungöi gebawak, mianjön mönö awamñi ahum wañgii tandök akawak.

⁷ “Siñgisöndokö supatitikñan mönö awamñanök asuhumakza. Mianjöra gölme ambazip engöra Yei wösöbirik! mötzal. Kunñan supatitik anjön kölmamgö osimakzapmö, kun danjön tosatñi kölgorom ak engiiga siñgisöndok akñei, yanjöra mönö Yei! jiba sahötzal. Sihimbölo öngöñgöñan mönö yanjö qakñe öngöma.

⁸ * “Börögan me könagan siñgisöndok akñangö kölgorom ak gihima ewö, mönö yandim gilman. Yandim gilagun börötak me könatohot mala malmal köhöikñi miwikñaiiba oyaenköyaen akñanmö, köna börö yahötpuk malnönga könanjep könöp sianöñ gil gihigetka gebanbuk. Sia könöpñi mi teteköñi qahö jema.

⁹ * “Mewöñanök jegan siñgisöndok akñangö kölgorom ak gihima ewö, mönö qözöla gilman. Qözöla gilagun je-ilik mala malmal köhöikñe angota oyaenköyaen akñanmö, je yahötpuk malnönga könöp siagö könöpnöñ gil gihigetka gebanbuk.” Mewö.

* **18:8:** Mat 5.30 * **18:9:** Mat 5.29

*Lamanöŋ sohöyöhi, miangö dopkeu**Luk 15.3-7*

¹⁰ “Ambazip moröŋi kiengöŋök kun memba et al wanjibe-puköŋa mönö galömnini meme. Nöŋön keu kewö jizal: Yenö kölközizip garataurupŋinan mönö Suep miri miangöŋ nönö Suep Iwinangö kösutŋe mala jemesoholŋi sundan ehakze. Miangöŋa jijiwilit kude ak engime. ¹¹ (Suep gölmegö azi ölnan mönö ambazip sohosohöŋi mem letot engii oyaenköyaen akŋegöŋa erök.)

¹² “Keu kiangöŋa denöwö mötmörize? Azi kungö lamaurupŋi 100 malgetka miengöŋök kunŋan sohoba janjuŋ aniga tonan denöwö akŋa? Yanön mönö 99 mi kundunŋe engömosöta anda mohot janjuŋ anöhi, miangö jaruba anma. ¹³ Jaruba anda mala miwikŋaima ewö, nöŋön keu ölni kun kewö jibi mötme: Yanön 99 janjuŋ qahö angeri, miengöŋa nalö miangöŋ gwötpuk qahö söngaimapmö, mohot miangöŋa önöŋi qahö söngaiba malma. ¹⁴ Miangö dop engö Iwiŋini Suep mire maljawanön mönö ambazip moröŋi kiengöŋök kunŋan sohoba könöp sianöŋ gebapuköŋa mörakza.” Mewö.

Alagan siŋgisöndok ak gihiiga kewö akŋan:

¹⁵ * “Urumelen alagan siŋgisöndok ak gihima ewö, gi mönö yanöŋöŋ anda mesohol köl wanjiba köna siŋgiyöhi, mi kondel wanjiman. Mewö aknönŋa keugi möta bapŋe anma ewö, göŋön mönö alagi luhut al wanjinönŋa kunbuk urumohot aka malmahot. ¹⁶ * Mewö aknönŋa keugi möta miangö bapŋe qahö anma ewö, göŋön mönö toroqeba

* **18:15:** Luk 17.3 * **18:16:** Dut 19.15

ala mohot me yahöt etkuangita yangören anme. Mewö Buña Kimbigö keu kiangö dop akñan, ‘Keu pakpak mi ambazip yahöt karöbutñan nangöba jigetka köhöima.’

17 “Mewö aketka keuñini möta miangö bapñe qahö anma ewö, göñön mönö urumelen könagesögö jitñememe yengöra jinönga yambuk eraum mötme. Eraum mötmemö, yengö keu bapñe mewöyök qahö anma ewö, mi mönö aukñe jigetka jabö ahui urumelengö kopa ewö ak wanjiba malman. Takis tilipqilip-ñinambuk megetka sisitñini memakzei, miangö tandök ewö i mönö mosötnönga yaigep malma.”

Singisöndokö jöhöjöhöni aka pösatpösatñi

18 * “Nöñön keu öl töhöññi kun kewö jibi mötme: Eñön singisöndok gölmenöñ jöhömei, mi pakpak mönö Suep mire mewöyök jöhöjöhöni ahöma aka singisöndok gölmenöñ mosöta pösatmei, mi pakpak mönö Anutunöñ mosöri Suep mire mewöyök pösatpösatñi ahöma.

19 “Toroqeba keu kewö jibi mötme: Gölmenöñ engörenök yahötñan keu mi me mi mi miangöra urumohok aka köuluköbitkö keu jöhömahori, mi nöngö Iwini Suep mire maljawanön mönö etkiiga buña qem angumahot. 20 Mi kewögöra: Ambazip yahöt me karöbutñan nöngö qetne igen me waigen tokomei, nöñön mönö miangören yengö sutñine malmam.” Mewö.

Welenqeqe ak-kömukömuñi qahöpkö söpsöp keu

* **18:18:** Mat 16:19; Jon 20:23

21 *Nalö mianğöreñ Pitönöñ Jisösgöreñ kaba keu kewö jii mörök, “Kembu, alanan sinğisöndok ak niñgimakzawi, nõñön mi indimñi dawikö dop mosötpiga dop kölma? Indimñi 7 mi gwötpuk. Mianğö dop mosötpiga dop kölma me qahö?”

22 Jisösnöñ mi möta kewö melen wañgiyök, “Indimñi 7 qahöpmö, 70 taims 7 * mi mosötnöñga dop kölma. Nõñön göhöra mewö jizal. 23 Mianğö könani mi kewö jim tuarimam. Suepkö bemtohoñi mi kiñ azi kembugö dop albi kewö akza: Kiñnöñ welenqeçeurupñi enğohola monenini galöm kölgeri, mianğö areñ papiani kondelget mindiñğömapköra kapañ kölök.

24 “Mewö könahiba monenangö kösohotñi kewöta mindiñğögetka mianğöreñ azi kun wañgita kagetka yañgö jeñe kinök. Tosani 10 milyön kina mi yañgöreñ ahöyök. 25 Mi ahöyökmö, tosanı mi mekömamğöra monenı qahö dop köli osiyöhanğöra aka ketanamñan kinda kewö jim kutuyök, ‘Sukinapñi ahözawi, mi pakpak mönö söñğöröñi memegöra alme. I aka anöm-moröñi i mewöyök mönö söñğöröñini memegöra algetka monenı kaiga mianñön tosanı mi meköme.

26 “Mewö jim kutuiga welenqeçenjan wösöñe eta simin köla sipköba kewö ulet wañgiyök, ‘Gi mönö urukönöp kude aka mököşöñda mamböt niñginöñga göhöreñ toşagi pakpak mi ölop meköm gihimam.’ 27 Mewö ulet wañgiiga ketanamñan welenqeçenangöra wösö mötmöt aka tosanı mi kutuba mosöta pösari erök. 28 Erökmö, yaigep anda

* **18:21:** Luk 17.3-4 * **18:22:** 70 taims 7 = 490. Mianğö dop alagahö sinğisöndokñi mi mönö qösösök mosötman.

mianğoreŋ welenqeŋe alaŋi kun miwikŋaiba ehök. Yanğö tosaŋi mi silim 100:kö töwaŋi (Kina500,-) mianğö dop yanğoreŋ ahöyök. I eka memba jölŋi köhöikŋanök mözöhöla kewö jiyök, ‘Nöŋğoreŋ tosa göhöreŋ ahözawi, mi mönö meköm niŋgiman me?’

²⁹ “Mewö jiiga welenqeŋe alaŋan wösöŋe eta simin köla sipköba kewö ulet waŋgiyök, ‘Gi mönö urukönöp kude aka mökösoŋda mamböt niŋginöŋga göhöreŋ tosagi mi ölop meköm gihimam.’

³⁰ “Mewö jiyökmö, yaŋön mi tököba anda jii memba jöhöba kösö mire alget tari tosaŋi mekögetka etma. ³¹ Yuai mi asuhuiga welenqeŋe alaurupŋan tandök mi eka uruŋinan kömbuhiiga wösöbirik möta anda mianğö kösohotŋi mi körek ketaŋamŋinanğöra jigetka mörök.

³² “Mi möta ketaŋamŋinan welenqeŋe mutukŋi mi qeri jeŋe kaŋgoriga kewö jii mörök, ‘Gi nup meme azi bölöŋi! Gi tosagi kutuba mosötmangö qesim niŋginöŋga nöŋön mi pakpak mosöt gihizal. ³³ Nöŋön gehoriba ak kömum gihibiga göŋön mewöyök mianğö dop welenqeŋe alagi ak kömum waŋginöŋga dop kölbawak.’

³⁴ “Ketaŋamŋan mewö jiiga irimŋi seholiiga welenqeŋe mianğö keuŋi jim teköba kösö mirigö galöm yeŋgö böröŋine al waŋgiiga sihimbölo gwötpuk möta tatma. Mianğoreŋ tata tosaŋi kiŋğoreŋ ahöyöhi, mi pakpak meköm teköiga etma. ³⁵ Söpsöp keu kianğö ölni kewö: Inini mohot mohot alaŋinanğö siŋgisöndokŋi uruŋinan qahö mosötme ewö, nöŋgö Suep Iwinan mönö mewöyök keu mianğö dop ak eŋgima.” Mewö.

19

Awanöm anğömosötmosötkö keunji

Mak 10.1-12

¹ Jisösnöŋ keu mi jim teköbagun Galili prowins mosöta Jordan o kutuba likepŋe anda mötöteiba eta kunbuk o mi kutuba Judia prowinsnöŋ kayök.

² Kaiga ambazip kambulelebenöŋ wuatangöba kagetka mianğoreŋ mem ölöwak enğiyök.

³ Mem ölöwak enğiiga Farisi (Köna keugö kapankölköl) tosatŋan yaŋğoreŋ kaba keugö bötaknöŋ örömapkö esapköm waŋgiba kewö qesim waŋgiget, “Azinöŋ könaŋi i me waigöra anömŋi mosötmawi, mi Köna keu oŋgitma me qahö?”

⁴ *Qesim waŋgigetka melenđa kewö jiyök, “Miwimiwikŋai Toŋan lök könakönahineyök i ‘azi aka ambi malmegöra miwikŋaim enğiyök.’ Buŋa keu mi oyoŋget me qahö? ⁵ *Miwikŋaiba kewö jiyök, ‘Mianğöra azinöŋ mönö iwinamŋi etkömosöta anömŋaŋğoreŋ anda qekötahöiga yetkön sile mohot aka malmahot.’ Keu mi oyoŋget me qahö? ⁶ Mewö aka toroqeba yahöt qahö akzahotmö, sile mohot aka malmahot. Anutunöŋ azi aka ambi mindirim etkiyöhi, ambazip kunöŋ mönö i kude mendenj etkima.”

⁷ *Mewö jii möta kewö jiget, “Azinöŋ anğömosötmosöt papia ohoba anömŋi ölop mosötma. Mosesnöŋ mönö wuanöŋğöra keu mewö jim kutum nenğii ahöza?” ⁸ Mewö jigetka kewö jim enğiyök, “Mosesnöŋ mönö uruköhöikŋinaŋğöra aka anömŋi mosötmapkö keu mewö jim kutuyökmö,

* **19:4:** Jen 1.27; 5.2 * **19:5:** Jen 2.24 * **19:7:** Dut 24.1-4; Mat 5.31

könakönahinçeyök mewö qahö ahöyök. ⁹ *Nöhön kewö jibi mötme: Anömñan qesabulum qahö ahiga töndup wuatangöba ambi kun memawi, yañön mönö sero yonçorö akña. Kunñan ambi mosötmosötñi memawi, yañön mönö sero yonçorö akña.”

¹⁰ Jisösnöñ mewö jiiga gwarek yeñön jiget, “Awanöm sutñire ançömosötptikö sonço mewö ahöza ewö, mönö awanöm qahö ahinga dop kölma.”

¹¹ Mewö jigetmö, Jisösnöñ kewö melenök, “Miangö keuñi kusum ençizali, ambazip köreñan mi nanñinançöra ançön köla miangö dop ölop qahö akñemö, Anutunöñ keu mi ambazip tosatñi yeñöra ençiyöhi, yeñönök mönö miangö dop akñe. ¹² Miangö könäñi kewö: Tosatñan nam körö uruñe ahuba miangöreñök könahiba awanöm akingö qahö mötze. Tosatñan ambazipnöñ silenini yandiba * kondot ençigetka awanöm akingö dop qahö akze. Tosatñan Suep bemtohonçöra aka awanöm qahö akingö keuñi jim jöhöba keuñini mi wuatangömakze. Kunñan keu mia me mia möt ançön köla wuatangömangö dop akzawi, yañön mönö miangö dop akña.” Mewö.

Jisösnöñ nahönbörat kötuetköm ençiyök.

Mak 10.13-16; Luk 18.15-17

¹³ Nalö miangöreñ tosatñan nahönbörat morömorö ençuangita Jisösnöñ böröñi nöropñine ala köulukömapköra yañöreñ kagetmö, gwarek yeñön ambazip mi jim qetal ak ençiget. ¹⁴ Mewö

* **19:9:** Mat 5.32; 1 Kor 7.10-11 * **19:12:** Azi kötni kölkögöra jiza.

aketka Jisösnöñ kewö jiyök, “Nahönbörat moröñi mi ölop engömosötketka nöñgöreñ kame. Suepkö Toñan ambazip mewö mia bemtohoñi buña qem engima. Mianğöra i kude jöhöm engime.” ¹⁵ Mewö jiba böröñi nöropñine ala engömosöta kungen anök. Mewö.

*Jisösnöñ azi pomñi kungö qambañ keu jiyök.
Mak 10.17-31; Luk 18.18-30*

¹⁶ Nalö kungen azi kunöñ Jisösgöreñ kaba kewö qesim wañgiyök, “Böhi, nöñön ahakmeme ölopñi denöwö aka malmal köhöikñañgö buña qem añgubilenak?” ¹⁷ Qesim wañgiiga kewö jii mörök, “Ahakmeme ölopñi denöwö, wuanöñgöra mewö qesim niñgizan? Mohot-kunñan mönö ölopñi akza. Malmal köhöikñe añgotmamangö mötman ewö, mönö jöjöpañ keu tem köla malman.”

¹⁸ *Mi möta kewö jii mörök, “Wani jöjöpañ keugöra jizan?” Jisösnöñ mi möta jiyök, “Mönö ki, ‘Ambazip kun kude qenöñ kömuma, Sero yoñgorö kude akñan, Yoñgorö kude meman, Jitnöñ alal keu kude jiman, ¹⁹ *Iwinamgi mönö göda qem etki-makñan,’ aka ‘Nangi jöpaköm añgumakzani, mianğö dop mönö ambazip pakpak jöpaköm engimakñan.’”

²⁰ Mewö jiiga azi gwabönöñ kewö jiyök, “Mi pakpak mönö tem köla mala kotzal. Wanigöra kunbuk osizal?” ²¹ Mewö jiiga Jisösnöñ jiyök, “Gi aködamungabuk malmamangö mötman ewö, mönö anda sukinapki söñgöroñi memegöra alnöñ monen kaiga ambazip wanapñi engiman. Mewö aknöñga sukinapki ketañi (guli masapu, milyön Kina ewö)

* **19:18:** Eks 20.13-16; Dut 5.17-20 * **19:19:** Eks 20.12; Dut 5.16; Lew 19.18

mi Suep mire ahöm gihima. Mewö aka ni nu-
ataŋgöba kaman.”

²² Mewö jiyökmö, gwabönöŋ keu mi möta suk-
inapŋi gwötpuk ahöyöhaŋgöra aka wösöbirik möta
jeŋi asöliiga öne mosöta anök. Mewö. ²³ Mosöta
aniga Jisösnöŋ gwarekurupŋi kewö jii mötket,
“Nöŋön keu ölni kun kewö jibi mötme: Yei! Am-
bazip pomŋi yeŋön mönö Suepkö bemtohoŋnöŋ
aŋgotpingö lömböriba kupuk-kapak akŋe. ²⁴ Mi
kewö jim tuarimam: Sömbup ketani kamel mi
kondi kinimŋe ölop qahö aŋgotma. Miangö dop
ambazip pomŋi yeŋön Anutugö bemtohoŋ uruŋe
aŋgotpingö lömböriba qaköme.”

²⁵ Mewö jii möta gwarek yeŋön aurum
tiliŋgöba kewö jiget, “Opoŋon! Ambazip daŋön
mönö Suepkö buŋaya akawak?” ²⁶ Mewö jigetka
Jisösnöŋ uba eŋgeka kewö jiyök, “Ambazipnöŋ mi
esapköba osiba qakömakzemö, Anutunöŋ mönö
yuai pakpak ölop ahakza. Yaŋön yuai kun aka
memangö qahö osiba qakömakza.” Mewö.

Jisösgö nup memegö töwanj

²⁷ Pitönöŋ keu mi möta melenŋa kewö jiyök,
“Mötnöŋ, neŋön mönö yuai pakpak mosöta gi
guataŋgöba kain. Miangö likepŋi mönö wani yuaia
membin?” ²⁸ *Mewö jiiga Jisösnöŋ kewö jii mötket,
“Nöŋön keu ölni kun kewö jibi mötme: Yuai pakpak
kölöŋaiiga Suep gölmegö azi ölnan jakömbuak
dumŋe tari asakmararaŋan asarimawi, nalö
qainŋi kun miangöreŋ ni nuataŋgöba kageri, eŋön
mönö mewöyök jakömbuak dum 12 miangöreŋ tata
Israel kambu 12 yeŋgö keuŋini kewöta jim teköme.

* **19:28:** Mat 25.31; Luk 22.30

29 “Kunñan nōngö qetnañgöra aka yuai kun mosöröhi, - mi jike miriñi, darumunñi, nenbehötñi, iwinamñi, nahönböratñi me nup kisiñi - mi engömosöriğa Anutunöñ mönö miangö likepñi enğita melen wañgiğa sehima. Mewö sehiğa malmal köhöikñi teteköñi qahö buña gem anguma. 30 *Mewö asuhumapmō, mutukñi enğorenök gwötpukñan dagibezupñi aketka dagibezupñi yengörenök gwötpukñan mutukñi akñe.” Mewö.

20

Wain nup meme ambazip yengö dopkeu

1 Jisösnöñ jiyök, “Suepkö bemtohoñi mi kewö: Gölme toni kunöñ söñanök wahöta yaigep anda azi tosatñi enğeka wain nupñe moneñ nup memegöra qesim enğiyök. 2 Qesim enğiğa ‘Ölöp,’ jigetka silim mohotkö töwañini (Kina 5) enğimapkö urumohot aketka melaim enğiğa wain nupñe anget.

3 “Angetka 9 kilok miangö dop aiga kunbuk toroqeba anda azi tosatñi maket sombemñe önewat kingetka enğehök. 4 Enğeka kewö jii mötket, ‘İñini mönö mewöyök nōngö wain nupne anda nup megetka töwañini dopñeyök enğimam.’

5 “Mewö jiğa wain nupñe anget. Angetka 12 kilok aiga kunbuk anök aka mare 3 kilok miangö dop dumñe kunbuk yaigep anda mewöñanök ahök. 6 Mewö aka mare 5 kilok miangö dop yaigep aniga azi tosatñi dumñe kunbuk öne lañ kingetka enğehök. Enğeka kewö qesim enğiyök, ‘İñini mönö wuanöñgöra silim köröp ki öne malje?’

* **19:30:** Mat 20.16; Luk 13.30

⁷ “Mewö qesim enjiiga kewö melenget, ‘Kunñan moneñ nup memingöra qahö qesim nenjiiza. Mianjöra öne ki kinjin.’ Melengetka kewö jii mötket, ‘Inini mönö mewöyök nöngö wain nupne anda nup meget.’ ⁸* Nup megetka mare aiga wain nup toñan nup galömñi öröba kewö jii mörök, ‘Gi mönö nup meme azi enghohola töwañini enjiman. Mare qöndökñi kazei, yenjörenök könahiba enjiba anda söñanök kazei, yenjören teköman.’

⁹ “Mewö jiiga mare 5 kilok nupnöñ kageri, yenjön kanjotketka silim mohotkö töwañi (Kina 5) mi mohot mohot enjiiga meget. ¹⁰ Mutuk nupnöñ kageri, yenjön kanjota töwañini ongiita memegöra mötmörigetmö, i mohot mohot mewöyök silim mohotkö töwañi (Kina 5) enjiiga meget. ¹¹ Töwa mohot miyök memba könahiba gölme toñanjöra uruninan ihururuk möta jimongot ak wañgiba kewö jiget, ¹² ‘Nini wehöngöra nöngöp ariba nupkö lömbötñi bisizinmö, azi mi dölök-kun nup memegöra qesim enjizan. Yenjön aua mohotkungö dop nup mezemö, göñön töndup yenjöra mötmörinönnga nembuk örörön akze. Mi qahö dop kölja.’

¹³ “Mewö jigetmö, yenjörenök kungöra kewö melenja jiyök, ‘Alani, ni göbuk keu jiba silim mohotkö töwa (Kina 5) gihimangö urumohot akzit. Mianjö dop töwa miyöhök gihibiga dop kölja. Mönö mi mötmöriman. ¹⁴ Urugi mianjöra bölipapukmö, mönö nangi töwagi memba anman. Azi dölök-kun nup memegöra qesim enjizali, yenjöra mewöyök töwa gihizali, mönö miyök

* **20:8:** Lew 19.13; Dut 24.15

enġimamgö mötzal.

¹⁵ “Nani monenñöŋ nani sihimnaŋgö dop akiga dop kölja me qahö? Nöŋön ekbonep qahö akiga urugan auiga jegi bosoleiza me?” ¹⁶ *Jisösnöŋ keu mi jim teköba kewö jiyök, “Miaŋgö dop qöndökni yeŋön mutukni aketka mutukni yeŋön qöndökni akŋe.” Mewö.

Jisösnöŋ kömumamgö keuŋi jüiga karöbut ahök.

Mak 10.32-34; Luk 18.31-34

¹⁷ Jisösnöŋ Jerusalem sitinöŋ öŋgöbingöra gölme köna angetka gwarekurupŋi 12 mi öröm enġiba göraŋe anda kewö jii mötket, ¹⁸ “Mötket, nini Jerusalem öŋgöbin. Miaŋgöreŋ kunŋan Suep gölmegö azi ölni mamalolo mem waŋgiiga jike nup galöm aka Köna keugö böhi yeŋgö böröŋine gema. Yeŋön kömumapkö keuŋi jim teköba ¹⁹ kian gawman yeŋgö böröŋine al waŋgime. Al waŋgigetka mepaiköba ihilek wahinambuknöŋ tauköm waŋgime. Tauköm waŋgiba maripomnöŋ qegetka kömuma. Kömumba wehön karöbut aiga kömupnöhök wahötma.” Mewö.

Jeims Jon namŋiran yuaigöra ulerök.

Mak 10.35-45

²⁰ Nalö miaŋgöreŋ Zebedigö nahönyahöt yetkö namŋiran nahönyahötŋi yetpuk Jisösgöreŋ kaba simin köl waŋgiba yuai qainŋi kungöra uletmamgö jiyök. ²¹ Mewö jüiga qesim waŋgiyök, “Gi wani yuai akŋamgö mötzan?” Qesim waŋgiiga kewö jiyök, “Göŋön ölop jim kutunöŋga nöŋgö nahönyahötŋi kietkön mönö göhö bemtohoŋnöŋ eu öŋgöba kunöŋ

* **20:16:** Mat 19.30; Mak 10.31; Luk 13.30

börögi ölje aka kunjan börögi qanije tata yuai pakpak galöm kölbeak.”

²² Mewö jiyökmö, Jisösnöñ melenja kewö jiyök, “Inini mianjö könañi qahö möt yaköba uletze. Nöñön qambi kakñambuk nemami, injiri mi ölop namba sihimbölö mötmahot me qahö?” Mi möta “Ölop nembit,” jiyohot. ²³ Jiyohotka kewö jii mörohot, “Mi ölja! Nöñön qambi kakñambuk nemami, injiri mi mewöñanök nemahotmö, nöngö böröni ölje me qanije dañön tatmahori, nöñön keu mi jim kutumamangö dop qahö. Nöngö Iwinan dum yahöt mi denike yetköra mözözömgöyöhi, mi mönö yetköra etkiiga nömbuk tata galöm kölmahot.” Mewö.

Galöm öljan mönö welenqeqeya akza.

²⁴ Darumun yahöt yetköñ mewö ulerohotka alaurupñi 10 yeñön mi möta urubölö aket. ²⁵ *Mewö aketmö, Jisösnöñ engoholi kagetka kewö jii mötket, “Gölmegö kantriñi kantriñi miengö jembonñinan mönö azi kembu tandök ak engimakze. Yeñgö ketañamñinan mönö keu jim kutuba mindingöm engiba kukösumñini kondelakze. Inini könañini mi ölop mötze. ²⁶ *Engö sutñine silik mewö ahöbapukmö, kunjan engö sutñine ketañamñini akñamgö mötzawi, yañön mönö welen qem engiba malma.

²⁷ “Mewöyök kunjan engö sutñine mutukñi malmangö mötzawi, yañön mönö engö nembö bapñine mala welenqeqeñini omañi akña. ²⁸ Suep gölmegö azi öljan mönö mewöyök silik mewöñi kondela

* **20:25:** Luk 22.25-26 * **20:26:** Mat 23.11; Mak 9.35; Luk 22.26

nanji welen qem wanjimegöra aka qahö kayök. Qahöpmö, mönö welen qem engiba ambazip sehisehini yenjö sohopñini memamgöra aka eta malmalñi kölenda mosötma.” Mewö.

Jisösnöñ jegömöl azi yahöt mem ölöwak etkiyök.

Mak 10.46-52; Luk 18.35-43

²⁹ Jisösnöñ gwarekurupñi yembuk Jeriko siti mosötpingö aketka ambazip kambulembenöñ enğuatanğöba andöñine kaget. ³⁰ Mewö kagetka jegömöl azi yahöt köna jitñe tarohot. Tarohotka “Jisösnöñ neñgoñgitmamgö akza,” jiget möta kewö qerohot, “Kembu Deiwidkö gwölönarökñi, mönö ak kömum netkinöñ!”

³¹ Mewö qerohotka ambazip kambu yeñön keu bök tatmahotköra qetal etkigetmö, yetkön mönö kapañ köla kewö qerohot, “Kembu Deiwidkö gwölönarökñi, mönö ak kömum netkinöñ!”

³² Mewö qerohotka Jisösnöñ dörök ala yangören kamahotköra qeri kayohotka kewö qesim etkiyök, “Alayahötñi, nöñön wani yuai ak etkimamgöra mötzahot?”

³³ Mewö qesim etkiiga kewö jiyohot, “Kembu, niri jeniri kunbuk ubitköra mötzit.” ³⁴ Mewö jiyohotka Jisösnöñ yetköra wösöñi möta jeñiri misirii miangörenök tohoiga uba Jisös wuatangöba andöñe anohot. Mewö.

21

Jisösgöra köirañ kölgetka Jerusalem öngöyök.

Mak 11.1-11; Luk 19.28-40; Jon 12.12-19

¹ Jisösnöñ gwarekurupñi yembuk Jerusalem siti dopdowiba Öl ip kundunje Betfage mirinöñ kaget.

Kaba gwarekyahötņi yahöt melaim etkimamgöra aka ² kewö jii möröhot, “Miri wösöņire tatzawi, mönö mianğöreņ anmahot. Anda mianğöreņ aņgota doņki ambiņi kösönöņ jöhöget kinjawi aka doņki moröņi mi mianğöreņök miwikņaim etkimahot. Mi mönö pösat etkiba memba nöņgöreņ kama-hot.

³ “Pösarohotka kunņan keu kun jiiga kewö jimahot, ‘Kembu-niran mönö mianğöra osiza.’ Mewö jiyohotka doņki mi zilaņ al etkiiga ki kama-hot. ⁴ Anutunöņ keu kun kezapqetok azi kungö uruņe ali jiyöhi, mianğön ölņambuk akņapköra mewö asuhuyök. Keu mi kewö,

⁵ * “O Jerusalem ambazip Zaion kundunji liliköba maljei, yeņğöra mönö kewö jigetka mötme, ‘Mötket, eņgö kiņ kembuņinan mönö eņgöreņ asuhuma. Yaņön guņbönjönjön aka doņki qakņe tata kama. Doņki lömböt bisimakzawaņgö moröņi mianğö qakņe tata kama.’ ”

⁶ Jisösnöņ gwarekyahötņi melaim etkiiga anda keu jiyöhaņgö dop ahot. ⁷ Yetkön doņki ambiņi moröņambuk etkömemba kayohot. Kayohotka malukuņini qeköba doņki qakņire algetka Jisösnöņ moröņaņgö qakņe öņgöba tarök.

⁸ Mewö tata aniga ambazip kambulembeņan göda qeba malukuņini qeköba köna namņe tumbulgetka tosatņan ip uruņe anda böröņi qezuņgata köna namņe tumbulget. ⁹ *Tumbulgetka ambazip kambu jeņe köl öröba angeri aka andöņe wu-atangöba kageri, yeņön kewö jiba qetket, “Hosana!

* **21:5:** Zek 9.9 * **21:9:** Sum 118.25, 26

Anutu möpöseizin. Deiwidkö gwölönarökñi owe owe! Kembangö qetne kamawi, Anutunöñ mönö i kötuetköma. Hosana! Qetbunagi möpöseininga euyangörej öngöza! Owe owe!”

¹⁰ Mewö qetketka Jerusalem sitinöñ öngöba sitigö ambazip körekñan auruba göjupmajup aka kewö qesiget, “Azi ki mönö niñia?”

¹¹ Qesigetka ambazip kambulelembe yeñön kewö melenget, “Yañön mönö kezapqetok azi Jisös, Galili prowinsgö Nazaret mirigöra.” Mewö.

Jisösnöñ jöwöwöl jike jim kömbuhiyök.

Mak 11.15-19; Luk 19.45-48; Jon 2.13-22

¹² Jisösnöñ jöwöwöl jikegö tohoñ uruñe anök. Miangörej ambazip engehiga inap bohonñi memegöra algetka söngöröñi megeri, yañön mi pakpak közöl engiiga etket. Monen utekutek ambazip yeñgö jakenini metali anget. Mewöyök kembö bohonñini memegöra Algeri, miengö dum tatatñini mi tok tötaliga anget. ¹³ *Mewö aka kewö jii mötket, “Aisaianöñ keu kun kewö ohoi ahöza, ‘Nöngö jikenan mönö köulukö miriñina akñapkö qetme.’ Keu mi ahözapmö, inini mi utekögetka kegwek-kahasililij yeñgö banjet ewö akza.”

¹⁴ Mewö aiga jegömöl aka simalokon ambazip jöwöwöl jikenöñ yangörej kagetka mem ölöwak engiyök. ¹⁵ Mewö asuhuyökmö, jike nup galöm aka Kona keugö böhi yeñön angöletot meyöhi, mi eket aka nahönbörat jöwöwöl jikenöñ qeta “Hosana! Deiwidkö gwölönarökñi owe owe!” jigeri, mi engeka urubölö aket.

* **21:13:** Ais 56.7; Jer 7.11

16 *Urubölö aka kewö jim wanğiget, “Morö mi keu qetzei, mi mötzan me qahö?” Jim wanğigetka kewö melenğ enğiyök, “Ölöp mötzal. İnini nalö kungen Buña keu ki oyoğget me qahö, ‘Göñön mönö nahönbörat aka morösepep juzu nemakzei, mi kusum enğinönga nangi törörök möpöseim gihi-makze.’”

17 Mewö jiba enğömosöta siti mosöta mare aiga Betani anda ahöyök. Mewö.

Jisösnöñ fig ip kun qesuahöiga ululungöyök.

Mak 11.12-14, 20-24

18 Ahöba söñanök wahöta kunbuk sitinöñ anda nenegö kömuyök. 19 Nenegö kömumba köna jitrje fig ip * kun eka miangö könañe anök. Anökmö, ölñi qahö miwikñaiiga sinñanök kiniga ehök. Mewö eka ip mi kewö jim wanğiyök, “Göñön mönö nalö kunöñ ölgi kunbuk kude kuñguman.” Mewö jim wanğiiga fig ip mianñön mönö mianğöreñök ululungöyök.

20 Ululungöiga gwarekurupñan mi eka auruba kewö jiget, “Fig ipnöñ mönö denöwö ösumok ululungöza?” 21 *Jigetka Jisösnöñ kewö melenñök, “Nöñön keu ölñi kun kewö jibi mötme: Mötnarip töp memba uruyahöt qahö akeak ewö, fig ipköra yuai asuhuzawi, inini miyök qahö akeakmö, ki mewöyök ölöp akeak: Kunduñi kianğö toñangöra kewö jim kutubeak, ‘Mönö kunduñi ki qeköba wahöta anda köwetnöñ alman.’ Mewö jim kutuba Anutu möt nariiga mönö mianğö dop ahuma.

* **21:16:** Sum 8.2 * **21:19:** Fig mi sambu ipkö alañi kun. Mi nupñine kömötkeka kötni nahömñinambuk asuhugetka gwötpuk nemakze. * **21:21:** Mat 17.20; 1 Kor 13.2

22 Wani yuaigöra qesiba köulukömei, mi pakpak buña qem anğubingö möt narigetka mönö buñañini akña.” Mewö.

Jitnememe yeñon Jisösgö kukösumñangö qesiget.

Mak 11.27-33; Luk 20.1-8

23 Jisösnöñ jöwöwöl jikegö tohoñ uruñe anda ambazip kusum enğiiga jike nup galöm aka kantrigö jitnememe tosatñi yeñon yangören kanğotket. Kanğota kewö qesim wañiget, “Gi kiangören yuai akzani, mi mönö dañon jim kutum gihiiga ahakzan? Mianğö kukösumñi mi dañon gihiyök?”

24 Qesim wañigetka kewö melen enğiyök, “Nöñon mewöyök keu kun qesim enğimam. Mi melen niñgime ewö, nöñon mewöyök dañon kukösum niñgiiga yuai ki ahakzali, mi jibi mötme.

25 Jonöñ ambazip o-melun mem enğiba malöhi, yañon mianğö kukösumñi mi denikeyök meyök? Suep Toñan wañiyök me gölme toñan wañiget?” Mewö qesim enğiiga sutñine eraum möta kewö jiget, “‘Kukösumñan Suepnöhök asuhuyök,’ mewö jibin ewö, yañon mönö kewö jima, ‘Inini mönö wuanöngöra Jon qahö möt narim wañiget?’ Mi qahö dop kölja.

26 “Me ‘Gölme ambazipnöhök asuhuyök,’ jibin ewö, neñon mönö ambazip kambu yeñgöra keñğötnini möta osibin. Könagesö pakpak yeñon mönö Jongöra ‘Kezapqetok azia akza,’ jiba malje.”

27 Keu mewö kewöta Jisösgöra kewö melenget, “Mi qahö mötzin.” Mewö melengetka Jisösnöñ kewö jii mötket, “Mewö aiga nöñon mewöyök yuai ki

ahakzalaŋgö kukösumŋi daŋön niŋgiyök, mi qahö jibi mötme.” Mewö.

Kungö nahönyahöt yetkö söpsöpkeu

²⁸ Jisösnöŋ söpsöpkeu kun kewö jiyök, “Inini keu kiangöra denöwö mötmörize? Azi kun nahönyahötŋi yahöt malget. Nalö kunöŋ iwiŋiran nahönŋi kungören anda kewö jiyök, ‘Nahöni, gi ölop merak nöŋgö wain kösö nupne anda nup meman.’

²⁹ “Mewö jiiga kewö melenök, ‘Ni töközal.’ Mewö jiyökmö, könaŋep keuŋi miangö möt böliba elenda anda nup meyök. ³⁰ Miangö andöŋe iwiŋiran nahönŋi kungören anda nahönŋi mutukŋangö jiyöhi, keu miyök jii mörök. Mi möta keu kewö jiba melenök, ‘Oŋ! Ketaŋamni, ölop anmam.’ Mewö jiyökmö, töndup qahö anök.”

³¹ Jisösnöŋ mewö jiba qesim engiyök, “Yahöt yetkörenök daŋön mönö iwiŋiraŋgö jitŋi tem kölök?” Mewö qesim enŋiiga kewö melenget, “Nahönŋi mutukŋi yaŋön.” Mewö melengetka kewö jii mörök, “Nöŋön keu öl töhöŋŋi kun kewö jibi mötme: Takis meme ambazip tilipqilipŋinambuk aka köna ketaŋi ambi yeŋön mönö inini enŋonŋita mutuk Anutugö bemtohon uruŋe öŋgöme.

³² *“Keu miangö könaŋi kewö: Jon O-melun azinöŋ enŋören kaba Anutugö jeŋe solanibingö könaŋi kondeliga inini yaŋgö keuŋi mi qahö möt narigetmö, takis meme ambazip tilipqilipŋinambuk aka köna ketaŋi ambi yeŋön mönö i möt narim waŋgiget. Yeŋön i möt narim

* **21:32:** Luk 3.12; 7.29-30

wanğigeri, inini mi eka töndup könangep mewöyök nanjini qahö möt bölim anguba elennda i qahö möt narim wanğiget.” Mewö.

*Wain kösö nup galöm bölöni miengö dopkeu
Mak 12.1-12; Luk 20.9-19*

³³ *Jisösnöŋ jiyök, “Dopkeu kun kewö mötme: Gölme toni kunöŋ wain kösö nup kun köla kömörök. Köla kömöta selŋi memba liliköyök. Mem liliköba kötnöŋ wain jout ketanŋi kötnöŋ meyök. Miangören waingö ölnŋi ala könanöŋ tözöhölget oŋan lalanöŋ geyök. Wain jout ketanŋi mi kötnöŋ memba wain yonğorö membepuköra galöm meme jake köröŋŋi köwenambuk meyök. Yuai pakpak mem teköba wain nup galöm tosatŋi miwikŋaim engiba kewö jiyök, ‘Mönö nup memba ölnangö bahöŋi nanjini memba bahöŋi toni ni niŋgime.’ Mewö jiba nup mi böröŋine ala engömosöta kantri kunöŋ anda malök.

³⁴ “Mala mali ölnŋi öliyöhanğö nalöŋi (yambu 5) töriiga miangören welenqeŋeurupŋi kun melaim engiiga galöm yenğören anda wain nup ölnangö bahöŋi wanğimegöra jiget. ³⁵ Jigetmö, galöm yeŋön i engömemba jöhöba tosatŋi kömbinöŋ sepgwörörök enguba tosatŋi enguget kömugetka tosatŋi kötnöŋ gila enguget kömuget. ³⁶ Miangö andöŋe welenazi tosatŋi toroqeba melaim engiiga gwötpuk aketmö, i mewöŋanök öröm ureim mem engiget.

³⁷ “Mewö aketka wain nup toŋan keu jaruba jiyök, ‘Nani nahöŋi mönö göda qem wanğime me denöwö?’ Mewö jiba qöndökŋi mi nahönŋa melai-iga yenğören anök. ³⁸ Anökmö, wain nup galöm yeŋön nahönŋi eka sutŋine kewö eraum möta jiget,

* **21:33:** Ais 5.1-2

‘Yañön mönö börösamotñaᅅgö toᅅi akña. Ayop, mönö memba qein kömuiga wain kösö nupñaᅅn mönö nanine buñaᅅnina akña.’

³⁹ “Mewö jiba memba jöhöba gilgetka nup yaigepᅅe geiga qeget kömuyök. ⁴⁰ Wain nup toñaᅅn mi möta kaba nup galöm mi mönö denöwö ak eᅅgima?”

⁴¹ Jisösnöᅅn mewö qesiiga kewö jiget mörök, “Galöm bölöᅅi mi mönö köndenᅅa yayapaleleᅅ mem eᅅgima aka nup galöm döläkᅅi miwikᅅaim eᅅgiba wain kösö nupᅅi yeᅅgö böröᅅine alma. Yeᅅön öᅅᅅi ölimawaᅅgö nalöᅅe bahöᅅi törörök waᅅgimakᅅe.” ⁴² *Jisösnöᅅn mi möta kewö jii mötket, “Buña Kimbigö keu ki nalö kungen oyöᅅget me qahö, ‘Miri meme yeᅅön köt tandö kun andö qeba öne mosötket taröhi, mianᅅön mönö tandö kömbönaᅅi aiga miwikᅅaiget. Mianᅅön tiᅅiriga mirinöᅅ gororöᅅgöba eta köᅅma. Kembunöᅅn tandö mi kuᅅguiga jeninan ehinga qetbuᅅabuk aiga welipkömakzin?”

⁴³ “Mianᅅöra kewö jibi mötme, Anutunöᅅn mönö bemtohoᅅi eᅅguaᅅgita ambazip kambu kun eᅅgiiga yeᅅön mianᅅgö öᅅᅅi ölöᅅ kuᅅgumakᅅe. ⁴⁴ Kunñaᅅn tandö bohonᅅi mianᅅöreᅅn töttöᅅgata eta qemawi, mi mönö silenᅅi kutumutumapmö, ain tandö mianᅅön jöla tala kungö qakᅅe eta köᅅmawi, mi mönö körek qözömözö-zamöma.”

⁴⁵ Jisösnöᅅn mewö jiiga jike nup galöm aka Farisi (Köna keugö kapaᅅköᅅköᅅ) yeᅅön dopkeuᅅi mi möta könaᅅi möt asariba kewö jiget, “Mi mönö neᅅgöra jiza.” ⁴⁶ Mianᅅöra i memba jöhöbingö mötketmö,

* **21:42:** Sum 118.22-23

ambazip kambu yengöra kenğötjini möta osiget. Ambazip kambu yenjon Jisösgöra mötketka kezapqetok azia ahök. Mewö.

22

Maren lömbuaᅅgö söpsöp keu

Luk 14.15-24

¹ Jisösnöᅅ kunbuk könahiba söpsöp keunöᅅ keu kewö jiyök, ² “Suepkö bemtohoᅅi mi kianğö dop akza: Kiᅅ azi kembunöᅅ nahönᅅaᅅgöra maren lömbuaᅅ areᅅgöba mözözömgöyök. ³ Mözözömgöba welenqeᅅeurupᅅi melaim eᅅgiba kewö jiyök, ‘Nöᅅön ambazip tosatᅅi maren lömbuaᅅnöᅅ kamegö mötzal. Inini mönö yengöreᅅ kolek anda kamegö jiget mötme.’ Mewö jii anda jigetmö, ambazip mienön mi möta kabingö tököba taᅅqaᅅaᅅ aket.

⁴ “Mianğö andöᅅe welenqeᅅeurup tosatᅅi kunbuk melaim eᅅgiba kewö jiyök, ‘Ambazip kamegöra jiali, mönö yengöreᅅ anda kewö jime: Mötket, nöᅅön lömbuaᅅgö neneᅅamni lök mözözömgöbiga tatza. Nöᅅgö bulmakau aziᅅi aka bulmakau tosatᅅi gumohom eᅅgiinga kelökᅅinambuk akeri, mi eᅅguba ohom qeraköinga yuai pakpak lök jöjöröba ahöza. Inini mönö maren lömbuaᅅnöᅅ kaget.’

⁵ “Mewö jii angetka ambazip mienön keu mianğö kezap qahö algetmö, nöᅅönᅅan aka laᅅaᅅ anget. Tosatᅅan nene nupᅅine angetka tosatᅅan kölköl-örörö nupᅅine anget. ⁶ Tosatᅅan kiᅅgö welen-qeᅅeurupᅅi qelanjiba eᅅgömemba öröm ureim ak eᅅgiba eᅅguget kömuget. ⁷ Kömugetka kiᅅgö irimᅅi seholiiga yarö kambuᅅi melaim

enjiiga anda kinda enjuget kömukömu azi mi könden enjiba taon mirinjini mi ohogetka jeyök.

8 “Miangö andöne kiñnön welenqequeurupni yengöra kewö jiyök, ‘Maren lömbuan mözözömgöinga jöjöröba tatzapmö, ambazip kamegöra jiali, yeñön mönö sösöngainön kakagö dop ölöñni qahö akze. 9 Miangöra injini mönö köna soñanön aka miri sombemni sombemni miangören anda ambazip mi me mi miwikñaim enjimei, i mönö maren lömbuanñnön kamegöra jiba kapan köla kuñgum enjime.’

10 “Mewö jüiga welenqequeurupñan mosöta könañi könañi miangören anda ambazip mi me mi miwikñaim enjigeri, mi körek pakpak öröm tokom enjiget. Ambazip ölöñni aka bölöñi mewöyök mi mewö kagetka maren lömbuan mirinön kokolak qeiga tebol liliköba tatket. 11 Tebol liliköba tatketmö, kiñnön i engekñamgöra kaba miangören azi kun maren lömbuanö maluku tuatñi qahö köli geiga ehök. 12 Azi mi eka kewö jii mörök, ‘Alani, gi maren lömbuanö malukuñi qahö löngöta töndup denöwögöra miri kianö uruñe kazan?’ Mewö jüiga azi miangön keuñi bököiga ölöñ tarök.

13 *“Mewö tariga kiñnön welenqequeurupni kewö jim kutum enjiyök, ‘Mönö azi mi memba köna böröñi jöhöba yaigep gilgetka pandamanön gema.’ Miangören malmeanön mönö sahöt gigilahöba irimñini yöhözömgögetka qetñi qeri malme. 14 Keu miangö dop Anutunön ambazip sehisehñan kamegöra jiyökmö, awamdökñi yeñön keu mi möt anğön köla kaba Anutunön

* **22:13:** Mat 8.12; 25.30; Luk 13.28

kambu möwölöhöm engiyöhi, mönö yenjö sutnjine kaŋgotme.” Mewö.

Takis alalgö Jisös esapköm waŋgiget.

Mak 12.13-17; Luk 20.20-26

¹⁵ Mianjö andöŋe Farisi (Köna keugö kapaŋkölköl) yenön anda eraum möta Jisös qesiba keugö bötaknöŋ öröi gwaröhöm waŋgibingö arenj alget. ¹⁶ Mewö arenj ala gwarekurupŋi aka premiö Herodkö pati-alaurupŋi tosatŋi melaim enjigetka Jisösgöreŋ kaba kewö qesiba jiget, “Böhi, göŋön azi ölnj akzani, nini mi mötzin. Göŋön ambazip tosatŋi qahö engek soriba tosatŋi qahö qepureim enjimakzanmö, dop mohotnöŋ kewöt neŋjimakzan. Mianjöra kuŋgum gihigetka qahö goŋgiba ketanji qahö esuhum enjimakzanmö, Anutugöreŋ köna mi keu ölnjaŋgö dop kusum neŋjimakzan. Göŋön Anutugöreŋ keu diŋdiŋi mianjön öngöŋgöŋi eretŋi mohot pakpak jim qindiŋ ak neŋjimakzan. ¹⁷ Mianjöra keu kianjöra denöwö mötmörizan, mi jinöŋ mötpin. Nini sisa-kiŋgöra takis ala mianjön Mosesgö Köna keu siŋgibin me qahö?”

¹⁸ Mewö qesigetka arenjini munenji möt kutuba kewö jii mötket, “O urumelengö silesile azi, inini mönö wuanöŋgöra keugö bötaknöŋ al niŋgibingö esapköm niŋgize? ¹⁹ Ölop takis alalgö monenji kun kondel niŋgigetka eki.” Mewö jiiga silwö monenji (Kina 5) kun memba kaget.

²⁰ Kagetka kewö qesim enjiyök, “Dagöreŋ imut aka qet mi ki ohoget ahöza?” ²¹ “O mi sisa-kiŋgöreŋ,” mewö melenja jiget. Jigetka kewö jii mötket, “Mewö aiga yuai sisa-kiŋgö imutŋambuk buŋanji akzawi, mi mönö yaŋgöra al waŋgime. Yuai

kun Anutugö buᅇaya akzawi, mi mönö Anutugö buᅇa qeme.”²² Mewö jii möta yaᅇgöra gwötpuk welipköba mosöta yaigep anget. Mewö.

Kömupnöhök wahötwahötkö Jisös esapköm waᅇgiget.

Mak 12.18-27; Luk 20.27-40

²³ *Sadyusi (Jike nupkö kapaᅇkölköl) yeᅇön ‘Kömugeri, yeᅇön kude wahötmē,’ jiba malget. Nalö miaᅇgöreᅇ yeᅇgöreᅇök tosatᅇᅇan Jisösgöreᅇ kaba kewö qesim waᅇgiba jiget, ²⁴ *‘‘Böhi, Mosesnöᅇ kewö jim kutum neᅇgiyök ahöza, ‘Azi kun ambi meiga nahönbörat qahö ahui kömuiga munᅇan ölop malöᅇi memba mala gwölönarök qiwikᅇaim waᅇgiiga datᅇᅇᅇgö qet bisiba malma.’²⁵ Mötnöᅇ, nalö kunöᅇ darumun 7 malget. Datᅇᅇini mutukᅇᅇan ambi memba mala gwölönarökᅇi qahö öne mala kömuyök. Kömuiga munᅇan malöᅇi mi meyök.

²⁶ ‘‘Memba mala kömuiga munᅇi kunᅇan malöᅇi mi meyök. Meiga miaᅇgö andöᅇe munᅇi kunöᅇ ambi miyök meyök. Mewöᅇa mewö darumun 7 pakpak yeᅇön ambi mohok miyök memba gwölönarök qahö mala kömum teköget. ²⁷ Kömum tekögetka qöndökᅇi malöᅇini mi mewöyök kömuyök. ²⁸ Göᅇön ‘Kömugeri, yeᅇön guliba wahötmē,’ jizänmö, nini mi qahö möt narizin. Mötnöᅇ, azi 7 pakpak mi öröröᅇ wahötpēak ewö, ambi mohok mi anöᅇᅇina meget malöᅇaᅇgöra aka mönö dagö anöᅇᅇa akawak?’’

²⁹ Mewö qesigetka Jisösnöᅇ mēᅇᅇda kewö jii mötket, ‘‘ᅇᅇini keu jim sohoze. Urumēᅇᅇgö Buᅇa Kimbiᅇi aka Anutugö kukösümᅇi qahö

* **22:23:** Apo 23.8 * **22:24:** Dut 25.5

möt kutuzeaᅅgöra mönö janjuᅅ ahakze. ³⁰ Ölnᅅ, kömupnöhök wahöta nalö mianᅅgöreᅅ awanöm qahö akᅅemö, garata yeᅅön Suep mire maljeaᅅgö tandök aka malme.

³¹ “Mötket! Kömugeri, yeᅅön guliba wahötmegö keuᅅi Anutunöᅅ ᅅᅅgöra jiyöhi, inini mi lök oyonᅅet me qahö? Keu mi kewö, ³² *‘Nöhön Anutu Abrahamᅅö Kembu, Aisakö Kembu aka Jeikobkö Kembuya mala kota maljal.’ Anutunöᅅ kömukömuᅅi yeᅅgö Kembuᅅini qahöpmö, malmal köhöikᅅi maljei, mönö yeᅅgö Kembuᅅina malja.” ³³ Jisösnöᅅ mewö ambazip kambu kusum ᅅᅅgii möta welipköᅅet. Mewö.

Jöjöpaᅅ keu bohonᅅi yahöt mi denöwö?

Mak 12.28-34; Luk 10.25-28

³⁴ Sadyusi (Jike nupkö kapaᅅkölköl) yeᅅön Jisös qesim waᅅᅅigetka melenᅅda jim soroköiga keu bök akeri, mi Farisi (Köna keugö kapaᅅkölköl) yeᅅön möta kaba tokoᅅet. ³⁵ *Yeᅅᅅöreᅅök böhi kun Köna keu törörök möt kutuyöhi, yaᅅön kaba Jisös bötak ala kewö qesim waᅅᅅiyök, ³⁶ “Böhi, Mosesᅅö Köna keu uruᅅe wani jöjöpaᅅ keu mi bohonᅅi ketanᅅi akza?”

³⁷ *Qesim waᅅᅅiiga melenᅅök, “Bohonᅅi ketanᅅi mi kewö, ‘Gi urugi jömukᅅi, uᅅagi jömukᅅi aka mötmötki jömukᅅi mianᅅön mönö Kembu Anutuᅅi jöpaköba malman.’ ³⁸ Mianᅅön jöjöpaᅅ keu bohonᅅi aka mutukᅅi akza. ³⁹ *Jöjöpaᅅ keu mianᅅö alaᅅi kewö, ‘Nangi jöpaköm aᅅᅅumakzani, mewöᅅanök mönö ambazip pakpak jöpaköm ᅅᅅᅅiba malman.’

* **22:32:** Eks 3.6 * **22:35:** Luk 10.25-28 * **22:37:** Dut 6.5

* **22:39:** Lew 19.18

40 Jöjöpən keu yahöt mi mönö Mosesgö Köna keu aka kezapqetok ambazip yeŋgö Buzup Kimbi pak-pak mienjö bohonnina akza.” Mewö.

Kraist mi kin Deiwidkö Kembuni aka gwölönarökni.

Mak 12.35-37; Luk 20.41-44

41 Farisi (Köna keugö kapankölköl) yeŋön kaba tokogetka Jisösnöŋ kewö qesim eŋgiyök, 42 “Inini Kraistköra denöwö mötze? Yaŋön mönö dagö nahönŋa akza?” Mewö jiiga melenđa jiget, “Mönö kin Deiwidkö gwölönarökŋa akza.”

43 Jigetka jiyök, “Mewö akzapmö, denöwö aka Uŋa Töröŋan Deiwid sölölohöm waŋgiiga yaŋgöra ‘Nani Kembuni,’ qeta kewö jiyök,

44 *‘Anutunöŋ kinda nöŋgö Kembuni kewö jii mörök, Göŋön mönö kaba nöŋgö böröni ölje tatnöŋga nöŋön nalö sutje kerökurupki tim tötala luhut al eŋgiba göhö köna tambö gwaröŋe al eŋgimam. Nalö mi kam kuŋgumawaŋgö dop mönö asak-mararaŋnöŋ ki tatman.’

45 Deiwidnöŋ nanŋak mewö jiba qetŋi ‘Nöŋgö Kembuni’ jiza. Kembuni jiba mönö denöwö aka yaŋgö gwölönarökni mohot akawak?”

46 Mewö jiiga miangö kitipŋi kunöŋ kun melenmamgö osiba keu bök kinget. Sömaŋi miangöreŋök körek yeŋön Jisös kunbuk keu kungö qesim waŋgibingö kölköldömdöm aka mosötket. Mewö.

* **22:44:** Sum 110.1

23

*Urumelenḡo silesile malmalgö galöm meme keu
Mak 12.38-39; Luk 11.43, 46; 20.45-46*

¹ Nalö miangörenḡ Jisösnöḡ ambazip kambulelembe aka gwarekurupḡi yeḡgöra kewö jii mötket, ² “Köna keugö böhi aka Farisi (Köna keugö kapaḡkölköl) yeḡön Mosesgö jakömbuaknöḡ tata Köna keugö könaḡi kukösum qakḡe kusum enḡimakze. ³ Miangöra keu pakpak jim kutum enḡimakzei, mi mönö tem kölmemö, ahakmemeḡini mi kude wuatangöme. Yeḡön keu jitḡinan jim asarimakzemö, nanḡinak mi qahö wuatangömakze. Miangöra mönö i ewö kude ahakḡe.

⁴ “Yeḡön keuḡi keuḡi jim kutuba miangö köḡjöḡ lömbötḡi ambazip awötḡine alagun algetka mi tem kölbḡingö lömböriiga jaraḡbaraḡ ahakzemö, nanḡinak i kesötḡini moröḡi kunöḡ bauköm enḡibḡingö wösömötmötḡini kun qahö ahöza.

⁵ * “Yeḡön ahakmemeḡini pakpak ambazipnöḡ enḡekḡegöra aka memakze. Baiböl keu köt (memori wös) irimuḡḡa bokisḡini mem qariba aukḡe kondela Buḡa mötmötḡinaḡgöra aiweliköm aḡumakze. Malukuḡinaḡgö suḡe aködampungö bireḡi ketanḡi ketanḡi memba möndömakze. *

⁶ Yeḡön közölömbuaḡnöḡ dum tatat mutukḡe jeḡep tatpingö mörakze aka köuluk mire qaikḡe eu tatpingö sihimḡi mörakze. ⁷ Maketnöḡ me

* **23:5:** Mat 6.1; Jaḡ 15.38; Dut 6.8 * **23:5:** Baiböl memori wös irimuḡḡaḡi mi (Dut 6.8) koropenḡ me jeḡjeḡ ewö jöhömalget. Malukuḡinaḡgö suḡe aködampungö bireḡi mötnöḡ memba möndömalgeri, mi Anutugö ambazip öl töhöḡḡi akerangö aiwesökḡi ahök.

könanöŋ ambazip engeketa jölöŋini jimegö möta ‘O ketaŋamnini,’ qetŋini mewö qetmegöra sihimŋini mörakze.

⁸ “Yeŋön mewö ahakzemö, mohok-kun yaŋön enğö Böhiŋini aiga iŋini körekŋan yaŋgö urumelen alaurupŋi akze. Miaŋgöra enğö qetŋini böhinini qetmegöra kude mötme. ⁹ Mohok-kun yaŋön İwiŋini akza. Yaŋön Suep mire maljawaŋgöra gölme azi kungöra neŋgö iwinini qet mewö kude qetme. ¹⁰ Kraist mohok-kun nöŋön enğö ketaŋamnini akzal. Miaŋgöra enğö qetŋini ketaŋamnini qetmegöra kude mötme.

¹¹ *“Mewö qahöpmö, enğö sutŋine bohonŋi akzawaŋön mönö welen qem enğiba malma.

¹² *Mewö malmapmö, kunŋan nanŋi uruŋi memba öŋgömawi, Anutunöŋ mönö i memba et al waŋgima. Kunŋan nanŋi uruŋi memba etmawi, Anutunöŋ mönö i memba öŋgöba al waŋgima.”

Jisösnöŋ Farisi yengöra wölköba Yei! jiyök.

Mak 12.40; Luk 11.39-42, 44, 52; 20.47

¹³ “O Köna keugö böhi aka miaŋgö kapaŋkölköl ambazip! İŋini urumelenğö silesile ambazip aketka lömböt qakŋine öŋgözawaŋgöra mönö wölköba Yei! jizal. Ambazip Suepkö bemtohon uruŋe aŋgotpepukö naŋguŋi köla jöhömakze. Nanŋinak miaŋgö uruŋe qahö aŋgotze aka tosatŋan miaŋgö uruŋe aŋgotpingö akzei, iŋini i jöhöba aŋgön köl enğimakze. ¹⁴ O Köna keugö böhi aka miaŋgö kapaŋkölköl ambazip! İŋini urumelenğö silesile ambazip aketka lömböt

* **23:11:** Mat 20.26-27; Mak 9.35; 10.43-44; Luk 22.26 * **23:12:** Luk 14.11; 18.14

qakɲine öngözawaɲgöra mönö wöłziköba Yei! jizal. İjini malö yeɲgöreɲ miri yuai bidaɲda gagabe köla eɲguaɲgirakze aka qetbuɲaɲini asuhumapköra aka köuluk köröpɲi köuluköba töptöpɲine qemakze. Mianğöra Anutunöɲ keuɲini jim teköba likepɲi öngöɲgöɲi meleni eɲgö qakɲine öngöma.

¹⁵ “O Köna keugö böhi aka mianğö kapaɲkölköl ambazip! İjini urumelenğö silesile ambazip aketka lömböt qakɲine öngöza-waɲgöra mönö wöłziköba Yei! jizal. İjini kunöɲ Juda ambazip kun akɲapköra kapaɲ köla köwetɲi köwetɲi kutuba gölmeɲi gölmeɲi lilikömakze. Mewö aketka kunɲan Juda neɲgö ahakmemenöɲ qekötahömawi, i mönö kusum sohom waɲgigetka könöp siagö buɲaya kun akɲa. Nanɲini ewö qahöpmö, indimɲi yahöt nanɲini eɲgoɲgita böliqölima.

¹⁶ “Jeɲinan gömöliiga ambazip böröɲine memba eɲguaɲ-girakzei, lömböt eɲgö qakɲine öngözawaɲgöra mönö wöłziköba Yei! jizal. İjini keu kewö jimakze, ‘Kunɲan jöwöwöl jikegö qetɲe keuɲi jöjöpəɲ keunöɲ jim köhöima ewö, mianön qahö köhöiməpmö, kunɲan jöwöwöl jikegö yuai goulnöɲ memeni mianğö qetɲe jöjöpəɲ keuɲi jima ewö, jöjöpəɲ keu mianön mönö jöhöm waɲgima.’

¹⁷ “O jegömöl ambazip mötkutukutuɲini piromɲi! Yuai goulnöɲ memeni aka jöwöwöl jike yahöt mi-etköreɲök wani yuainöɲ öngöɲgöɲi akza? Goulnöɲ nanɲak kömbukɲi qahö akzapmö, jöwöwöl jikenöɲ algetka mianön mönö mi mem kömbuhiza.

¹⁸ “Keu kun kewö jimakze, ‘Kunɲan altagö qetɲi qeta keuɲi jöjöpəɲ keunöɲ jim köhöima ewö, mianön qahö köhöiməpmö, kunɲan naluk kötin altanöɲ ahözawi, mianğö qetɲi qeta jöjöpəɲ

keuñi jima ewö, jöjöpañ keu mianjön mönö jöhöm wanjima.’

19 “O jegömöl ambazip! Naluk kötin aka alta mietköreñök wani yuainöñ öngöngöñi akza? Naluknöñ nanñak eretñi akzapmö, altanöñ algetka mianjön mönö naluk mem kömbuhiza. 20 Mianğöra kunñan altagö qetñe keuñi jöjöpañ keunöñ jim köhöimawi, yañön alta aka yuai pakpak altanöñ ahözawi, mönö mianğö qetñe keuñi jim köhöima.

21 “Kunñan jöwöwöl jikegö qetñe keuñi jöjöpañ keunöñ jim köhöimawi, yañön mönö jike mianğö aka mianğöreñ mal köhöizawanğö qetñe keuñi jim köhöima. 22 *Mewöyök kunñan Suepkö qetñe keuñi jöjöpañ keunöñ jim köhöimawi, yañön Anutugö jakömbuak dum aka mianğöreñ tatzawanğö qetñe keuñi jim köhöima.

23 * “O Köna keugö böhi aka mianğö kapañkölköl ambazip! Inini urumelenğö silesile ambazip aketka lömböt qakñine öngözawanğöra mönö wöziköba Yei! jizal. Inini nene pakpak mendenđa bahöñi 10 mianğöreñök mohot Anutugö buñaya qemakze. Gipñi, raki aka kiap kösö köt mi mewöyök mendenđa tenöhök mohot mi Anutugö buña qemakze. Naluk mi törörök alakzemö, Köna keugö kötni bohonñi ki mönö oñgita mosörakze: Gi ambazip sutñine ahakmeme diñdiñi wuatangöba ak kömum anğuba keu pöndañ wuatangöba malman. Keu bohonñi mi mönö kapañ köla wuatangöba malme aka keu morömorö mi mewöyök kude oñgita mosötme. 24 Jeninan gömöliiga ambazip böröñine memba

* 23:22: Ais 66.1; Mat 5.34 * 23:23: Lew 27.30

enğuanğirakzei, inini söp obuk nembepuköra onini saianön kewörakzemö, sömbup ketanji kamel mi lañ gwahörakze. ²⁵ O Köna keugö böhi aka miangö kapanjkölköl ambazip! Inini urumelengö silesile ambazip aketka lömböt qakñine öngözawangöra mönö wöziköba Yei! jizal. Inini amöt qem anğubingöra qambi aka al nenegö silenji sanğon yakömakzemö, dogo jimamonini qahö galöm köla yuai lañ göröngöba membagun megetka nepaqepalok mianön urunini kokolak qei malje.

²⁶ “O jegömöl azi Köna keugöra kapanj kölakzani, gi mönö mutuk qambigö urunji sanğonönğa silenjan mewöyök sarakñi akña. ²⁷ *O Köna keugö böhi aka miangö kapanjkölköl ambazip! Inini urumelengö silesile ambazip aketka lömböt qakñine öngöza-wangöra mönö wöziköba Yei! jizal. Inini qaksirigö maripomñi sanğongetka tuatñi akeak, mönö miangö dop akze. Silenjan eksihimñinambuk tandök akzemö, qaksirigö uruñe qamöt sihit aka yuai imbilonlonambuk mianön kokolak qei ahöza.

²⁸ “Miangö dop enön mewöyök ambazip jenine ölña diñdiñi tandök asuhumakzemö, urumelengö silesile tandök aka qewölonönj mönö urunini kokolak qei malje.”

Bölöñi memenangö likepñi

Luk 11.47-51

²⁹ “O Köna keugö böhi aka miangö kapanjkölköl ambazip! Inini urumelengö silesile ambazip aketka lömböt qakñine öngöza-wangöra mönö wöziköba Yei! jizal. Inini kezapqetok ambazip

* **23:27:** Apo 23.3

yeŋgö qaksirinöŋ simen koum memakze aka ambazip solanŋi yeŋgö köt kötenjini meŋölömakze. ³⁰ Mewö aka kewö jimakze, ‘Neŋön ambösakonini yeŋgö nalönöŋ malbinak ewö, mönö yembuk qahö toroqeinga kezapqetok ambazip yeŋgö sepŋinan mönö neŋgö qaknine qahö öŋgöbawak.’

³¹ “Mewö jiba mianöŋ nanninak kezapqetok ambazip eŋgugeri, yeŋgö isiurupŋina akzei, mönö keu mi naŋgöba jiba dangunu ewö kinje. ³² Miangöra ambösakonŋinan ŋiŋgisöndok könahiba akeri, miangö dop iŋini mönö toroqeba körek ak teköme.

³³ *³³“O soramen, iŋini mönö qatö moröŋi ewö akze. Anutunöŋ keuŋini jim teköi könöp sianöŋ gebepuköra mönö denöwö unjuratpeak? Mi mönö osime. ³⁴ Miangöra mötket, nöŋön kezapqetok aka mötkutukutu ambazip aka Köna keugö böhi melaim eŋgibi eŋgöreŋ kame. Kagetka yeŋgöreŋök tosatŋi i eŋguget kömume aka tosatŋi maripom qakŋe al eŋgime. Tosatŋi köuluk miriŋine örörahöm eŋgiba keuŋini jim teköba ihileknöŋ tauköm eŋgiba közöl eŋgigetka taonŋi taonŋi miangöreŋ anakŋe.

³⁵ *³⁵“Azi solanŋi Abelgö sepŋan eriga miangöreŋök könahiba eŋguba kota mala Zekaraia jöwöwöl jike kömbukŋi aka jöwöwöl alta mietkö sutŋire qeget sepŋi eri miangöreŋ teköyök. Ambazip solanŋi yeŋgö sepŋini gölmenöŋ mokomalgeri, sep pakpak miangö kitipŋan mönö eŋgö qakŋine öŋgöma. ³⁶ Nöŋön keu ölni kun kewö jibi mötme: Sepŋinanöŋ kitipŋi pakpak mi

* **23:33:** Mat 3.7; 12.34; Luk 3.7 * **23:35:** Jen 4.8; 2 Hist 24.20-21

mönö ambazip merak maljei, engö qakñine öngöi Anutunöñ likepñi melenj engii mötme.”

Jisösnöñ Jerusalem könagesö jöpaköm engiyök.

Luk 13.34-35

³⁷ Jisösnöñ jiyök, “O Jerusalem Jerusalem, injini kezapqetok ambazip enguget kömugetka Anutunöñ ambazip melaim engii engören kamakzei, mi kötnöñ kumbuköm engimakze. Poi namñan moröurupñi ginginñi bapñe ala köjöjohom engimakzawi, nöñön mönö mianjö dop nalöñi nalöñi göhö könagesöurupki kötala tokom engimamgö möta malalmö, injini mi tököba mala kotket. ³⁸ *Mötket, Anutunöñ mönö jike mirinini andö qeiga sahopenanök ahöma.

³⁹ *“Mewö ahömapmö, nöñön kewö jibi mötket, injini ni kunbuk qahö nekñe. Könangep nalö kun kam kuñgui mianjöören neka kewö jime, ‘Kembugö qetñe kam neñgizawi, Anutunöñ mönö i kötuetköm wañgima.’ Mewö.”

24

Jöwöwöl jikenöñ köndenmöndenj asuhuma.

Mak 13.1-2; Luk 21.5-6

¹ Jisösnöñ jöwöwöl jike mosöta eriga gwarekurupñan yangören kaba jöwöwöl jikegö tohon uruñe miri tatkeri, mi Jisös kondel wañgiget. ² Kondel wañgigetka melenja kewö jii mötket, “Miri pakpak mi ölop engekzemö, nöñön keu ölna kewö jibi mötket: Mi mönö köndengetka mirigö köt kun mi köt kungö qakñe qahö ahömapmö, qeqelanlan aka sahopenanök ahöma.” Mewö.

* **23:38:** Jer 22.5 * **23:39:** Sum 118.26

Kahasiliñ aka sesewerowero asuhuma.

Mak 13.3-13; Luk 21.7-19

³ Jisösnöñ Oil ip kundunje anda tariga gwarekurupñan nanñinöhök yangören kaba kewö qesim wanğiget, “Böhi, keu jizani, miangö ölni mönö wanat nalönöñ asuhum tingitma aka göñön kanöñga gölmegö nalöñan tekömamgö akñawi, miangö aiwesökñan mönö denöwö asuhum? Mia ölop jinöñ mörin!”

⁴ Mewö qesim wanğigetka melenđa kewö jiyök: “Kunñan isimkakalek aiga janjuñ anbepeköra mönö galömñini memba malme. ⁵ ‘Ambazip gwötpukñan asuhuba nöñgö qetne kewö jime, ‘Nöñön Amötqege Tonji Kraist akzal’. Mewö jiba ambazip gwötpuk tilipköm engime. ⁶ Inini yarö miengö buzupñini aka ötoñini asuhugetka mörakñe. Mi möta jönömñini undubapüköra mönö galömñini meme. Yuai mewöñi mi mutuhök asuhumapkö jijina. Mi asuhumapmö, gölmegö nalöñan mönö miangörenök zilañ qahö teköma.

⁷ “Kantri kunñan kantri kun engubingöra wahötme. Ambazip kambu kunñan kambu kun yembuk aröñ angubingöra wahötme. Gölmeñi gölmeñi miangören bödiñi bödiñi (buöröñi buöröñi) asuhume aka kenöñ ketañi ketañi mi qözöla memba gölme melenñi gemakña. ⁸ Yuai pakpak mi ambi köröbuknöñ masi könahiba engumakzawangö dop. Gölmegö nalöñan mönö miangö dop könahiba tekömamgö akña.

⁹ * “Mewö akñapmö, nalö miangören tosatñan inini uruñini melenğerañgöra aka gawman yenğö

* 24:9: Mat 10.22

böröñine al engigetka sihimbölö ak engiba enjuget kömume. Kantri pakpak yenjon nöngöra aka kazik ak engimakne. ¹⁰ Nalö mianğoreñ gwötpukñan mötnaripñini mosöta aņğonañ memba kazik ak aņgume. ¹¹ Kezapqetok ambazip takapulakanji gwötpukñan asuha ambazip gwötpuk kilikaluk ak engigetka janjuñ anakne.

¹² “Iwilele Toñan sehiba ambazip galöm köl engimawaņğöra aka urumelen ambazip sehisehiji yengö uruñinan amöriiga urukalemñinan sörörauma. ¹³ *Kunñan kapan köla köhöiba böñ qeba kinda maliga gölmegö nalöñan tekömawi, yañon mönö oyaenköyaen buña qem aņguma. ¹⁴ Anutugö bemtohoñagö Ölöwak Buña ki mönö mutuk gölmegö kantriñi kantriñi pakpak mianğoreñ jim sehigetka könagesö dop nañğonañgö keuñi mötketkun gölmegö nalöñan mianğö andöñe teköma.” Mewö

*Jerusalem sitigö köndermönder uru-önönñambuk
Mak 13.14-23; Luk 21.20-24*

¹⁵ *“Kezapqetok azi Danielnöñ köndermönder uru-önön-ñambukö keuñi jii ahöza. Keu mianğö dop tosatñan kaba köndermönder aka yuai aņğöjörakñambuk mi jöwöwöl jike töröñe alget kiniga ekñei, - keu ki oyoñmawañon mönö ölop kezap ala möt kutuma- ¹⁶ nalö mianğoreñ Judia prowinsnöñ malmei, eñon mönö misiñgöba öröba kundunje anme. ¹⁷ *Miri kösutñe sombemnöñ malmawañon mönö eta gösö yuaiñi memamğöra miri uruñe kude öñgöma. ¹⁸ Nupnöñ anda

* **24:13:** Mat 10.22 * **24:15:** Dan 9.27; 11.31; 12.11 * **24:17:** Luk 17.31

malmawaŋön mönö mewöyök malukuŋi memaŋgöra lilingöba mirinöŋ kude anma.

¹⁹ “Yei! Ambi gölömbuk aka morö juzunöŋ yeŋön nalö miaŋgöreŋ denöwö ösumŋinan anbeak?

²⁰ Miaŋgöra yuai mi kie uru me Sabat kendongö nalöŋe kude asuhumapköra köuluköme.

²¹ *[“]Mi kewögöra: Nalö miaŋgöreŋ kahasililin keta bölökŋi asuhuma. Kahasililin dopŋi mewöŋi mi mönöwök nalö kungen kude asuhuba ahöyök. Anutunöŋ yuai pakpak miwikŋaiyöhi, nalö miaŋgöreŋök könahiba nalö kiaŋgöreŋ mala kota nalö sutŋe kun kude asuhuyök. Mönöwök qahö asuhuyök aka könŋep nalö kunöŋ kunbuk qahö ahuma. Miaŋgöra mönö köuluköba malme.

²² Kembunöŋ wahöjalin nalö mi qahö mem töribawak ewö, ambazip körekŋan mönö ayuhum teköbeakmö, ambazip nanŋaŋgöra möwölöhöm eŋgiyöhi, yeŋgöra aka wehön miengö qötöŋini mem törima.

²³ “Nalö miaŋgöreŋ kewö jime, ‘Mötket! Kraistnöŋ ki malja,’ me ‘Eket! Amötqeŋe Toŋan endu kinja.’ Kunŋan mewö jima ewö, mi mönö kude möt narime. ²⁴ Mi kewögöra: Amötqeŋe toŋi munenŋi aka kezapqetok ambazip takapulakani asuhuba aŋgöletot aka aiwesök ketanŋi ketanŋi megetka letotme. Mewö letotketka Anutunöŋ ambazip nanŋaŋgöra möwölöhöm eŋgiyöhi, i mewöyök eŋlolonŋ mem eŋgimegö esapköba kapan kölgetka janjuŋ akepuk. Eŋön ölopŋanök galöŋŋini memba malgetka mi osibeak. ²⁵ Mötket! Nöŋön

* **24:21:** Dan 12.1; Ind 7.14

yuai pampak mi qahö asuhuiga qeljine lök jibi mötze.”

Suep gölmegö azi ölnan mönö asuhum tinjitma.

Mak 13.24-27; Luk 21.25-28

²⁶ *“Miangöra ‘Amötqeqe Tonjan mönö gölme apopamkölkölne malja,’ mewö jiget mötme ewö, miangören mönö kude anme. Me ‘Mötket! Kraistnöñ mönö miri miangö uruñe asuhuba tatzawi,’ mewö jiget möta mi kude möt narime.

²⁷ Mi kewögöra: Suep gölmegö azi ölnan kunbuk kamawi, nalö mi mönö wölbilikö dop kewö akña: Mi wehön kotkotneyök zilañ biliksik ala likepñe wehön gegenë dop köla asariba ani ekzini, yañön mönö miangö dop asuhuma.

²⁸ *“Sömbup gisakñan kungen ahöiga, manu köraraknöñ miangören öröba tokomakzei, miangö dop asuhuma.” Mewö

Suep gölmegö azi ölnan asuhuma.

Mak 13.24-27; Luk 21.25-28

²⁹ *“Wahöjalin nalö miangön teköiga miangörenök wehön jeñan injañ köliga köiñnöñ ömuñ kölma. Sengelau yeñön suepnöhök teköba etme aka suepnöñ uturuköiga miangö öröyuaini mi tatatñini mosöta enjololon aketka sohoma.

³⁰ *Nalö miangören Suep gölme azi ölnangö aiwesökñan suepnöñ asuhuiga ekñe. Nalö miangören gölmegö könagesö pampak yeñön jinñeñ köla sahötme. Sahöta Suep gölmegö azi ölni yañön suepkö kousu qakñe kañgori ekñe. Kukösumñi

* **24:26:** Luk 17.23-24 * **24:28:** Luk 17.37 * **24:29:** Ais 13.10; 34.4; Eze 32.7; Joel 2.10, 31; 3.15; Ind 6.12-13
* **24:30:** Dan 7.13; Zek 12.10-14; Ind 1.7

ketanjan saköl-diñdiñambuk aukne asuhuiga asakmararanji ekne. ³¹ Kanğori eketka tömunji qainji kun ugetka ötöñi köhöikñi mötketka Suep garataurupñi melaim enğiiga yeñön ambazip Anutunöñ nanñanğöra möwölöhöm enğiyoñhi, i gölme göranji likeplikkep euke emuke miangğorenök kölolohoba enğuanğitme.” Mewö

Geröp ipkö dopkeu

Mak 13.28-31; Luk 21.29-33

³² “Inji geröp ip eka tandökñi mötmöriba dopkeu ki mötme. Böröñan lök oñambuk aiga sinñini yonğoigetka mi eka möta kewö jimakze, ‘Wehön nalöñan mönö dopdowiza.’ ³³ Enñon mewöñanök aiwesök miangğö dop asuhuiga eka möt asariba könanji kewö jime, ‘Jisösnöñ mönö nanğunöñ dopdowiza.’

³⁴ “Nöñon keu ölnji kun kewö jibi mötket: Ambazip ki merak gölmenöñ maljei, yeñön qahö kömugetka yuai pakpak jizali, mi mönö yeğö malmal nalöñine asuhuma. ³⁵ Suep gölmenöñ ayapkömahotmö, nöñgö Buña keunan mönö nalö kunöñ qahö ayapköma.” Mewö.

Jisös kamawanğö nalöñi mi kunñan qahö mötza.

Mak 13.32-37; Luk 17.26-30, 34-36

³⁶ “Suep gölmegö azi ölnjan kamapmö, dawinöñ kam kuñgumawi, miangğö wehönñi me aua nalöñi mi kunñan kun kude mötza. Suep garatanöñ mi qahö mötze. Anutugö Nahönñan mewöyök mi qahö mötza. Iwinöñ nanñök mi mötza. ³⁷ *Mönöwök Noagö nalöñe ambazipnöñ malmalñini qemasolokep qakne mala ayuhugerı,

* 24:37: Jen 6.5-8

miaŋgö dop mönö Suep gölmegö azi ölnan kunbuk kamawaŋgö nalöŋe asuhuma.

³⁸ “O göulu ketanjan qahö kaiga qeljiŋe miaŋgöreŋ ambazip nene lömbuan ala o köhöikŋi namba ambi kenam bohonnaŋgö alget anda kaiga aŋgömeget. Ahakmeme mewö aka memba qemasolokep malgetka Noanöŋ waŋge uruŋe öŋgöyöhi, silim miaŋgöreŋ teköyök. ³⁹ *Teköiga wanat yuai asuhumawi, mi qahö mötketka o göulu ketanjan kaba jinonŋi qahö ayuhum enŋiyök. Könaŋgep Suep gölmegö azi ölnan kunbuk kamawi, nalö miaŋgöreŋ ambazipnöŋ mewöŋanök qemasolokep aka mala ayuhume.

⁴⁰ Nalö miaŋgöreŋ azi yahöt nupnöŋ malohotka yetköreŋök kun waŋgita kun mosötme.

⁴¹ Mewöŋanök ambi yahöt taweŋ urasiba (bunahöba) tatmahori, yetköreŋök kun waŋgita kun mosötme.

⁴² “Kembunöŋ kamawaŋgö nalöŋi me auanji qahö mötzeanğöra mönö uruguliguli aka malme.

⁴³ *Gwölö malbingö keu ki mönö möt kutume: Sunğem aiga kegwek-kahasililiŋ azinöŋ wani nalönöŋ me auanöŋ kamawi, miri toŋan mi mötpawak ewö, yaŋön mönö gwölö mala mirinji ölöŋanök galöm meiga qesiŋda öŋgömamgö osima.

⁴⁴ İŋini ‘Suep gölmegö azi ölnan nalö kianaŋgöreŋ qahö kaŋgotma,’ jiba mötmöriŋetka yaŋön mönö nalö miaŋgöreŋök kaŋgotma.” Mewö.

*Nup azinöŋ silekmalek mala ayuhuyök.
Luk 12.41-48*

* **24:39:** Jen 7.6-24 * **24:43:** Luk 12.39-40

⁴⁵ “Mewö aiga nup meme ambazip sutñine danñon tiñ kutuba tosatñi enğonğitza? Tosatñan sörörauba nup mosötketka kunñan mötkutukutu ölöpnanğö qakñe kapan köla pöndan memakzawi, yanñon mönö simbawon akza. Miri toñan ahakmemenji kewöta eka kungen anda mirinğö öröyuañi mi böröñe ali galöm akña. Galöm aka welenqeçeurupñi jiyöhanğö dop köyan köla nalö diñdiñe gumohom enğimakña. ⁴⁶ Mewö köyan köl enğiba maliga toñan lilingöba kaba mewö eka mönö simbawon jima.

⁴⁷ “Nöñon keu ölnji kun kewö jibi mötket: Toñan simbawon jiba sukinapñi pakpakö galömñi kuñgum wanğima. ⁴⁸ Kuñgum wanğimapmö, nup meme okonñi yanñon uruñan mötmöriba kewö jima ewö, ‘Kembunanğö kaka nalöñan mönö köröpñi ahöza.’ ⁴⁹ Mewö jiba könahiba nup meme ambazipurupñi enğum ureiba közölömbuan ala söñgaiba o köhöikñi nemba uruñi sohoiga enjololon silekmalak aka malma.

⁵⁰ “Mewö mala nalö kunöñ kembunji kanğotmapköra qahö mambötmawi, mönö miangöreñ kanğotma. Nalögöra ikmaok inululun mali mönö aua miangöreñ kanğota ⁵¹ qeba yayiapaleleñ mem wanğiba jim kutuiga urumelenğö silesile ambazip ewö könöp sianöñ geba sihimbölö mötma. Mewö möta sahöt gigilahöba irimñini yöhözömgögetka qetñi qeri malme.” Mewö.

25

Ambi seram tengö söpsöp keu

1 *Jisösnöŋ jiyök, “Kunbuk kamami, nalö mianğöreŋ Suepkö bemtohoŋan kewö akŋa: Maren lömbuan nalöŋe ambi seram jömukŋi tenŋan ‘Azi buŋabuk aitoŋgöbin,’ jiba kiwaŋini memba könanöŋ anget. 2 Yeŋgöreŋök 5 mi mötkutukutuŋinambuk aketmö, tosatŋi 5 yeŋgö mötkutukutuŋini mi piromŋi. 3 Mötkutukutuŋini piromŋi yeŋön kiwaŋini megetmö, könöp (kuwiŋ) kelökŋi * qahö memba anget. 4 Mötkutukutuŋinambuk yeŋön kiwaŋini aka kuwiŋ kelök kirinŋini mewöyök memba anget. 5 Angetka azi buŋanöŋ zilaŋ qahö kaiga mambötketka nalö köriyöhaŋgöra körek yeŋgö jeŋini böŋböŋ meiga nöropŋini eri sipköba gaun ahöget.

6 “Gaun ahögetmö, sun gem bibiŋe kunöŋ tömun qeri qet kewö mötket, ‘Mötket, azi buŋa kazawo! Mönö yaŋgöreŋ anda aitoŋgöme.’ 7 Qet mi möta ambi seram ten mi körekŋan wahöta kiwaŋini memba möhamgöba ohotiriget. 8 Ohotirigetka mötkutu-kutuŋini piromŋi yeŋön mötmöt ambi yeŋgöreŋ kaba kewö jiget, ‘Neŋgö kiwaninan böközawaŋgöra eŋön mönö kuwiŋ kelökŋi tosatŋi neŋgime.’

9 “Mewö jigetka mötkutukutuŋinambuk yeŋön melenđa kewö jiget, ‘Qahö. Mi inini aka nini dop-nine qahö. Mianğöra mönö stuanöŋ anda nanŋini kuwiŋ kelökŋini söŋgöröŋi meme.’

10 “Mewö jigetmö, kuwiŋ kelökŋi bohonŋi

* 25:1: Luk 12.35 * 25:3: Könöp (kuwiŋ, qiwiŋ) kelökŋi mi Oil ipkö kötŋi mözözamğögetka kelökŋi mi asuhuyök. Miri söŋauiga ip suŋe opo köpeiba kelök mianğöreŋ kundumgöba kiwa ohotiriba könanöŋ angetka 15 minitkö dop jeyök.

membangöra anda könanöŋ malgetka azi buŋanöŋ mönö mianğöreŋök kaŋgorök. Ambi seram jöjöröba kingeri, yeŋön anda yambuk aitonğöba maren lömbuaŋ miri uruŋe öŋğögetka naŋguŋi kölget. ¹¹ *Ambi seram stuanöŋ angeri, yeŋön mewöyök könaŋgep kaŋgota naŋgu qeba kewö qetket, ‘Kembu Kembu, mönö naŋgu metal nenginöŋ!’

¹² “Mewö qetketmö, kewö melenđa jiyök, ‘Qahö. Ni injini qahö möt eŋgizal. Keu ölnja mi jizal.’”

¹³ Jisösnöŋ söpsöp keu mewö jiba gwarekurupŋi yeŋğöra keu kewö jii mötket, “Injini ni kama-maŋğö nalöŋi me auaŋi kude mötzeaŋğöra mönö uruguliguli aka malme.” Mewö.

Moneŋ esu galöm kölgeraŋğö söpsöpkeu.

Luk 19.11-27

¹⁴ *“Mönö dopkeu kianağö dop asuhuma: Azi kun miriŋi mosöta köröwen kantri kunŋan an-maŋğö möta welenqeŋeurupŋi eŋgoholi kaŋgetka moneŋ sukinapŋi galöm kölmeğöra jim kutum eŋgiba böröŋine alök. ¹⁵ Nup memeniŋi kewöta ölni dawik asuhumaŋğö dop möta nup meme azi kungöra moneŋ esu 5 (Kina 5000,-) waŋgiba kun moneŋ esu yahöt (Kina 2000,-) waŋgiba kun mohok-kun (Kina 1000,-) waŋgiyök. Mewö galöm kölmeğöra menden eŋgiba eŋğömosöta anök.

¹⁶ “Azi Kina 5000,- meyöhaŋön mianğöreŋök anda kölkül-örörö nup meiga moneŋ sehiiga esu 5 kunbuk meyök. ¹⁷ Mewöhaŋök Kina 2000,- meyöhaŋön anda kölkül örörö nup meiga moneŋ sehiiga esu yahöt kunbuk meyök.

* **25:11:** Luk 13.25 * **25:14:** Luk 19.11-27

18 “Mewö meyohotmö, azi moneŋ esu mohok-kun (Kina 1000,-) meyohaŋön mönö mosöta anda gölme esiba azi kembuŋaŋgö moneŋi löm köla asambörök. 19 Nalö köröpŋi teköiga welenqeŋe yeŋgö azi kembuŋinan lilingöba kaba ‘Nup megeraŋgö kösohotŋini möta kewötmam,’ jiba köl öröm eŋgiiga kaget.

20 “Mewö kagetka azi Kina 5000,- meyohaŋön jeŋe kaŋgota esu 5 kunbuk toroqeba memba kaba kewö jiyök, ‘Ketaŋamni mötnöŋ, göŋön moneŋ esu 5 niŋginöŋi, nöŋön miangö kölköl öröröŋi membi sehiiga esu 5 kunbuk asuhiiga memba kazal.’

21 “Mewö jiiga azi kembuŋan kewö melen waŋgiyök, ‘Mi ölop. Gi nup meme azi ölopŋi memburik-qemburiki qahö. Gi yuai awamŋi memba mi kapaŋkapaŋ aka galöm köla malnöŋga sehiyök. Miangöra nöŋön yuai gwötpuk göhö böröge albi miangö galömŋa malman. Ölop kaba azi kembugi nöŋgö miri uruŋe kaŋgota mohotŋe sösöŋgai aka malbin.’ 22 Azi Kina 2000,- meyohaŋön mewöŋanök kaŋgota kewö jiyök, ‘Ketaŋamni mötnöŋ, göŋön moneŋ esu yahöt niŋginöŋi, nöŋön miangö kölköl-öröröŋi membi sehiiga esu yahöt kunbuk asuhiiga memba kazal.’

23 “Mewö jiiga azi kembuŋan kewö melen waŋgiyök, ‘Mi ölop. Gi nup meme azi ölopŋi memburik-qemburiki qahö. Gi yuai awamdökŋi memba mi kapaŋkapaŋ aka galöm köla malnöŋga sehiyök. Miangöra nöŋön yuai gwötpuk göhö böröge albi miangö galömŋa malman. Ölop kaba azi kembugi nöŋgö miri uruŋe kaŋgota mohotŋe sösöŋgai aka malbin.’

24 “Miangö andöŋe azi moneŋ esu mohok-kun (Kina 1000,-) meyöhaŋön kaŋgota kewö jiyök, ‘Ketaŋamni mötnöŋ, nöŋön könaŋamgi kewö möt yaköyal: Azi kembunan mönö azi köhöikŋi könöpŋambuk akza. Nangak nene kötni qahö qesiŋ gilnöŋga miangöreŋ mönö töndup ölni sounöŋ yandiba memangö mörakzan. Padi kötni qahö esinöŋ geiga miangöreŋ mönö töndup ölni qezakömangö mörakzan.

25 “Mewö möt yaköba keŋgötni möta anda göhö moneŋ esugi mi gölmenöŋ asambötpiga ahöyök. Eknöŋ, moneŋ esu niŋginöŋi, miyöhök mönö törörök ki.’ 26 Mewö jiba mi waŋgiyökmö, azi kembunan melenŋa kewö jim waŋgiyök, ‘Gi injarere aka welenqeŋe bölöŋi akzan! Gi könaŋamni möt yakönöŋ: Nanak nene kötni qahö qesiŋ gilbiga miangöreŋ mönö töndup ölni sounöŋ yandiba memangö mörakzal. Nanak padi kötni qahö esibi geiga miangöreŋ töndup ölni qezakömangö mörakzal. Nöŋgö tandökni mewö möt yaköbagun mönö wuanöŋgöra ak sohoba malnöŋ?

27 “Gi nöŋgö moneŋni benknöŋ alnöŋga dop kölbawak. Benknöŋ alnöŋga qariiga lilingöba kayali, nalö kiangöreŋ mi ölop suŋambuk membilenak.’ 28 Toroŋgeba tosatŋi yeŋgöra jiyök, ‘Inini mönö qölzöm injarere azi miangö moneŋ esuŋi mi waŋgita kun esu 10 miwikŋaiyöhi, mönö i waŋgime.’

29 *“Dopkeu kiangö könaŋi kewö: Denike yeŋgöreŋ yuai ahözawi, körek yeŋgöra mönö

* 25:29: Mat 13.12; Mak 4.25; Luk 8.18

toroqeba engiget sehiiga kelenmalelen ahöm engima. Mewö sehimapmö, kungören yuai kun qahö ahözawi, yangören yuai mi mönö mewöyök wanğitketka öne töhöntöhön malma. ³⁰ *Ayop, welenqeçe azi omanı nupnangö ölnı qahö i mönö yaigepne gilgetka sönaupnön gema. Mianğören geba sahöt gigilahöba göboını yöhözömgögetka qetnı qeri malme.” Mewö.

Jimtekötekögö nalö ketanę kewö asuhuma:

³¹ *“Suep gölmegö azi ölnan kinda Suep garata pakpak enguangita mohotne kamei, nalö mianğören Suepkö asakmararanan asuhuiga yanön Kin Kembangö jakömbuak dumnon tatma. ³² Tata jiiga gölmegö ambazip kambu pakpak qezaköm engigetka yangö jene asuhume. Asuhugetka lama galömnan lamaaurunı meme (nonın) yengörenök menden engizawi, mianğö dop i mendegenden ak engima. ³³ Mi ak engiba jiiga lama mi böröni ölnę aka meme (nonın) mi qanıne al engime.

³⁴ “Mewö al engigetka Kin Kembangön böröni ölnę kinmei, yengöra kewö jima, ‘Nöngö Iwinan kötuetsköm engii malgeri, inini mönö kaget. Iwi Anutuninan gölme pakpak miwiknaim engiyöhi, nalö mianğörenök lök engöra bemtohon mözözömgöba mei jöjöröba ahöba kotzawi, inini mönö kaba mi buņa qem anğuba malme.

³⁵ ‘Mi kewögöra jizal: Nönön yakanangö kömumba malbiga inini nene niğiba malget. Nönön ogöra qemjen qeba malbiga inini o niğiba

* **25:30:** Mat 8.12; 22.13; Luk 13.28 * **25:31:** Mat 16.27; 19.28

malget. Nöñön kian aka malbiga injini köl öröm niñgigetka miriñine öñgöba malal. ³⁶ Nöñön sile esunañgöra osiba malbiga injini opo kereñ niñgiba malget. Nöñön kawöl nöhöi ahöbiga injini galöm köl niñgiba malget. Nöñön kösö mire malbiga injini ni nekingöra miangöreñ kaba malget.’

³⁷ “Mewö jiiga ambazip solanji yeñön kewö melenj wañgiba jime, ‘Kembu, gi mönö wani nalönöñ yakagahö kömunöñ geke gumohom gi-hiba malin? Mönö wani nalönöñ ogöra qemjenj qeba malnönnga geke o gihiba malin?’ ³⁸ Mönö wani nalönöñ kiana kanönnga geke köl öröm ghiinga mirinine öñgönönnga malin? Mönö wani nalönöñ sile esugahöra osiba malnönnga geke opo kereñ gihiba malin?

³⁹ ‘Mönö wani nalönöñ kawöl göhöi ahönönnga geke me kösö mire malnönnga möta gi gekingöra göhöreñ kaba malin?’ ⁴⁰ Mewö jigetka Kiñ Kembunöñ melenjda kewö jii mötme, ‘Nöñön keu ölnji kun kewö jibi mötme: Injini nani urumelenj alaurupni etqegeñi kiengöreñök kungöra yuai kun ak-eri, mi pakpak mönö ni ak niñgiba malget.’

⁴¹ “Mewö jiba miangö andöñe böröñi qaniñe kinmei, yeñgöreñ melenjda kewö jima, ‘Iwinan qesuahöm enñii malgeri, injini mönö nömosöta ke-salget. Könöp sia teteköñi qahö jem öñgömawi, mönö miangöreñ anda geme. Anutunöñ mi Bölönangö Tonji aka yañgö garataurupñi yeñgöra mözözömgöba meköiga jöjöröba ahöza. ⁴² Mi kewögöra jizal: Nöñön yakanangö kömumba mal-biga injini nene qahö niñgiba malget. Nöñön ogöra qemjenj qeba malbiga injini o qahö niñgiba malget.

43 ‘Nöñön kian aka kabiga injini qahö köl öröm niñgigetka miriñine qahö öngöba malal. Nöñön sile esunañgöra osiba malbiga injini opo kereñ qahö niñgiba malget. Nöñön kawöl nöhöi ahöyal aka kösö mire malalmö, injini ni nekingöra miangören qahö kaba malget.’

44 “Mewö jiiga yeñön mewöyök melen wañgiba kewö jime, ‘Kembu, gi mönö wani nalönöñ yaka-gahö kömunöñ me ogöra qemjen qeba malnöñ me kiana malnöñ me sile esugahöra osiba malnöñ me kawöl göhöi ahönöñ me kösö mire malnönga nini gi qahö welen qem gihiba malin?’

45 “Mewö jigetka melen da kewö jii mötme, ‘Nöñön keu ölni kewö jibi mötme: Injini urumelen alaurup etqeqeñi kiengörenök kungöra yuai kun qahö akeri, mi pakpak mönö ni qahö ak niñgiba malget akza.’

46 * “Mewö jii mötketka likepñi melen engii qakñine öngöiga aköm engii anda sihimbölö nalö teteköñi qahö möta mal öngöme. Mewö mal öngömemö, solanñi yeñön oyaen koyaen malmal mi nalö teteköñi qahö mal öngöba malme.” Mewö.

26

Jisös qein kömumapkö anğönañ alget.

Mak 14.1-2; Luk 22.1-2; Jon 11.45-53

1 Jisösnöñ keu pakpak mi jim teköba gwarekurupñi kewö jii mötket, 2 * “Silim yahöt teköigun Pasowa kendonñi kam kuñguma. * Injini mi ölop

* **25:46:** Dan 12.2 * **26:2:** Eks 12.1-27 * **26:2:** Pasowa mi nanine keunöñ Ak-kömukömu kendon. Keu miangö könañi: nenğehoriba nenğonğirök. Eksodus 12.15

mötze. Kam kuŋguiga Suep gölmegö azi ölni mi kian gawman yeŋgö böröjine algetka maripomnöŋ qegetka kömuma.”

³ Nalö miangören jike nup galöm aka kantrigö jitnememe yeŋön tokoba jike nup galöm bohonni qetŋi Kaiafas yaŋgö jakömbuak miriŋe tatket. ⁴ Miangören tata denöwö möndöŋninga Jisös ölöŋ memba qeget kömumbawak, miangö könani jaruba kewötket. ⁵ Jaruba kewöta kewö jiget, “Ambazip irimŋini seholiiga karimŋi karimŋi asuhubepuköra mi sösoŋgai kendon nalöŋe akingö osibin.” Mewö.

Ambi kunöŋ Jisös o umköhöwakŋambuknöŋ miriyök.

Mak 14.3-9; Jon 12.1-8

⁶ Jisösnöŋ Betani mirinöŋ mala Saimon kun uzikukuŋi mem solaniyöhi, yaŋgö mire öŋgöba tarök. ⁷ *Miangören nene memba tariga ambi kunöŋ köt-kirin kun memba yaŋgören kayök. Kirin mi nöluk tuat-tuat qetŋi alabastö mianön memena. Mia o umköhöwakŋambuk mianön kokolak qe-qeŋa. Yaŋön mi bohonni ketanjan memba kaba onŋi Jisösgö nöropŋe mimbiliba miriyök.

⁸ Miriiga gwarekurupŋan mi eka urubölö aka kewö jiget, “Mi mönö wuanöŋgöra mewö ayuhuzawi? ⁹ O kelökŋambuk mi bohonni memegöra ali monen öŋgöŋöŋan asuhuiga mi ambazip wanapŋi enŋiiga dop kölbawak.”

¹⁰ Jisösnöŋ urumötmötŋini mi ek kutuba kewö jii mötket, “Ambi kiangö uruŋi mi wuanöŋgöra mem bölize? Yaŋön silik ölöŋni ak soroköm niŋgiiga

* **26:7:** Luk 7.37-38

dop kölja. ¹¹ *Ambazip wanapņi mi nalöņi nalöņi sutņine malmemö, nöņön enģö sutņine nalö dop qahö malmam.

¹² “Nöņön kömumbi löm köl niņgimeanģöra aka kelök mianģön sileni nömiriza. ¹³ Nöņön keu öļņi kun kewö jibi mötket: Ölöwak Buņa ki kantri igen waigen jim sehigetka anmawi, mianģöreņ ambi kianģön yuai ak niņgizawi, mianģö buņaņi mohok jiget sehiiga yaņģöra mötmöriba malme.” Mewö.

Judasnöņ Jisös mamalolo mem waņgimamģö uru-mohot ahök.

Mak 14.10-11; Luk 22.3-6

¹⁴ Nalö mianģöreņ gwarekurupņi 12 yeņģöreņök kun qetņi Judas Iskariot yaņön jike nup galöm yeņģöreņ anda ¹⁵ *kewö qesim enģiyök, “Nöņön Jisös mamalolo mem waņgiba böröņine albiga eņön töwa wania niņgibeak?” Qesim enģiiga silwö monen kötņi 30 oyoņda böröņe alget. ¹⁶ Aua mianģöreņök könahiba Jisös nalö kungen mamalolo mem waņgimamģö köna möt jaruba köiņbiņģöba malök. Mewö.

Jisösnöņ gwarek yembuk Pasowa lama neget.

Mak 14.12-21; Luk 22.7-13, 21-23; Jon 13.21-30

¹⁷ Beret yistņi qahö mianģö kendon silim mutukņe (Seqononöņ) gwarek yetkön Jisösgöreņ kaba kewö qesim waņgiyohot, “Böhi! Nini miri denikeanģöreņ anda pasowa lama mözözömgöm gihiziga neman? Sihingi denöwö ahöza?”

* **26:11:** Dut 15.11 * **26:15:** Zek 11.12

18 Qesim waŋgiyohotka kewö melenök, “Injiri Jerusalem sitinöŋ öngöba azi kun mötzali, i mi-wikŋaiba kewö jiyohotka mötma, ‘Böhinöŋ jiza: Nöngö nalönan mönö † dopdowiza. Nöŋön göhö mire kaba gwarekurupni yembuk Pasowa lama membin.’” 19 Gwarek yetköŋ Jisösnöŋ jim kutum etkiyöhi, miangö dop aka Pasowa lama mözözömgöyohot.

20 Mare aiga miri söŋauiga Jisösnöŋ gwarekurupŋi 12 yembuk miri miangöreŋ kaŋgota öngöba dum kösutŋe tata nene mendeŋda neget. 21 Nene negerangöreŋ Jisösnöŋ kewö jii mötket, “Nöŋön keu ölni kun kewö jibi mötket: Engöreŋök kunŋan mönö mamalolo mem niŋgima.” 22 Mewö jii möta miangöreŋök uruŋinan wösöbirik ketanŋi aiga könahiba nanŋök nanŋök qesim waŋgiba jiget, “Kembu, mönö nöngöra jibanbuk?”

23 *Qesim waŋgigetka kewö melenök, “Nömbuk beret kuluŋnöŋ kundumgözawi, mönö yaŋön. 24 Suep gölmegö azi ölnan mönö yaŋöra keu ohoget ahözawaŋgö dop ölna gölme mosöta anmapmö, kunŋan i mamalolo mem waŋgimawi, yaŋöra mönö Yei! jiba sahötzal. Miangö likepŋi kaŋjamŋambuknöŋ mönö yaŋgö qakŋe öngöma. Azi mi nam körö uruŋeyök qahö asuhubawak, miangön mönö amqem waŋgibawak.” Mewö.

25 Mewö jiiga Judas mamalolo mem waŋgimawaŋön kewö melenöda jiyök, “Böhi, mi mönö nöngöra jibanbuk?” Jisösnöŋ kewö jii mörök, “Jizani, mönö mewö!” Mewö.

† 26:18: Anutunöŋ Jisös kömumawaŋgö nalöŋi alöhi, miangöra jiza.

* 26:23: Sum 41.9

Kembubuk semön qöndökji neget.

Mak 14.22-26; Luk 22.14-20; 1 Kor 11.23-25

²⁶ Nene nemba tata Jisösnöñ beret memba kötuetsköba mindipköba engiba kewö jiyök, “Ki nani busuni. Ki memba neget.”

²⁷ Mewö jiba wain qambi memba saiwap jiba engiba kewö jiyök, “Injini körek qambi kiangörenök neget. ²⁸*Ki nani sepni. Mi Anutunöñ ambazip yembuk jöhöjöhö aren aiga köhöimapköra sepni mokoget geiga ambazip gwötpuk yengö sinjisöndökjini mosötma. ²⁹ Nöñön keu kun kewö jibi mötket: Nöñön wain kösögö ölni ki kiangören kunbuk toroqeba qahö nemam. Könañgep Iwinangö bemtohoñ uruñe eu taringa közölömbuan almawi, wehön miangören mönö wain o qainji kun mia nemam.”

³⁰ Mewö jiiga sösongai linjet köla mosöta anda Oil ip kundunje öngöget.

Pitönöñ Jisös qañ kölmapkö jii mörök.

Mak 14.27-31; Luk 22.31-34; Jon 13.36-38

³¹ *Öngöba Jisösnöñ kewö jii mötket, “Kezapqetok azi kunöñ keu kun kewö ohoi ahöza, ‘Nöñön galömnjini qebiga lama kambunan denme.’

Miangö dop enön körek sungem kiangören uruñini nöngöra aka böliiga nömosöta buratime.

³² *Buratigetka nuñgumemö, nöñön mönö kömupnöhök wahöta mutuk Galili prowinsnöñ anda miangören asuhum engimam.”

³³ Mewö jiiga Pitönöñ melenäda kewö jii mörök, “Yeñön körek uruñini göhöra aka böliiga gömosöta

* **26:28:** Eks 24.8; Jer 31.31-34 * **26:31:** Zek 13.7 * **26:32:** Mat 28.16

buratime ewö, nöñön mönö töndup nalö kunöñ qahö gömosötman.” ³⁴ Jiiga Jisösnöñ jii mörök, “Nöñön keu ölni kun kewö jibi mötnöñ: Kuruknöñ qahö qeriga göñön merak sun gem qañ köl niñginöñga indimñi karöbut akña.”

³⁵ Mewö jiyökmö, Pitönöñ kewö jii mörök, “Böhi! Mewö qahöpmö, ni nuñgugetka göbuk mohotñe kömumbirak, mi töndup nöñön gi qahö qañ köl gi-himam.” Gwarek tosatñi pakpak mewöyök keu miyöhök jiget. Mewö.

Jisösnöñ Gezemane arönöñ köuluköyök.

Mak 14.32-42; Luk 22.39-46

³⁶ Mewö eraum möta anda yembuk arö kun qetñi Gezemane miangöreñ angotket. Angota Jisösnöñ gwarekurupñi kewö jii mötket, “Nöñön endu anda köuluköbiga inini ölop nalö sutñe ki nanñinök tatme.” ³⁷ Mewö jiba Pitö aka Zebedigö nahönyahötñi yahöt etkuangita angetka Jisösnöñ könahiba wösöbirik möriga köñjiliñan köna böröñi geköyök. ³⁸ Nalö miangöreñ kewö jii mötket, “Nöñgö urunan mönö kondum köla kotzawangöra aka wösöbirik mötpiga kömukömuñi ak niñgiza. Inini ölop kiangöreñ tata nömbuk guli malbin.”

³⁹ Mewö jiba nanñök borom kun toroqeba anda simin köla sipköba kewö köuluköba jiyök, “Iwini, gi yuai kun qahö mölölömbizan. Miangöra sihimgi ahöza ewö, sihimbölögö qambiñi kianñön mönö nöñgö qakne öngöbapuköra noangitman. Noangitman me qahö, mi mönö nangi jit keugahö dop asuhuma. Mi nöñgö sihimgö dop qahö.”

⁴⁰ Mewö jiba lilingöiga gwarekurupñi karöbut yeñön gaun ahöget engeka Pitögö kewö jii mörök,

“Inini aua mohot-töp nömbuk guli malbingö kude köhöize me? ⁴¹ Uruninan guli malbingö sihimni mörakzinmö, sileninan lölöwöröni akza. Miangöra esapesapnöŋ et engubapuköra mönö köuluköba guliguli malme.”

⁴² Mewö jii möriga kunbuk engömosöta anda indimni yahöt aiga kewö köuluköba jiyök, “Iwini, sihimbölögö qambi kianön qahö nongitma ewö, mi ölop nemam-mö, mi mönö nangi jitkahö dop asuhuma.”

⁴³ Köuluköba lilingöiga jeŋini böŋböŋ meyohaŋgöra kunbuk gaunök ahöget engehök.

⁴⁴ Kunbuk engömosöta likep anda keu miyöhök kunbuk jiba köuluköiga indimni karöbut ahök.

⁴⁵ Gwarek yengören lilingöba kaba kewö jii mötket, “Inini toroqeba luhut memba gaunök ahöbingö mötze me? Mötket! Kunöŋ Suep gölmegö azi ölni mamalolo mem waŋgiiga bölöŋi meme yengö böröŋine öngöma. Miangö aua nalöŋan lök kam kuŋguza. ⁴⁶ Mönö wahötketka anin! Mamalolo mem niŋgimawi, yaŋön mönö dowe ki kaza.” Mewö.

Jisös qeraköba memba jöhöget.

Mak 14.43-50; Luk 22.47-53; Jon 18.3-12

⁴⁷ Jisösnöŋ mewö jiba kiniga miangören gwarekurupni 12 yengörenök kun qetni Judas yaŋön kambu ketani kun jitne mem engiiga kaŋgotket. Jike nup galöm aka kantrigö jitnememe yeŋön i melaim engigetka bimgö sou ketani aka liŋgipni memba kaget. ⁴⁸ Mamalolo memamgö ahöhi, yaŋön mutuk yembuk aiwesök keu kewö jöhöba jii mötket, “Nöŋön azi numbuŋi yöhötim

nemami, yañön mönö mia akza. Mönö i memba jöhöme.”

⁴⁹ Mewö jiba kaba miangöreñök Jisösgöreñ aᅇgota “Böhi, böñjöñ!” jiba numbuñi yöhötim neyök. ⁵⁰ Yöhötim neiga Jisösnöñ kewö jii mörök, “Alani, gi wuanöngöra kazani, mi mönö zilañ akñan.” Mewö jiiga azi kambu yeñön Jisösgöreñ kaᅇgota qelanjiba memba jöhöget. ⁵¹ Jöhögetka Jisösbuk malgeri, yeñgöreñök kunñan böröñan bimgö sou ketañi öröba jike nup galöm bohonñangö welenqeçeni qeba kezapñi köteköi erök.

⁵² Jisösnöñ mi eka kewö jii mörök, “Mönö mosötnöñ! Bimgö sou ketañi körök memei, i mönö körek bimgö sou ketañan engui kömume. Miangöra mönö sougi kupinñe qenöñ geyök! ⁵³ Nöñön Iwini köuluköbiga ölop bauköm niñgimawi, mi mötzan me qahö? Köuluköm wañgibileñahi, yañön mönö miangöreñök garata yarö kambu † 12 oᅇgita melaim enñii kaba bauköm niñgibeak. ⁵⁴ Bauköm niñgibeak ewö, Buña Kimbigö keuñan mönö denöwö ölnambuk akawak? Buña Kimbi keugö dop yuai kianön mönö asuhumapkö dop jijña akza.”

⁵⁵ *Nalö miangñöreñök Jisösnöñ yarö kambu yeñgöra kewö jii mötket, “Ni kegwek-kahasiliñ azia qahöpmö, töndup nöngöra mewö möta bimgö sou ketañi aka liñgip memba nömemba jöhöbingöra

† **26:53:** Rom yeñgöreñ liñön me yarö kambu kun mi yarö azi 6000 miangö dop aka maljema. Miangöra yarö kambu 12 miengö jañgöñini mi Suep garata 72.000 miangö dop. * **26:55:** Luk 19.47; 21.37

kaŋgotze. Nöŋön wehön dop jöwöwöl jikenöŋ embuk tata kinda Buŋa keu kusum eŋgiba malbiga qahö nömiget. ⁵⁶ Mewömö, yuai pakpak ki mönö kezapqetok ambazipnöŋ keu ohogeri, mienön öŋjinambuk akŋapköra asuhuza.” Jisös jöhögetka gwarek yeŋön körek Jisös mosöta buratiba unju-rata anget. Mewö.

Jikegö jitŋememe yeŋön Jisösgö keu nup meget.

Mak 14.53-65; Luk 22.54-55, 63-71; Jon 18.13-14,

19-24

⁵⁷ Yarö azi Jisös memba jöhögeri, yeŋön i waŋgita jike nup galöm bohonŋi qetŋi Kaiafas yaŋgö mire anget. Angetka Köna keugö böhi aka kantrigö jitŋememe yeŋön miangöreŋ kaba tokoget. ⁵⁸ Angetka Pitönöŋ sikepsikep eŋguatangöba miangöreŋ aŋgota jakömbuak mirigö kiripo uruŋe öŋgöyök. Öŋgöba teteköŋe denöwö asuhumawi, mi ekŋamgöra welenqeŋe azi yeŋgö sutŋine tarök.

⁵⁹ Mewö tarökmö, jike nup galöm aka jike kaunsöl kambu yeŋön Jisösgö silenöŋ alal keu denöwö möndöba naŋgöinga qeget kömumapkö jim jaruget. ⁶⁰ Jaruba kinda gwötpukŋan wahöta kinda keu munenŋi Jisösgö silenŋe ala naŋgöba jigetmö, töndup könaŋi kun qahö miwikŋaiget. Qahö miwikŋaigetmö, teteköŋe azi yahöt kaŋgota ⁶¹ *kewö jiyöhot, “Azi kianön kewö juiga mörit, ‘Ni ölop Anutugö jöwöwöl jikenŋi köndenŋbiga gölmenöŋ eriga wehön karöbutkö uruŋe mi kunbuk mem wahöta kuŋgumam.’”

⁶² Mewö jiyohotka jike nup galöm bohonŋan wahöta Jisös qesim waŋgiba kewö jiyök, “Yeŋön

* **26:61:** Jon 2.19

göhö silege keu ala nanğözei, mianğö likepni kun jıman me qahö?” ⁶³ Qesim wanğiiga Jisösnöñ yuai bölöñi kun qahö ahökmö, töndup keuñi bök kinök. Keuñi bök kiniga jike nup galöm bohonñan kewö jii mörök, “Nöñön Anutu malmal Toñanğö qetñe kewö qesiba kuñgum gihizal: Gi Anutugö Nahönñi Kraist akzan me qahö, mi törörök jiba jöjopan keunöñ jim köhöinönğa mötpin.”

⁶⁴ *Mewö jiiga kewö jiyök, “Jizani, mönö mia. Miamö, nöñön körek engöra kewö jibi mötket: Nalö kewöneyök könahiba Suep gölmegö azi ölnan mönö Kukösum Toñanğö böröñi öñe tata suepkö kousu qakñe eri ekñe.”

⁶⁵ *Keu mi jiiga jike nup galöm bohonñan malukuñi munjurata kewö jiyök, “Yei, iwinanğö jitñi! Mönö Anutu mepaiköza. Tosatñan keuñi nanğömegöra kunbuk qahö qesim engibin. Anutu mepaiközawi, mi dölki nanñinak möt teköze. ⁶⁶ Mianğöra denöwö mötmörize?” Mewö qesim enğiiga kewö jim teköget, “Yañön mönö kömupkö buñaya akña.”

⁶⁷ *Mewö jim teköba jeñe söutkölap söutköm miriba böröñinan misiba mesoholñe qekötahöget. Tosatñan nuñgulumñe qekötahöba ⁶⁸ kewö jiget, “Gi kezapqetok azi Kraist akzananğöra dañön guhuzawi, mönö yanğö qetñi qetnöñ mörin.” Mewö.

Pitönöñ Jisös qañ kölök.

Mak 14.66-72; Luk 22.56-62; Jon 18.15-18, 25-27

* **26:64:** Dan 7.13 * **26:65:** Lew 24.16 * **26:67:** Ais 50.6

⁶⁹ Mewö asuhuiga Pitönöŋ yaigep kiripo uruŋe sombemnöŋ tarök. Tari welenqeŋe ambi kunŋan yaŋgöreŋ kaba kewö jiyök, “Gi mewöyök Galili azi Jisösbuk mohotŋe malnöŋ.” ⁷⁰ Mewö jiyökmö, körek yeŋgö jeŋine qaŋ köla kewö jiyök, “Keu jizani, mi köndatzal.” ⁷¹ Mewö jiba kiripo naŋguŋe geiga welenqeŋe ambi kunŋan i eka azi kösutŋe kingeri, mi kewö jii mötket, “Azi kianŋön mönö mewöyök Nazaret azi Jisösbuk malök.”

⁷² Mewö jiiga kunbuk qaŋ köla jöjöpaŋ keunöŋ jim köhöiba kewö jiyök, “Nöŋön azi mi qahö möt waŋgizal.” ⁷³ Nalö borom kun teköiga azi kösutŋe kingeri, yeŋön Pitögöreŋ kota kewö jiget mörök, “Alakŋa! Göŋön mewöyök yeŋgöreŋök kun akzan! Galili keu jöl jizani, miaŋön mönö mewöyök mi kondeliga mötzin.” ⁷⁴ Mi möta könahiba nanŋi qe-suahöm aŋguba jöjöpaŋ keunöŋ jim köhöiba jiyök, “Ni azi mi qahö möt waŋgizal! Munen jibilenak ewö, Anutunöŋ mönö likepŋi melen niŋgima.” Mewö jiiga miaŋgöreŋök kuruk qerök.

⁷⁵ Kuruk qeri möta Jisösnöŋ keu kewö jii möröhi, mi mötmöriyök, “Göŋön mutuk indimŋi karöbut qaŋ köl niŋginöŋga kuruknöŋ qetma.” Keu mi mötmöriba wösöŋi julmamgö aiga yaigep geba sahot böliyök. Mewö.

27

*Jisös waŋgita Pailötkö böröŋe alget.
Mak 15.1; Luk 23.1-2; Jon 18.28-32*

¹ Miri gĩaŋiiga amandinje jike nup galöm pakpak aka kantrigö jitŋe meme (70) yeŋön tokoba Jisös qeget kömumapkö keuŋi eraum mötket. ² Eraum

mötket teköiga Jisös jöhöba wanğita Rom premiö Pailötkö böröŋe alget. Mewö.

Judasnöŋ imbi auyök.

Apo 1.18-19

³ *Jisös qeget kömumawanğö keuŋi jim tekögetka Judas mamalolo wanğiyöhaŋön mi möta möt bölim anğuba silwö moneŋ köt 30 wanğigeri, mi memba jike nup galöm aka kantrigö jitŋememe yeŋğöreŋ anda melenđa enğiba kewö jiyök, ⁴ “Nöŋön sinğisöndok aka azi köpösihitŋi qahö mi mamalolo mem wanğibiga qeget kömuma.” Mewö jiyökmö, yeŋön jiget, “Mi neŋğöreŋ yuaia qahö! Mi mönö nangi manjara!” ⁵ Mewö jiget möta silwö moneŋ köt mi memba gil tipköiga jöwöwöl jike uruŋe anök. Aniga nanŋi mosöta anda imbi auyök.

⁶ Jike nup galöm bohonŋi yeŋön moneŋ köt mi memba kewö jiget, “Moneŋ ki mönö azi seŋŋanğö bohonŋa. Mianğöra mi jöwöwöl jikegö moneŋ köwenöŋ albingö dopŋi qahö. Mewö aka Mosesgö Köna keu oŋgitpinbuk.”

⁷ Mewö jiba eraum möta moneŋ mianjön gwakömnöŋ kimbut meme azi kungöreŋ gölme köröŋi kun bohonŋi megetka kian ambazip yeŋğö qaksirinina ahök. ⁸ Mianğöra aka gölme köröŋi mianğö qetŋi mi nalö kewöŋe mewöyök toroqeba ‘Gölme köröŋi seŋŋambuk,’ qerakze.

⁹ *Kezapqetok azi Jeremaianöŋ keu qeljine jiyöhi, mianjön mönö ölnambuk ahök. Keu mi kewö, “Yeŋön Israel könagesögö jitŋememeniŋi aka azi mi

* 27:3: Apo 1.18-19 * 27:9: Zek 11.12-13

söngöröñi memegöra kewöta algetka silwö monen köt 30 ahöhi, mi meget. Mi azigö bohonja.

¹⁰ Yeñön mi memba mianön gwakömnöñ kimbut meme azi kungören gölme köröñi kun bohonji meget. Mi mönö Kembunöñ jim kutum niñgiyöhanjö dop mewö meget.” Mewö.

Pailötnöñ Jisös qesim wanjiyök.

Mak 15.2-5; Luk 23.3-5; Jon 18.33-38

¹¹ Nalö miangören Jisösnöñ Pailötkö jeñe kiniga kewö qesim wanjiyök, “Ölña, gi Juda yeñö kiña akzan me qahö?” Qesim wanjiiga Jisösnöñ melenja jii mörök, “Mönö nangak jizani, mewö.”

¹² Jike nup galöm aka kantrigö jitnememe (70) yeñön keu gwötpuk Jisösgö silene ala jigetmö, töndup keu kitipñi kun qahö melenök.

¹³ Keu bök kiniga Pailötnöñ Jisös kunbuk qesim wanjiya jiyök, “Mötnöñ! Yeñön keu gwötpuk göhö silege ala nangöba jizei, mi mötzan me qahö?” ¹⁴ Mewö jiyökmö, Jisösnöñ bölöñi kun qahö ahökmö, töndup keu miengö likepñi kun qahö melenök. Keu bök kiniga premiönöñ gwötpuk welipköyök. Mewö.

Pailötnöñ Jisös kömumapkö jim teköyök.

Mak 15.6-15; Luk 23.13-25; Jon 18.39–19.16

¹⁵ Rom premiönöñ yambu (yara) dop pasowa sösöngai nalöñe kösö mireyök azi mohok sihimñinangö dop qetñi qeta qesigeri, mi pösat engizapma. ¹⁶ Nalö miangören azi kun qetñi Barabas qetkeri, yañön kösö mire tarök. I bölönamñangöra miwidimgögetka malök.

17 Mewö aiga tokogetka kewö qesim enġiyök, “Barabas me Jisös, qetnji Kraist qerakzei, yetköreñök niñia pösat enġibi etmapköra mötze?”

18 Galöm yeñön Jisösgöra körögisigisi mötkeañgöra aka i premiögö böröñe al wañġiget. Mi möta sihimñinañgö mewö qesim enġiyök.

19 Mi mörökmö, jimtekötekögö jakömbuak dum tatatñe tariga anömñan buzup keu kun kewö ali kayök, “Ni merak sunġem gaun kun eka miangöreñ azi miangöra aka sihimbölö gwötpuk mötzal. Miangöra azi solanñi mi mönö lömböt kude wañġiman.”

20 Keu mewö kayökmö, jike nup galöm aka kantrigö jitñememe yeñön ambazip kambu uruesi mem enġiba kewö jiget, “Mönö Barabas pösata Jisös maripomnöñ qemegöra jiman. Mewö qesim wañġime.”

21 Mewö jigetka premiönöñ melenđa qesim enġiyök, “Azi yahöt mietköreñök mönö niñia pösat enġibi etmapköra mötze?” Mewö qesim enġiiga “Barabas!” jiget. 22 Mewö jigetka Pailötnöñ kewö qesim enġiyök, “Mewö jizeañgöra Jisös, qetnji Kraist qerakzei, nöñön i mönö denöwö ak wañġibileñak?” Mewö qesim enġiiga yeñön körek qetket, “Mönö maripomnöñ qeget jiman!”

23 Mewö qetketka premiönöñ jiyök, “Mi wuanöñgöra? Yañön mönö wani bölöña ahök?” Mewö jiyökmö, yeñön mi möta kapan kōla toroqeba qet gigilahöba kewö qetket, “Mönö maripomnöñ qeget jiman!” 24 *Mewö qetketka kezap-ölök aketka göjupmajupnöñ kunbuk qariiga

* 27:24: Dut 21.6-9

Pailötnöŋ mi eka möta bim karim asuhubapuköra o memba böröŋi ambazip kambu jeŋine saŋgoŋda kewö jiyök, “Azi kiangö sepŋi mokoget gemawi, mianöŋ mönö nöŋgö qakne qahöpmö, mönö nanŋini qakŋine öŋgöma.”

²⁵ Mewö jiiga ambazip kambu körek pakpak yeŋön kewö melenget, “Sepŋangö likepŋan mönö nini aka nahönböratnini neŋgö qaknine öŋgöma!”

²⁶ Mewö melengetka Pailötnöŋ Barabas pösat enŋii erökmö, Jisösyä jiiga ihilek wahinambuknöŋ qeyöyaköba qeget. Mewö qegetka maripomnöŋ qemegöra Rom yarö azi yeŋgö böröŋine alök. Mewö.

Jisös kukulömbuan ak waŋgiget.

Mak 15.16-20; Jon 19.2-3

²⁷ Böröŋine aliga Rom premiögö yarö azi yeŋön Jisös waŋgita premiögö jakömbuak mirigö kiripo uruŋe aŋgotket. Aŋgota yarö kambu lökŋanök öröm enŋigetka kaba tokoba Jisös liliköm waŋgiget.

²⁸ Liliköm waŋgiba nanŋi sile esuŋi köteköba maluku pisikŋi gugakgugak kun löngöt waŋgiget.

²⁹ Löngöt waŋgiba sötman kösö limbiŋda ila ewö nöropŋe kölget geyök. Geiga jehot kun böröŋi ölŋe ala simin köl waŋgiba göngönahit ak waŋgiba kewö jiget, “Owe owe, Juda yeŋgöreŋ kiŋ, owe!”

³⁰ Titipepe mewö aka söutkölap qeba jehot öröpŋi waŋgita mianöŋ nöropŋe qeget.

³¹ Mepaqepaik mewö ak waŋgim teköba maluku pisikŋi gugakgugak mi qeköba nanŋe sile esu kunbuk löngöt waŋgiba maripomnöŋ qebingöra waŋgita anget. Mewö.

*Jisös maripomnöŋ qeget.**Mak 15.21-32; Luk 23.26-43; Jon 19.17-27*

³² Anda köna namŋe azi kun qetŋi Saimon miwikŋaiget. Yaŋön Afrika siti qetŋi Sairini miangö aziŋa. Miwikŋaiba kuŋgum waŋgigetka Jisösgö maripomŋi memba aŋguyök. ³³ Jisös mewö waŋgita gölme kun qetŋi Golgota mi nanine keunöŋ Nöröpsihit, miangöreŋ anda aŋgotket. ³⁴ *Aŋgota wain o aka marasin qetŋi mör mi mindiriba lolonqalon memba nemapköra waŋgigetmö, Jisösnöŋ mi esapköba memba möta tököyök.

³⁵ *Tököiga kinda maripomnöŋ qeget. Qeget kiniga kiawen meget qötöŋi ahuiga miangö dop Jisösgö sile esuŋi sutŋine mendeŋda meget. ³⁶ Mi memba tata Jisös jegalöm ak waŋgiget. ³⁷ Nöröpŋe eu qegeraŋgö könaŋi kewö ohoba qeget, 'Juda yeŋgö kiŋ kembuŋina ki.' ³⁸ Kegwek-kahasililiŋ azi yahöt mi yambuk maripomnöŋ etkuget. Kun böröŋi ölnŋe, kun qaniŋe likeplikep mewö etkuget.

³⁹ *Ambazip oŋgita anda kaba kukulömbuaŋ aka jelikit aka nöröp köla kewö jiget, ⁴⁰ *"Yei! Gi mönö jöwöwöl jike ölop köndenöŋga gölmenöŋ eriga wehön karöbutkö uruŋe kunbuk mem wahöt kuŋgumangö jinöŋ. O, gi azi qetpuk! Gi Anutugö Nahönŋa akzan ewö, mönö ölop nangi bauköm aŋguba maripomnöhök etman."

⁴¹ Jike nup galöm, Köna keugö böhi aka kantrigö jitŋememe yeŋön mewöyök mepaqepaik ak waŋgiba kewö jiget, ⁴² "Tosatŋa bauköm eŋgiba

* **27:34:** Sum 69.21 * **27:35:** Sum 22.18 * **27:39:** Sum 22.7;
109.25 * **27:40:** Mat 26.61; Jon 2.19

malökmö, nanñi bauköm aᅇgumamgö osiza. Yaᅇn Israelgö kiᅇ akza ewö, mönö dölkü maripomnöhök eri eka mi möt naribinak. ⁴³ *Yaᅇn Anutu möt narim waᅇgiba ewebibiᅇambuk mala nanᅇaᅇgöra ‘Anutugö Nahönñi akzal’ jiiga mörin. Ayop, Anutunöᅇ i nalö kewöᅇ meköm waᅇgimamgö mötza me qahöwi, mi ölop ekin.” Mewö jiget. ⁴⁴ Kegwek-kahasililiᅇ azi yambuk maripomnöᅇ etkugeri, yetkön mewöᅇanök uruqeqe keu töhöreᅇ jim waᅇgiyohot. Mewö.

Jisösnöᅇ kömuyök.

Mak 15.33-41; Luk 23.44-49; Jon 19.28-30

⁴⁵ Silim bibiᅇi 12 kilok aiga miᅇaᅇgöreᅇök söᅇaupnöᅇ eta gölme pakpak dop köla ahöiga anda aua karöbutkö dop ahök. ⁴⁶ *Jisösnöᅇ 3 kilok miᅇaᅇgöreᅇ nanᅇ keunöᅇ kewö qet ketani qerök, “Eloi, eloi, lama sabaktani?” Mi nanine keunöᅇ: Anutuni, Anutuni, mönö wuanöᅇgöra andö nuᅇguzan?

⁴⁷ Mewö qeriga azi kösutᅇe kingeri, yeᅇgöreᅇök tosatᅇan mi möta jiget, “Mönö Elaijagöra qetza.”

⁴⁸ *Miᅇaᅇgöreᅇök yeᅇgöreᅇök kunᅇan ösumᅇan anda mömöndö kun kahali tandök mi memba wain o asöᅇambuknöᅇ kundumgöba ip göröm kitipᅇe jöhöba suruba Jisös numbuᅇe eu ali neyök.

⁴⁹ Neyökmö, tosatᅇan jiget, “Mönö mosötketka nanjöök kinök. Elaijanöᅇ kaba meköi etma me qahöpto, mönö mi ekin.”

⁵⁰ Mewö aketka Jisösnöᅇ kunbuk qet ketani qeta söᅇgörö ösum kondikᅇi öroba kömuyök. ⁵¹ *Kömuiga

* **27:43:** Sum 22.8 * **27:46:** Sum 22.1 * **27:48:** Sum 69.21

* **27:51:** Eks 26.31-33

mianğoreñök jöwöwöl jikegö uruñe opo * kinöhi, mianğön euyök bibiñe jurata eta yahöt ahök. Mewö eriga gölmenöñ kenöñ ketanjan meiga köt ketanji ketanji mesinök. ⁵² Qaksirigö köt köteñi miengö numbuñinan nanñök añañigetka ambazipñi sarakñi kömugeri, yeñgöreñök gwötpukñan guliba wahötket. ⁵³ Wahöta qaksirigö köt köteñini mosöta Jisösnöñ kömupnöhök wahöröhi, mianğö andöñe Jerusalem siti töröñi mianğoreñ kaba ambazip gwötpuk asuhum enğigetka enğeget.

⁵⁴ Suahö galöm aka yarö azi yambuk Jisösgö jegalöm memba malgeri, yeñön kenöñ meiga yuai tosatñi pakpak asuhuyöhi, mi eka auruba jöñömñini gwötpuk unduiga keñgötporiñ aka kewö jiget, “Yañön mönö ölnja Anutugö Nahönña akza.”

⁵⁵ *Ambi gwötpukñan sikep kinda yuai mi mewöyök eket. Yeñön Jisös wuatangöba Galiliyök kaba welen qem wañgiba malget. ⁵⁶ Yeñgö sutñine Magdalagö Maria aka Maria Jeims aka Joses yetkö namñiri aka Zebedigö nahönyahöt yetkö namñiri. Mewö.

Jisösgö qamötñi löm kölget.

Mak 15.42-47; Luk 23.50-56; Jon 19.38-42

⁵⁷ Mare aiga Arimatia azi pomñi kun qetñi Josef kayök. Yañön mewöyök Jisösgö gwarekñi kun ahök. ⁵⁸ Yañön Pailötgöreñ anda Jisösgö qamötñi memangö qesiyök. Qesiiga suahö azinöñ mi Josef wañgimegö jim kutum enğiyök.

⁵⁹ Jim kutum enğiiga Josefnöñ anda Jisösgö qamötñi memba eta opo tuatñan esuhuyök.

* **27:51:** Opo mi jöwöwöl jikegö oleni kömbukñi aka oleni töröñi kötötkñi mietkö sutñire kinök. * **27:55:** Luk 8.2-3

⁶⁰ Esuha memba qaksirinöŋ anda nanŋi köteŋ dölökŋi kötnöŋ urorohogetka kinöhi, qamötŋi mi mianğöreŋ alök. Mewö ala köt ketanŋi kun metaliga köteŋ numbuŋi közipköiga mosöta anök.

⁶¹ Magdalagö Maria aka Maria alaŋi kun yetkön mianğöreŋ köt köteŋ mesohol köla tarohot.

Yarö azi qaksiri galöm meget.

⁶² Sabat kendon tatatköra yuai mözözömgöba ahöba wahöta mianğöreŋ jike nup galöm aka Farisi (Köna keugö kapankölköl) yeŋön Pailötköreŋ anda tokoba kewö jiget, ⁶³ **“Ketanamnini, eŋololonğö urukunğukunğu azi mianğön jebuk malöhi, nalö mianğöreŋ kewö jii mörin, ‘Nöŋön wehön karöbut teköiga kunbuk guliba wahötmam.’ Neŋön keu mi mötmörizin.*

⁶⁴ Mianğöra göŋön ölop yarö aziurupki jinöŋ möta qaksirinöŋ anda mi törörök jegalöm memba malgetka wehön karöbut teköiga mosötme. Mewö qahö galöm membeak ewö, gwarekurupŋan mönö anda qamötŋi ölöŋ memba asamböta ambazip kewö jiget mötpeak, ‘Jisösnöŋ mönö kömupnöhök wahörök.’ Mewö jigetka tilipqilip eŋololon keu kondikŋi kianğön mönö eŋololon keu mutukŋi oŋgiriga böliqölibapuk.” ⁶⁵ Mewö jigetka kewö jii mötket, *“Yarö azi ki mönö ölop eŋuangita anda al eŋigetka qaksiri köteŋ numbuŋi mi törörök galöm köl soroköme.”*

⁶⁶ Mewö jii möta qaksirinöŋ anda köt köteŋaŋgö numbuŋe köt ketanŋi algetka közipköba kinöhi, mi supapŋi ala yarö azi al eŋigetka jegalöm köhöikŋi meget.

* **27:63:** Mat 16.21; 17.23; 20.19; Mak 8.31; 9.31; 10.33-34; Luk 9.22; 18.31-33

28

Jisösnöŋ kömupnöhök wahörök.

Mak 16.1-10; Luk 24.1-12; Jon 20.1-10

¹ Sabat kendon tatket teköiga Sonda söŋanök wahöta miri gianjiiga Magdalagö Maria aka alaŋi Maria kun yetköŋ qaksirigö köt köteŋ ekitkö anohot. ² Anohotka miangöreŋök kenöŋ ketanji kewögöra meyök: Kembugö garata kunöŋ Suepnöhök eta qaksirinöŋ kaba numbuŋe köt ketanji qetali ani qakŋe tarök. ³ Garatagö kaisongolomŋi mi wöl ewö aiga malukuŋi mi kousu ewö tuat lalamŋi ahök.

⁴ Mewö asuhuiga yarö azi qaksiri galöm megeri, yeŋön yangöra awöwöliba jönömŋini undui kömum töriget. ⁵ Mewö aketka garatanöŋ ambi yahöt yetköra keu kewö jiyök, “Jisös maripomnöŋ qegeri, injiri yangöra jaruzahot, mi mötzal. Miangöra mönö keŋgötŋiri kude mötmahot. ⁶ Nanŋak jiyöhanö dop mönö kömupnöhök wahötza. Miangöra ki qahö ahöza. Mönö kaba dum ahöyöhi, salupŋi mi ekŋahot.

⁷ “Mi eka ösumok gwarekurupŋi yeŋgöreŋ anda buzup keu ki jiyohot mötme, Jisösnöŋ kömupnöhök wahötza. Mötket, yaŋön mönö qeljiŋe mutuk Galili prowinsnöŋ anma. Inini ölop miangöreŋ anda i ekŋe. Mötket, nöŋön mi lök jibi mötze.”

⁸ Mewö jiiga zilaŋök qaksiri mosöta keŋgötŋiri möta töndup önöŋi qahö söŋgaiba buzup mi memba gwarekurupŋi jiyohot mötmegöra ösumŋiran anohot. ⁹ Ösumŋiran anohotka Jisösnöŋ i könanöŋ asuhum etkiba “Söŋanŋiri!” jiyök. Mewö jiiga kösutŋe anda sipköba könaŋe meraköba waikŋi

memba möpöseim wanġiyohot. ¹⁰ Möpöseim wanġiyohotka kewö jii mörohot, “Keñgötñiri kude mötmahot. Mönö anda munurupnan Galili anmegö keu jiyohotka mianġoreñ anda ni nekke.” Mewö.

Qaksiri galöm meme yeñön kösohotñi jiget.

¹¹ Ambiyahöt yetkön köna anohotka qaksirigö köt köteñ galöm meme yarö azi tosatñan sitinöñ kaba jike nup galöm engeka yuai pakpak asuhuyöhi, mianġö kösohotñi jiget mötket. ¹² Yeñön mi möta Juda yeñgö jitñememeurupñini öröm enġigetka mohotñe totoko ala Jisös wahötwahötkö keu asambötpingö keu areñ miwikñaiba monen keta bölökñi mi yarö azi enġiget.

¹³ Mi enġiba kewö jim kutum enġiget, “Inini mönö keu kewö jime: Nini sungem gaun ahöinga gwarekurupñan ölöñ kaba qamötñi yoñgorö memba anget. ¹⁴ Keu mewö jigetka keu mianñön premiögö kezapñe gei mötma ewö, lömböt enġö qakñine öngöbapuköra neñön mönö uruñi mölöwöriba memba eta alinga waimanjat qahö malme.”

¹⁵ Mewö jim kutum enġigetka mianġö dop aka monen memba anda nup keuñini wuatangöget. Mewö aketka Juda yeñön keu mi sutñine jim sehigetka möta malgetka anda nalö kewöñe mewöyök mi toroqeba jiget mörakzin. Mewö.

Misin nup memingö jimkutukutuñi

Mak 16.14-18; Luk 24.36-49; Jon 20.19-23; Apo 1.6-8

16 *Gwarekurup 11 yeñon Jerusalem mosöta Galili prowinsnönj anda Jisösnönj kundunje anmegöra jiyöhi, miangörenj öngöget. 17 Miangörenj öngöba Jisös eka waikñi memba möpöseim wanjigetmö, tosatñan yangöra uruyahöt aket. 18 Möpöseim wanjigetka yengörenj kaba kewö jiiga mötket, “Suepkö aka gölmegö kukösum pakpak mi Anutunönj niñgiiga nöngörenj ahöza.

19 **“Miangöra inini mönö gölme dop anda ambazip kambu pakpak kewö engömegetka nöngö gwarekurupni akñe: I mönö Iwi, Nahön aka Uña Törönj neñgö qetnine o melun mem engime 20 aka nöñon keu wuatangömegöra jim kutum engiali, mi pakpak tem kölmegöra mönö kusum engiba malme. Mötket, nöñon mönö nalönj nalönj embuk mala anda malbiga gölmegö nalönjan teköma.”* Mewö.

* **28:16:** Mat 26.32; Mak 14.28 * **28:19:** Apo 1.8

Burum-Mindik Bible
The New Testament and portions of the Old Testament
in the Somba-Siawari language of Papua New Guinea,
also called the Burum Mindik language.
Sampela hap Buk Baibel long tokples Burum Mindik
long Niugini

Copyright © 1992, 2002 The Bible Society of Papua New Guinea

Language: Burum-Mindik or Somba-Siawari (Somba-Siawari or Burum-Mindik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 11 Nov 2022 from source files dated 9 Oct 2020

c0871260-68cc-5a50-953f-52200e105d1e